

## DIZRA' CHAWE' CA NACA CHEĒ JESUCRISTO DA BZUAJ SAN MATEO

*La benne' ca' gulaque' xra gula cheē Cristo  
(Lc. 3.23-38)*

<sup>1</sup> Da caní zaj naca na la cheē benne' zaj naque' xra wdé cheē Jesucristo. Jesús nigá nababe' zri'ine zre sua David, ne zri'ine zre sua Abraham.

<sup>2</sup> Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne' biche' ca'.

<sup>3</sup> Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom.

Esrom nigá guque' xra Aram.

<sup>4</sup> Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

<sup>5</sup> Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isaí.

<sup>6</sup> Isaí nigá guque' xra David, benne' wenná bea.

Wenná bea David nigá, ne nu'ula na' nédxute guque' zru'ula Urías gulaque' xra xrna Salomón.

<sup>7</sup> Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

<sup>8</sup> Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

<sup>9</sup> Uzías nigá guque' xra Jotam.

Jotam nigá guque' xra Acaz.

Acaz nigá guque' xra Ezequías.

<sup>10</sup> Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

<sup>11</sup> Josías nigá guque' xra Jeconías ne benne' biche'  
ca' ca lu zra ca' gate benne' Babilonia  
guleché'e benne' Israel ca' lu xezr la xu  
Babilonia.

<sup>12</sup> Jeconías nigá guque' xra Salatiel.

Salatiel nigá guque' xra Zorobabel.

<sup>13</sup> Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

<sup>14</sup> Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

<sup>15</sup> Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le' Jacob.

<sup>16</sup> Jacob nigá guque' xra José, benne' chee' María,  
xrna Jesús, Bénnea' naque' Cristo.

<sup>17</sup> Caní naca, gulaca chidá' cue' bénneache gate  
guzú lau zua Abraham, ca bzrinte zra zua David,  
na' gulaca xechidá' cue' bénneache ca' gate guzú  
lau zua David, ca bzrinte zra gate na' benne' Ba-  
bilonia ca' guleché'e benne' Israel ca' lu xezr la xu

chee', na' gulaca xechidá' cue' bénneache ca' gate guzú lau zra na', ca bzrinte zra gulaj Cristo.

*Ca guca gate gulaj Cristo*  
(Lc. 2.1-7)

<sup>18</sup> Caní guca gate na' gulaj Jesucristo. María, xrna Jesús ba nachébebe' gácabe' zru'ula José. Nédxula ca za xelenite', nu'ula nigá ba zué' zi'i ne chee xel-la' waca chee Be' Lá'azxa chee Dios.

<sup>19</sup> José, benne' chee María nigá, naque' benne' xrlátaje. Quebe guca lazre' gulé'ene' ca ba naca chee María lau benne' xezre ca'. Guca lazre' gusané' le' bagácheze.

<sup>20</sup> Dxácaté dxudé lazre' da nigá, ble'e lau tu gubáz chee xabáa, gubáz chee Xránadxu, ga zua José na' lu bchigala, na' guzre' le':

—José, zri'ine zre sua David, quebe zrebu' si' lu na'u María chee gácabe' zru'ulu', lawe' da bidu biu na' sanbe' zabe' ne chee Be' Lá'azxa chee Dios.

<sup>21</sup> Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guselabe' bénneache lu dul-la da zaj nabague'.

<sup>22</sup> Xúguté da caní gulaca ca' chee guca ca da gunná Xránadxu lu dxu'a benne' ca' buluchálaje' waláz chee'.

<sup>23</sup> Caní gunné':

Tu nú'uladau' gúadaube' sanbe' tu bidu biu cheebe', na' xelu'e labe' Emanuel.

Emanuel zéajé na: Dios zúalene' dxi'u.

<sup>24</sup> Ca bebán José, na' bene' cáteze gunná gubáz chee Xránadxu, na' guzí' lu ne'e María chee gácabe' zru'ule'.

<sup>25</sup> Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

## 2

### *Dxelezhín benne' sina ca' lu xezre Jerusalén*

<sup>1</sup> Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa belezhín benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula.

<sup>2</sup> Na' gulenabe':

—¿Ga zua bidu na' ba gúlajbe' chee gácabe' benne' nna bé'ene' benne' judío ca'? Gate zuantu' chalá'a naga dxalaj gubizra blé'entu' belaj cheebe', na' bla'ntu' nigá chee gúe lá'ana gúe szrentu'-be'.

<sup>3</sup> Ca guneze Herodes, benne' wenná bea, da nigá, na' guzúe' stebe, ne cá'anqueze guca chee xúgute benne' zaj zre'e Jerusalén.

<sup>4</sup> Nadxa Herodes, wenná bea na', btupe' xúgute benne' xíchaje chee bxruze ca', ne benne' dxuluzájle'e da nadxixruj bea Dios, na' gunábene' benne' ca':

—¿Gazra na' galaj Cristo?

<sup>5</sup> Benne' caní gulé'e le':

—Lu xezre Belén da nababa xezr la xu Judea, lawe' da bzuaj caní tu benne' bchálaje' waláz chee Dios, gate na' gunné':

<sup>6</sup> Lue', Belén chee xezre ca' zaj nababa na Judá, nacu' lue' xezre da quebe naca na da bzébedxa ládujla benne' ca' dxelenná be'ene' xezr la xu Judá nigá,

lawe' da ládujla bēnneache chiu' dxuaj tu benne'  
 nna be'e,  
 na' guxúequeze' bēnneache chia', benne' Israel.

<sup>7</sup> Nadxa Herodes, wenná bea na', bláwizre'  
 bagácheze benne' sina gula ca', na' gunábene' lē'  
 bátala ble'e lau belaj na' belelé'ene'.

<sup>8</sup> Nadxa gusel-le' benne' ca' chjaque' xezre Belén,  
 ne guzre' lē':

—Le chjaca na', ne le naba xanne' chee bidu  
 na', na' ca cheajxrácale-be', na' le guzén neda' chee  
 cha'a neda' gúe lá'ana gúe szrena'-be'.

<sup>9</sup> Ca bexuzre belén benne' sina gula ca da gunná  
 Herodes, wenná bea, nadxa besiá'que', na' belaj  
 da belelé'ene' gate zaj zre'e chalá'a naga dxalaj  
 gubizra zeaj na lau lē', na' bzrinte na, ne guzúa na  
 naga zua bidu na'.

<sup>10</sup> Gate benne' sina gula ca' belelé'ene' belaj na',  
 nadxa gulebéle'ene'.

<sup>11</sup> Ca gulu'e lu xu'u, belelé'ene' bidu na', ne  
 xrnabe' María. Nadxa buluzú zribe' dxelúe lá'ana  
 dxelúe szrene' bidu na'. Nadxa gulesálaje' xua  
 chee' ca', ne bulunézruje'-be' oro, ne xalaj zixre, ne  
 mirra da naca na zichaj.

<sup>12</sup> Ca gudé na', Dios guzre' benne' ca' lu bchigala  
 québedxa xelexedé' naga zua Herodes. Chee lē na  
 belexeque'e neza xula, belexezrine' lazrie'.

### *Ca guca beleché'e Jesús lu xezr la xu Egipto*

<sup>13</sup> Ca gudé besí'aca benne' sina gula ca', nadxa tu  
 gubáz chee xabáa, gubáz chee Xránadxu ble'e lawe'  
 José lu bchigala, na' guzre' lē':

—Guxasa. Becá'a bidu na', ne xrnabe', na' le  
 chjaca lu xezr la xu Egipto, na' xegá'anu' ga na'

ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá chee guti'e'-be'.

<sup>14</sup> Nadxa José guxase', na' chizrélala beche'e bidu na', ne xrnabe', na' bexu'e-be' lu xezr la xu Egipto.

<sup>15</sup> Gulezré'e na' ca bzirindxa zra gute Herodes. Caní guca ca naca da gunná Xránadxu lu dxu'a benne' bchálaje' waláz chee', gunné': "Xuláwizra' bi biu chia' chee' xedxúajbe' lu xezr la xu Egipto."

*Dxenná be'e Herodes benne' ca' xelúti'e' bidu biu ca'*

<sup>16</sup> Gate gúquebe'e Herodes gulezí xē benne' sina ca' le', na' bzrá'ale'e, ne gunná bé'ene' benne' ca' xelúti'e' xúgute bi biu dxé'enedau', ca zrinte bidu ca' ba zaj zua chup iza, bidu ca' zaj zrabe' xezre Belén, ne bidu ca' zaj zrabe' lu xézredu ca' zaj naxechaj na xezre Belén na'. Caní ben Herodes cáteze buluzén benne' sina gula ca' le' ca naca zra na' belelé'ene' belaj na'.

<sup>17</sup> Ca'an guca ca da bzuaj Jeremías, bénnea' bchálaje' waláz chee' Dios ba guca zan' iza, gunné':

<sup>18</sup> Guca tu schaga lu xezre Ramá.

Guca webezre, ne gulebezre xache'.

Raquel na' dxebézrele'e chee' bi chee' ca'.

Québequeze dxaca lazre' xexaca zrene'

lawe' da ba gulate bi chee' ca'.

<sup>19</sup> Ca gudé gute Herodes, na' tu gubáz chee' xabáa, gubáz chee' Xránadxu ble'e lawe' José lu bchigala naga zue' Egipto, na' guzre' le':

<sup>20</sup> —Guxásache. Beche'e bidu chiu' nigá, ne xrnabe'. Bexíaj lu xezr la xu Israel, lawe' da ba gulate benne' ca' gulaca lazre' xelúti'e' bidu nigá.

<sup>21</sup> Nadxa guxasa José, na' beche'e bidu na', ne xrnabe', na' belexezrine' lu xezr la xu Israel.

<sup>22</sup> Ca guneze José dxenná bea Arquelao naga nababa Judea waláz chee xre', Herodes na', na' bzrebe José xexíaje' ga na'. Nadxa bexíaje' naga nababa Galilea ca da ba guzre gubáz chee xabáa le' lu bchigala.

<sup>23</sup> Ca bezrine' na', na' bexíaje' cheajxezúe' lu xezre Nazaret. Caní guca ca da gulenná benne' ca' buluchálaje' waláz chee Dios, gulenné' Jesús nigá si le' benne' Nazaret.

### 3

#### *Juan dxegu'e lban le'e xixre' lawe' lataj* (Mr. 1.1-8; Lc. 3.1-9, 15-17; Jn. 1.19-28)

<sup>1</sup> Ca lu zra ca' bla' Juan, bénnea' bchue' bénneache nisa, dxegu'e lban le'e xixre' lawe' lataj naga nababa Judea.

<sup>2</sup> Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

<sup>3</sup> Juan nigá naque' bénnea' bchalaj Isaías chee'. Isaías bchálaje' waláz chee Dios gate bzuaje' caní: Dxene chi'i benne' dxebezre xe'e le'e xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Le' naga tée'.

<sup>4</sup> Zra lana Juan nigá nune na xicha zra camello, ne bazzu dxu'a le'e chee' naca na xide, na' dxawe' biche xuaj, ne bzrína'dau' chee bézudau'.

<sup>5</sup> Belezrín benne' belenne' ca da dxuchalaj Juan, benne' zá'aque' xezre Jerusalén, ne benne' chee

xúgute xezre ca' zaj nababa Judea, ne benne' zá'aque' xézredu ca' zaj nnita gáguze xegu Jordán.

<sup>6</sup> Ca gulexrúalepe' dul-la chee', Juan nigá bchue' benne' ca' nisa lu xegu Jordán.

<sup>7</sup> Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnnajle da ba xa' da za'?

<sup>8</sup> Le gun da xrlátaje da xelunna bea na ba bebí'i lázrele.

<sup>9</sup> Quebe guéquele lale, dxennale le'eze: “Nalatu' lawe' da nácantu' xrtia Abraham.” Neda' dxapa' le'e: Dios waca xexune' xiaj caní zri'ine xrtia Abraham.

<sup>10</sup> Le'e nácale ca xaga ca'. Xia waga bache nalá na chee' chugu na xaga ca', na' xúgute xaga ca' quebe dxelebía na da zixre chawe' welechugue na, na' xelezxe na lu xi'.

<sup>11</sup> Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' guné' ca da zéaje' xel-la' dxedxúa' nisa, guzúe' le'e Dios Be' Lá'azxa, ne xi' chee'. Benne' nigá nácadxe' blau ca neda', na' quebe zaca' cuéajza' zrele' xu'u ni'e.

<sup>12</sup> Cá'anqueze nácale ca zrua' xtila. Benne' nigá ba nu'e da dxun be', cuéaje' xrte zrua' xtila na', na' xebéaje' chalá'ala xizre chee' na, na' xuzrá chawe' zrua' xtila na' lu da'a chee' na, san guzezxe' xizre na' lu xi' da quebe xexula na.

*Da guca gate gudxúa Jesús nisa  
(Mr. 1.9-11; Lc. 3.21-22)*



<sup>13</sup> Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee guchúe' Le' nisa.

<sup>14</sup> Nédxute Juan quebe guca lazre', na' dxé'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

<sup>15</sup> Jesús guzre' le':

—Be' lataj gaca caní na'a. Dxun na ba xen gundxu xúgute da xrlátaje lau Dios.

Nadxa Juan bene' ca'.

<sup>16</sup> Gate bexuzre gudxúa Jesús nisa, na' la bxálajte xabáa, na' ble'e Juan Be' Lá'azxa chee Dios dxétaje' ca tu gugu chíchidau', zeajsúaba' lawe Jesús.

<sup>17</sup> Nadxa ben tu chi'i lu be', gunné':

—Benne' nigá naque' Zrí'inequeza' nazrí'ite lazra'. Dhezaca ba lázre'ena' Le'.

## 4

### *Dxaca lazre' da xriwe' gun na бага Jesús zria (Mr. 1.12-13; Lc. 4.1-13)*

<sup>1</sup> Nadxa Be' Lá'azxa chee Dios la guché'te' Jesús le'e xixre' lawe' lataj naga gúe lazre' da xriwe' gun zréaje na Le'.

<sup>2</sup> Quebe bi gudagu Jesús chua zra chua xela, na' ca gudé na' gudune'.

<sup>3</sup> Nadxa da xriwe' bzrin na naga zua Jesús chee gun zréaje na Le', na' dxé na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

<sup>4</sup> Jesús bechebe':

—Lu xiche chee Dios dxenné': "Quebe gaca ban nu benne' gawe' xétaze, san nen xúgute dizra' chee Dios gaca bane'."

<sup>5</sup> Nadxa da xriwe' guché na Jesús lu xezre lá'azxa Jerusalén, na' bzua na Le' xíchajte xudau',

<sup>6</sup> na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee Dios:

Dios nna bé'ene' gubáz chee xabáa chee' ca' chee xelácalene' Lue'.

Welexechise' Lue' nen ne'e chee quebe gunu' zi' ni'u lu xiaj ca'.

<sup>7</sup> Na' gunná Jesús:

—Cá'anqueze dxenná lu xiche chee Dios, dxé'e bénneache: "Quebe guchínenu' Xranu' Dios cáteze dxaca lazru'."

<sup>8</sup> Nadxa da xriwe' guché na Le' tu lu xi'a sibe, na' ble'e na Le' ca naca xúgute cue' xezr la xu zaj nnita lu xezr la xu, ne ca naca xel-la' guni'a chee na.

<sup>9</sup> Na' gunná da xriwe', dxé na Le':

—Xúgute da caní gunna' chiu' che guzú zribu' gucá'ana szrenu' neda'.

<sup>10</sup> Nadxa Jesús guzre' na:

—Bexíaj, da xriwe', lawe' da dxenná Dios lu xiche chee', dxé'e bénneache: "Bca'ana szren Xranu' Dios, ne be lá'ana tuze Le'."

<sup>11</sup> Nadxa da xriwe' becuasa na lau Jesús, na' belezrín gubáz chee xabáa chee Dios, ne bu-lunézruje' da dxechine Jesús.

*Dxuzú lau Jesús dxuchálaje' xrtizra' Dios naga nababa Galilea*

*(Mr. 1.14-15; Lc. 4.14-15)*

12 Gate ben Jesús xu'u Juan lizre xia, na' bezé'e zexíajé' naga nababa Galilea.

13 Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí.

14 Caní guca ca da bzuaj Isaías, benne' bchálaje' waláz chee Dios, gunné':

15 Lu xezr la xu chee Zabulón, ne chee Neftalí, naga zrua neza da zeaj na dxu'a nísadau', chalá'a naga dxalaj gubizra xechalá'a xegu Jordán. Naga nababa Galilea, naga zaj zra' benne' quebe zaj naque' judío.

16 Bénneache zaj zra' lu da chul-la belelé'eng' tu da dxusaníle'e na, na' benne' zaj zra' naga xu'u zrul-la chee xel-la' gute ba bsaní' tu xi' naga zaj zre'e.

17 Ca lu zra na' guzú lau Jesús dxegu'e lban, dxenné':

—Le xebí'i lázrele, lawe' da ba zua gáguze zra nna bea Dios lu xezr la xu nigá.

*Jesús dxuláwizre' tapa benne' wezén bela*

*(Mr. 1.16-20; Lc. 5.1-11)*

18 Gate na' zeaj Jesús dxu'a nísadau' ga nababa Galilea, na' blé'eng' chupa benne'. Tue' le' Simón, ne zua xetú le' Pedro, na' xetúe' le' Andrés, biche Simón na'. Benne' caní zaj naque' benne' wezén bela, na' dxuluzale' xixruj bela chee' lu nisa.

19 Nadxa Jesús dxé'e benne' caní:

—Le gun neda' tuze, na' guna' le'e benne' gutúpale chia' bénneache ca dxunle dxezenle bela.

20 La bulucá'anate' xixruj chee' ca', na' zjácalene' Jesús.

<sup>21</sup> Xelátedauze gusá'aque', na' ble'e Jesús xechupa benne'. Tue' le' Jacobo, ne xetúe' le' Juan, biche Jacobo nigá. Zaj naque' zri'ine Zebedeo, ne zaj xu'e tu lu da dxedá lawe' nísadau' nen xre', dxelexún chawe' xixruj chee'. Jesús bláwizre' le',

<sup>22</sup> na' la bulucá'anaṭe' da dxedá lawe' nísadau' na', ne xre', na' zjácáleṇe' Jesús.

*Jesús dxusédenē' bēnneache naga nababa Galilea (Lc. 6.17-19)*

<sup>23</sup> Zeaj Jesús xúgute xezre zaj nababa Galilea, na' tu tu xezre ca' dxuzéajni'ine' bēnneache lu xu'u ca' naga dxulucá'ana szren benne' judío ca' Dios. Na' dxegu'e lban ca' nna bea Dios, ne dxexune' xúgute benne' ca' ca' zaj naca xízrawe' cha chee'.

<sup>24</sup> Ca'an guca, xúgute benne' chee xezr la xu Siria belenne' ca' da dxun Jesús, na' belezrine' lau Jesús, zaj naché'e benne' we' ca', benne' zaj xu'e xízrawe', ne benne' zaj zue' lu xel-la' dxudía, ne benne' zaj xu'e be' xriwe', ne benne' zaj xu'e chuna', ne benne' zaj naxrú'unie' bine, na' bexún Jesús xúgute benne' caní.

<sup>25</sup> Zjácále benne' zan Le', benne' zaj nababe' xezre ca' zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababe' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gu-bizra.

## 5

*Lban da bchalaj Jesús tu lu xi'a*

<sup>1</sup> Gate ble'e Jesús xúgute benne' zan ca' zá'aque' naga zue', nadxa guluéne' tu lu xi'a, ne gudxé'e na'. Nadxa benne' ca' dxuséde Jesús beledube' cuite'.

2 Nadxa guzú lau Jesús dxusédene' benne' ca'.

*Nu benne' naca chee' tu da ba neza  
(Lc. 6.20-23)*

3 Gunná Jesús:

—Da ba neza zrente naca na chee benne' ca' dxelexúnbe'e ca naca xel-la' dxexazrje chee' lau Dios. Benne' caní zaj naca chee' xelexú'e naga dxenná bea Dios xabáa.

4 'Da ba neza zrente naca na chee benne' ca' dxelelé'elē' zaj zue' lu da baxache' lawe' da zaj nabague' dul-la. Dios dxexúe zrene' benne' caní.

5 'Da ba neza zrente naca na chee benne' zaj naque' zren lazre'. Benne' caní xelezí'e chee' xezr la xu da nachebe lazre' Dios gunézruje' benne' caní.

6 'Da ba neza zrente naca na chee benne' du lazre' dxelaca lazre' xelune' da naca xrlátaje lau Dios. Dios gácalene' benne' caní.

7 'Da ba neza zrente naca na chee benne' dxelex-exache lazre' benne' xula. Dios wexache lazre' benne' caní.

8 'Da ba neza zrente naca na chee benne' ca' zaj xu'u xichaj lázrdawe' da xrlátaje. Benne' caní welelé'ene' Dios.

9 'Da ba neza zrente naca na chee benne' dxele-beza zri lazre' nen bēnneache. Dios guzúe' le' ca bi cheéqueze'.

10 'Da ba neza zrente naca na chee benne' dx-eledée' xel-la' zi' lu na' benne' ca' dxelune' chee' da calēla cate' dxelune' da xrlátaje. Benne' caní zaj naca chee' xelexú'e naga dxenná bea Dios xabáa.

11 'Da ba neza zrente naca na chee le'e chee' benne' dxelenné' schanni' chee, ne dxelune'

cheeḷe da caleḷa, ne dxelenné' cheeḷe xúgute dizra' wen lazre' lawe' da nácale chia' neda'.

<sup>12</sup> Le be, ne le xezaca ba lázrele lawe' da wazile tu da zrente da gunna Dios le'e xabáa. Caní gaca na lawe' da cá'anqueze caní guláu zi' xuzre' benne' ca' buluchálaje' waláz chee Dios, benne' ca' gulezré'e nédxudxa ca le'e.

*Nácale ca zede', ne ca tu xi' lu xezr la xu*  
(Mr. 9.50; Lc. 14.34-35)

<sup>13</sup> Na' gunná Jesús:

—Le'e nácale ca zede' chee bénneache lu xezrla xu nigá. Che zede' nigá xenite xel-la' sna'a chee na, ¿ájazra gácaleḷe bénneache ca? Québedxa gaca guchínedxu zede' caní. ¡Chú'unadxu na, na' xululéaj bénneache ḷe na!

<sup>14</sup> 'Le'e nácale ca tu xi' chee bénneache zaj zre'e xezr la xu. Tu xezre da zua na tu lu xi'a, quebe gáchequeze na.

<sup>15</sup> Gate guzálajdxu tu xi', quebe gudúsedxu na. Guzúadxu na sibe naga gusení na chee xeledé'e xúgute benne' zaj zre'e lu xu'u.

<sup>16</sup> Cá'anqueze le gun le'e. Le güe lataj gusení xi' da nácale lau bénneache ca' chee xeledé'ene' ca da xrlátaje da dxunle. Nadxa xelúe lá'ane' Xrale Dios zue' xabáa.

*Da bchalaj Jesús ca naca chee da nadxixruj bea Dios*

<sup>17</sup> Gunná Jesús:

—Quebe dxal-la' guéquele le'e za'a neda' chee cua' ca naca da bdxixruj be'e Moisés, ne ca naca dizra' da buluchalaj benne' ca' buluchálaje' waláz chee Dios. Quebe za'a chee cua' na. Za'a chee gulé'eda' cáteze zéaje na.

18 Da li dxapa' le'e. Dxácatē zaj zua xabáa, ne xēzr la xu nigá, quebe dúaqueze tu dizra', ne tu da da' lu da nadxixruj bea na nigá ca zrindxa zra gaca xúgutē ca da dxal-la' gaca na.

19 Cheē lē na', che tu benne' guzúē' chalá'ala bítetēzla da nigá da bdxixruj bea Dios, láqueze naca na tu da dauze, ne che guzējajni'ine' bēneache cheē xelúnqueze' ca', benne' nigá xegá'ane' cá'aze naga dxenná bea Dios xabáa. Bēneae' guzúē' dizra' da nadxixruj bea nigá, ne gulé'ene' bēneache cheē xelúnqueze' ca', benne' nigá wegá'anaqueze' ba lá'ana naga dxenná bea Dios xabáa.

20 Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'ē da nadxixruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

*Da bchalaj Jesús ca naca cheē xel-la' dxezrá'a  
(Lc. 12.57-59)*

21 Na' gunná Jesús:

—Le'e ba bénele ca gulenná xrtíale gula ca': “Quebe gútele benne',” na' “Nútetēze benne' gutiē' benne' waxíaje' cheē cuía xi'ē.”

22 Neda' dxapa' le'e, nútetēze benne' dxezré'ē le sa' ljwezre' waxíaje' cheē cuía xi'ē. Na' bēneae' dxenné' schanni' cheē le sa' ljwezre' waxíaje' lau benne' cheē xu'u lawe' blau, na' xuludéē' lē' cheē cuía xi'ē. Bēneae' dxenné' cheē le sa' ljwezre' tu dizra' sban, benne' nigá nácaqueze cheē' chéaje' lu lataj ba xa'.

23 'Che gu'u lu xudau' tu da gunézruju' lau Dios, ne na' cheajsá lazru' chee tu da nunu' chee le sa' ljwezru',

24 bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee bi gunézruju' lau Dios.

25 'Che zua nu benne' dxebagu' chee', na' che'e lue' lau benne' guchi'e chiu', bexaca chawe' nen le' la neza na', chee quebe gudée' lue' lau bènnea' dxuchi'e da dxaca. Che quebe gunu' caní, nadxa benne' dxuchi'e da dxaca na' gudée' lue' lu na' benne' dxusézxuje' bènne' ca' lizre xia, na' xelegú'e lue' lizre xia na'.

26 Da li dxapa' lue'. Quebe xedxúaju' na' che quebe quízruju' xúgute da dxebagu' chee benne' na'.

*Da bchalaj Jesús ca naca chee benne' dxíchaje' xrba chee xel-la' nuchaga na'*

27 Na' gunná Jesús:

—Le'e bache bénquezle ca gulenné' nédxute: “Quebe gunu' dul-la da dxichaj na xrba chee xel-la' nuchaga na'.”

28 Neda' dxapa' le'e, núteteze benne' ne'e tu nu'ula, ne sa lazre' le', báchequeze bene' dul-la nen nu'ula na' lu xichaj lázrdawe'.

29 'Che xiaj lau' da zua xabela dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee bel-la' dxen chiu' quézcala chu'u lataj ba xa' dute bel-la' dxen chiu'.

30 Che na'u da zua xabela chiu' dxuzúa na lue' lu dul-la, guchugu na, ne gudxú'una na zitu'. Nácadxa chawe' nite late' da naca na chee bel-la' dxen chiu', quézcala chu'u lataj ba xa' dute bel-la' dxen chiu'.



*Jesús dxusédenē' ca naca chee benne' dxexelé'ē  
nen zru'ulē'*

*(Mt. 19.9; Mr. 10.11-12; Lc. 16.18)*

<sup>31</sup> Na' gunná Jesús:

—Cá'anqueze gulenné' nédxutē: “Núteteze benne' dxexelé'ē nen zru'ulē', dxal-la' gunézruje' nu'ula na' tu xiche da dxulé'e na belexelé'ē.”

<sup>32</sup> Neda' dxapa' le'e, che tu benne' dxexelé'ē nen zru'ulē', na' nu'ula nigá quebe guzúalene' benne' xula, benne' chee nu'ula nigá dxuzúe' le' lu dul-la chee da dxichaj na xrba chee xel-la' nuchaga na' che tu benne' biu xula guchaga ne'e nen nu'ula na' bsan benne' chee' le'. Cá'anqueze le' dxune' dul-la nen nu'ula na'.

*Jesús dxusédenē' ca naca chee benne' dxucá'ana  
liē' xrtizre'*

<sup>33</sup> Na' gunná Jesús:

—Cá'anqueze ba bénele ca gulenná benne' gula ca', gulenné': “Quebe gucá'anu' cá'aze ca da nachebe lazru' nen dizra' bca'ana liu' lau Xránadxu Dios.”

<sup>34</sup> Neda' dxapa' le'e: Quebe dxal-la' guzétjale xabáa chee guca'ana lile dizra' chee, lawe' da naca na naga dxe' Dios,

<sup>35</sup> ne quebe guzétjale xezr la xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xezre chee Benne' Blau naque' Wenná Bea.

<sup>36</sup> Quebe guzétjale xíchajle chee guca'ana lile dizra' chee lawe' da quebe séquele gunle da chiche, ne da gasaj netú xicha xíchajle.

37 Le nnaze: “Awe’,” u le nnaze: “Cabí,” lawe' da gate tu benne' dxudadxe' chee' chee' da nigá, naca na chee' da xriwe'.

*Dxulé'e Jesús ca naca chee' nu benne' dxexebéaj lazre'*

*(Lc. 6.29-30)*

38 Na' gunná Jesús:

—Le'e ba bénele ca da gulenné' nédxute: “Che tu benne' cuéaje' xiaj lau', cá'anqueze gunu' chee', ne che cuéaje' lazxu', cá'anqueze gunu' chee'.”

39 Neda' dxapa' le'e, quebe tíl-lalele nu benne', san che tu benne' gu'e chala'a xragu', be' lataj gu'e xechalá'a xragu'.

40 Che tu benne' gaca xúzre'lene' lue', ne dxaca lazre' cue' zrau', be' lataj xúate' xicha chiu'.

41 Che dxulusebágu'e' lue' gu'u xua chee' tu cuéndau', bia na chupa cuenla.

42 Che núteteze benne' bi dxenabe' chiu', bnézruje' na, ne quebe guzagu' ca gunézruju' chee' nu benne' bi dxenabe' chite.

*Jesús dxusédené' ca dxal-la' zri'idxu benne' ca' dxeledábague' dxi'u*

*(Lc. 6.27-28, 32-36)*

43 Na' gunná Jesús:

—Cá'anqueze ba bénele ca da gulenné' nédxute: “Bzri'i le sa' ljwezru', ne gucuide benne' dxedábague' lue'.”

44 Neda' dxapa' le'e, le zri'i benne' ca' dx-eledábague' le'e. Le naba gaca chawe' chee' benne' dxelenné' cheele. Le gun da chawe' chee' benne' dxelecuídené' le'e. Le naba lau Dios gaca chawe'

chee benne' dxelenné' schanni' chee le ne dxeluné' chee le da calela.

<sup>45</sup> Che gunle caní gácale bi cheéqueze Xrale zue' xabáa, lawe' da dxun Le' dxusaní' gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu chee benne' chawe' ca', ne lu xezr la xu chee benne' ca' dxeluné' da calela.

<sup>46</sup> Che nazrí'ile tuze benne' zaj nazrí'ine' le'e, ¿ájazra na' dxezá lázrele quizruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'.

<sup>47</sup> Che le'e dxugápale diuzre tuze le sa' ljwézrele, ¿bizra da xrlátaje dxunle? Cá'anqueze dxelún benne' quebe zaj núnbe'e Dios.

<sup>48</sup> Le gaca benne' xrlátaje cáteze naca Xrale zue' xabáa, naque' xrlátaje.

## 6

*Dxulé'e Jesús ca naca da xrlátaje da dxelún bèneache*

<sup>1</sup> Caní gunná Jesús:

—Le guxúe xanne' cuínale chee quebe gunle da naca chee xel-la' benne' xudau' chee le lau bèneache chee xeelé'ene' na. Che ca'an dxunle, na' Xrale Dios zue' xabáa québequeze bi gunne' le'e.

<sup>2</sup> Chee le na', gate lue' dxácalenu' benne' dxelaxázejne', quebe guzennu' xúgute bèneache ca da dxunu', ca dxelún benne' ca' dxeluné' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxeluné' da caní chee xelenné' bèneache xrlátaje chee'. Da li dxapa' le'e, ba déqueze lazruj chee'.

<sup>3</sup> Gate lue' gunézruju' late' chee benne' dxelaxzrjene', beñ na luéze chee quebe neze le sa ljwezru'.

<sup>4</sup> Beñ da caní bagácheze, na' Xrau' Dios, Bénnea' dxelé'ene' ca da dxunu' bagácheze, Le' gunne' lazruj chiu'.

*Jesús dxusédenē' ca dxal-la' gundxu xel-la' dxuláwizra Dios*

*(Lc. 11.2-4)*

<sup>5</sup> Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxelune' xrlátaje cúzreze. Dxeledánene' dxelune' xel-la' dxuláwizra Dios zaj zeze' lu xu'u naga dxulucá'ana szren benne' judío ca' Dios, ne la neza, chee xeledé'e bénneache da dxelune'. Da li dxapa' le'e, ba déqueze lazruj chee'.

<sup>6</sup> Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu', na' bláwizra Dios guchálajlenu' Xrau' Dios zúalene' lue' naga zu' tuzu'. Nadxa Xrau' Dios, Bénnea' dxelé'ene' ca da dxunu' bagácheze, Le' xuzri'e chiu'.

<sup>7</sup> 'Gate dxuláwizru' Dios dxuchálajlenu' Le', quebe tuz ca da nneu' zánete' lasa ca dxelún benne' ca' quebe zaj núnbe'e Dios. Dxeléquene' wen Dios chee' lawe' da dxelenné'le'e.

<sup>8</sup> Quebe gunle ca dxelún benne' ca', lawe' da Xrale Dios ba nézquezne' ca da dxechínnele le'e nédxula ca za nábele na.

<sup>9</sup> Chee le' na', le guláwizra Dios nnale caní: Xrantu' Dios, zu' xabáa, gaca lá'azxaqueze Lau'.

<sup>10</sup> Gudá nna be'u lu xezr la xu nigá.

Gaca lu xezr la xu nigá ca dxaca lazru' Lue',  
cáteze dxaca xabáa.

11 Benna netu' da gáguntu' na'a.

12 Bnrite lau cheentu' ca naca da calela da bentu',  
ca netu' ba bnrite launtu' chee benne' belune'  
cheentu'  
da calela.

13 Quebe gu'u lataj nu gun zréaje netu',  
2 san bselá netu' lu na' da xriwe'.  
Naca chiu' gápaquezu' xel-la' dxenná bea,  
ne xel-la' waca,  
ne da xabáa chadía chacanna. ¡Ca'an gaca na!

14 'Che le'e gunite laule chee benne' belune'  
chee da calela, na' Xrale Dios zue' xabáa gunite  
lawe' cheele le'e.

15 Che le'e quebe gunite laule chee benne' ca',  
na' Xrale Dios quebe gunite láuqueze' cheele le'e ca  
naca dul-la da nabágale.

### *Jesús dxusédené' ca dxal-la' gundxu gubasa*

16 Na' gunná Jesús:

—Gate le'e dxunle gubasa, quebe guzúale bax-  
ache' laule ca dxelún benne' dxelune' xrlátaje  
cúzreze. Benne' caní dxelune' ca' chee xeelé'e  
bénneache le' dxelune' gubasa. Da li dxapa' le'e, ba  
déqueze lazruj chee benne' ca'.

17 Lue', gate dxunu' gubasa, bza xíchaju' chawe',  
ne gudibe lau',

18 chee quebe xeléquebe'e bénneache dxunu'  
gubasa. Tuze Xrau' Dios na', Bénnea' zúalene' lue'  
naga zu' tuzu', Le' dxennátequeze', na' gunné' da  
naca na chiu'.

*Jesús dxusédenē' chee da gunnía' chee xabáa*  
(Lc. 12.33-34)

19 Na' gunná Jesús:

—Quebe gutúpale da gunnía' lu xezr la xu nigá, naga guteba' na, ne da ca' dxelebía xi na, na' xelú'u gubán ne xeleanē' na.

20 Le'e, le gun da xrlátaje, da gaca na ca guzrá cháwele da gunnía' xabáa, naga quebe guteba' na, ne da ca' quebe bi xeleque na, na' québequeze xelú'u gubán chee xelegé'e na.

21 Naga nuzrale da gunnía' chee, na' zúaqueze lázrdaule.

*Jesús dxusédenē' chee tu xi' da xú'udxu*  
(Lc. 11.34-36)

22 Na' gunná Jesús:

—Xiaj laule zaj naca na ca tu xi' chee bel-la' dxen chee. Che xiaj laule zaj naca na chawe', dutē ca naca bel-la' dxen chee naxaní'.

23 Che xiaj laule quebe zaj naca na chawe', dutē ca naca bel-la' dxen chee nachul-la na. Cá'anqueze che xi' da xu'ule xexaca na tu da chul-la, chúl-lalē'dxa súaquezle.

*Jesús dxusédenē' chee Dios, ne chee da gunnía'*  
(Lc. 16.13)

24 Na' gunná Jesús:

—Netú benne' quebe séquene' guzúa cuine' lu na' chupa xranē', lawe' da wazré'e tu xranē' ne wazrí'ine' xetúe', u wéquene' ba lá'ana tu xranē' na' xetúe' guzúe' chalá'ala. Quebe séquele guzúa cuinle lu na' Dios, ne lu na' da gunnía'.

*Jesús dxusédene' ca dxun Dios, dxuxúe' xúgute bi chee' ca'*

*(Lc. 12.22-31)*

<sup>25</sup> Na' gunná Jesús:

—Chee le na' dxapa' le'e, quebe cue'le gunne xue ga sa' da gágule da xí'ajle chee gaca banle, ne ga sa' zra lánale da gácule. Zácadxa xel-la' nabán chee le ca da dxágule, ne zácadxa be\_l-la' dxen chee le ca zra lánale.

<sup>26</sup> Le nna'xque bxínnedu ca' dxeledaba' lu be'. Quebe dxelázaba'. Quebe dxelelápaba'. Quebe ga dxuluxuzrá cháweba' na. Xrale Dios zue' xabáa dx-unézruje' da dxeláguba'. Zácadxale le'e ca bxínnedu ca'.

<sup>27</sup> ¿Nuzra benne' ládujla le'e gaca gusetunna cuine' xate' lawe' da dxe'e gunne xue?

<sup>28</sup> ¿Bizr chee na' dxe'le le'e gunne xue chee zra lánale? Le nna'xque ca dxelegula xiaj ca' zaj ze le'e xixre'. Quebe dxelún na zrin, ne quebe dxelache na du.

<sup>29</sup> Dxapa' le'e, Salomón benne' wenná bea na' quebe gucu'e' ca da xrtan chee xiaj caní, na' le' gúta'le'e chee' da gunní'a.

<sup>30</sup> Che Dios dxudxene' xrtánle'e xiaj caní da ca' zaj zua na na'a le'e xixre', na' wxre xelexze na lu xi', quegá gundxe' da chawe' chee le'e, benne' québete ca dxeajlí lazre'.

<sup>31</sup> Chee le na', quebe cué'tecale gunne xue, nna'le: “¿Ga sa' da gágudxu? ¿Ga sa' da xí'ajdxu? ¿Ga sa' da gácudxu?”

<sup>32</sup> Chee da caní zaj dxe' gunne xue benne' quebe zaj núnbe'e Dios, san le'e, zua tu Xrale xabáa ba nézquezne' ca naca xúgute da dxechínnele.

<sup>33</sup> Zria laudxa cuele gunne xue chee nna bea Dios lu xichaj lázrdaule, ne chee gunle da xrlátaje da xezaca ba lazre' Dios, na' sile xúgutę da ca' dxechínnele.

<sup>34</sup> Quebe cuele gunne xue na'a da naca na chee wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

## 7

*Jesús dxusédenę chee benne' dxuchi'ę da dxun le sa' ljwezre'*

*(Lc. 6.37-38, 41-42)*

<sup>1</sup> Na' gunná Jesús:

—Quebe guchí'ale da dxelún le sa' ljwézrele chee quebe guchi'a Dios caní chee le'e.

<sup>2</sup> Le' guchi'ę chee le'e cáteze dxunle le'e chee le sa' ljwézrele, ne cáteze dxunle le'e chee le sa' ljwézrele, ca'an gun Dios nen le'e.

<sup>3</sup> ¿Bizr chee na' dxená'u bébedau' da xu'u xiaj lau le sa' ljwezru', ne quebe dxená'u da zrentę da xu'u na xiaj láuquezu' lue'?

<sup>4</sup> ¿Ájazra gunu' xu'u le sa' ljwezru': “Benna lataj xebéaja' bébedau' da xu'u xiaj lau”, che da zrendxa xu'u xiaj láuquezu' lue'?

<sup>5</sup> Lue', benne' dxun xrlátaje cúzreze. Bebéaj nedxu da zrentę da xu'u xiaj láuquezu', na' gaca le'enu' cháwedau' xebéaju' bébedau' da xu'u xiaj lau le sa' ljwezru'.

<sup>6</sup> Quebe gunézrujle da naca lá'azxa chee benne' dxelunę' ca dxelún becu' snia, checa xelexéchaję', ne xuluzúzruę' le'e. Quebe guzúale da zaca



cheeḷe lau benne' dxelune' ca dxelún cuche, dxu-  
luchuchuj dxululéajba' da dxugágule-ba'.

*Dxuchalaj Jesús ca dxal-la' nábadxu, ne xexílajdxu,  
ne nnedxu dxu'a dxa xu'u*

*(Lc. 11.9-13; 6.31)*

<sup>7</sup> Na' gunná Jesús:

—Le naba, na' Dios gunne' na cheeḷe. Le xilaj na,  
na' xezrélele na. Le nne dxu'a dxa xu'u, na' sáluje'  
cheeḷe.

<sup>8</sup> Le gun caní lawe' da benne' bi dxenabe', dx-  
ezi'e na. Benne' bi dxexílaje', dxeajxraque' na,  
na' benne' dxenné' dxu'a dxa xu'u, zua nu benne'  
sáluje' chee'.

<sup>9</sup> Netule le'e quebe gunézrujle zrí'inele tu xiaj che  
lebe' dxenábabe' le'e tu xeta.

<sup>10</sup> Quebe gunézrujle zrí'inele tu bela' snia che  
lebe' dxenábabe' le'e tu bela.

<sup>11</sup> Che le'e, benne' wen da caleḷa, nézele  
gunézrujle zrí'inele da naca na chawe', da cháwedxa  
gunna Xrale Dios zua xabáa, gunne' da chawe'  
chee benne' bi dxenábene' Le'.

<sup>12</sup> Le gun chee le sa' ljuwézrele ca dxaca lázrele  
le'e xelún lebe' cheeḷe. Da nigá naca da nadxixruj  
bea na Moisés, ne da dxenná na lu xiche naga  
naxúaj da gulenná benne' ca' buluchálaje' waláz  
chee Dios.

*Jesús dxusédené' chee dxa xu'u lechide'*

*(Lc. 13.24)*

<sup>13</sup> Na' gunná Jesús:

—Le chu'u lu dxa xu'u lechide'. Dxa xu'u laga,  
ne neza xu zaj naca naga zjaca benne' xelebía xi'e,  
na' benne' zante zjaque' na'.

<sup>14</sup> Dxa xu'u lechide', ne neza lase zaj naca naga zjaca benne' xelezí'ē xel-la' nabán da zeajlí canna, na' bábaze benne' dxelexezrelne' na.

*Naca bea tu xaga ne chee da zixre dxebía na*  
(Lc. 6.43-44)

<sup>15</sup> Na' gunná Jesús:

—Le guxúe cuínale chee benne' wēn lazre' ca', benne' dxelenné' zaj naque' benne' dxuluchálaje' waláz chee Dios. Benne' caní zá'aque' naga zrале le'e, zaj nun cuine' ca tu benne' dxexruj lazre' ca naca tu zríla'dau', san lu xichaj lázrdawe' zaj naque' snia ca tu becu' xi'a.

<sup>16</sup> Le'e xúnbeale le' ne chee da dxelune'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga higo quebe xuchíbedxu na lu xeche' ga'.

<sup>17</sup> Ca'an naca, xúgute xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'.

<sup>18</sup> Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'.

<sup>19</sup> Xúgute xaga zrinnaj welechugue na, na' xelezxe na lu xi'.

<sup>20</sup> Ca'an naca, le'e xúnbeale benne' ca' ne chee da ca' dxelune'.

*Quegá xúgute benne' xelu'e naga dxenná bea Dios xabáa*  
(Lc. 13.25-27)

<sup>21</sup> Na' gunná Jesús:

—Quebe xelu'e naga dxenná bea Dios xabáa xugute benne' ca' dxelé'e neda': “Xrana', Xrana'.” Welú'u tuze benne' ca' dxelune' ca da dxaca lazre' Dios zue' xabáa.

22 Ca zrin zra na', benne' zante xelé'e neda': "Xránantu', Xránantu', netu' bchálajntu' ne chee Lau' Lue', ne bchínentu' Lau' bebéajntu' be' xriwe' ca', ne nen Lau' Lue' bēnle'entu' xel-la' waca ca' chee xabáa."

23 Nadxa neda' xápaqueza' benne' ca': "Quebe núnbe'a le'e. Le cuasa cuita' neda', le'e, ba bēnle da calela."

*Jesús dxusédenē' chee chupa lane xu'u*

*(Lc. 6.47-49; Mr. 1.22)*

24 Na' gunná Jesús:

—Bénnea' dxenne' chia', ne dxune' ca da dxennía', naque' ca tu benne' naxéajni'iqueze', benne' bēne' tu lizre' lu xiaj xre.

25 Guca xiuj, na' bdxuaj guba'u, ne guxasa be' bdunu' chee xuluzría xi na xu'u na', san quebe guzré'e na lawe' da xu'u lane na lu xiaj xre.

26 Bénnea' quebe dxuzé nague' chia', ne quebe dxune' ca da dxennía', naque' ca tu benne' xala, benne' bēne' tu lizre' lu xu dxeze.

27 Guca xiuj, na' bdxuaj guba'u ne guxasa be' bdunu' chee xuluzría xi na xu'u na', na' chadite guzré'e na, ne guzría xite na.

28 Ca bexuzre bchalaj Jesús, na' belexebanne benne' ca' ca naca da bsédenē',

29 lawe' da dxusédenē' benne' ca' ca tu benne' nape' xel-la' dxenná bea, ne quegá ca dxelún benne' ca' dxuluxuzájle'e da nadxixruj bea Dios.

## 8

*Dxexún Jesús tu benne' dxuzru lu xpele'*

*(Mr. 1.40-45; Lc. 5.12-16)*

1 Gate bexetaj Jesús lu xi'a na', benne' zante zjácáleñe' Le'.

2 Na' bzrin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

3 Nadxa Jesús guxrúa ne'e bénnea'. Dxe'e le':

—Dxaca lazra'. Na'a dxexuna' lue'.

Ca gunné' caní, benne' we' na' bexácaté' ca naca xízrawe' chee'.

4 Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxelé'e cuiñu' lau bxruze, ne xeajnezruj guna' ca da dxenná bea lu da bdxixruj be'e Moisés, chee xelexé'e benne' ca' ba bexacu' na'a.

*Dxexún Jesús bi wen zrin chee tu benne' dxenná be'e lu wedil-la  
(Lc. 7.1-10)*

5 Ca bexú'u Jesús lu xezre Capernaum, na' bzrin lawe' tu benne' Roma, benne' dxenná be'ene' benne' ca' dxjaque' wedil-la, na' guta' xuené' Le',

6 dxe'e Le':

—Xran, bi wen zrin chia' debe' lizra'. Naxrú' unebe' bine, ne dxezácale' ebe'.

7 Jesús dxe'e le':

—Wazá'a xexuna'-be'.

8 Benne' dxenná be'e na' gunné':

—Xran, quebe naca chia' chu'u lizra'. Cun gunneze, na' xexaca bi wen zrin chia'.

9 Caní waca gunu' lawe' da zua benne' dxenná bé'ene' neda', ne cá' anqueze neda' dxenná be'eda' benne' ca' dxjaque' wedil-la. Gate dxapa' tube': “Guxíaj”, na' dxéajbe'. Na' gate dxapa' bi xula:

“Gudá”, na' dxídabe'. Na' gate dxuchíneda' bi w<sub>en</sub> zrin chia' chee bi da gunbe', na' dxunbe' na.

<sup>10</sup> Gate bene Jesús da nigá, bebánene', na' guzre' benne' ca' zjácálene' Le':

—Da li dxapa' le'e, ládujla benne' Israel quebe nu ne xezrelda', benne' dxéajle'e chia' ca dxun benne' nigá.

<sup>11</sup> Neda' dxapa' le'e, zá'aca benne' zante chala'a naga dxalaj gubizra, ne xechalá'ala naga dxebía gubizra, na' xelebé'e tu zren xelawe' nen Abraham, ne Isaac, ne Jacob naga dxenná bea Dios xabáa.

<sup>12</sup> Benne' ca' gucá'a zga'ale Dios chee xelu'e naga dxenná bea Le', guzale' benne' ca' lataj chul-la naga xelebezre', ne xeláguxa'ate lazxe'.

<sup>13</sup> Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácatę bi w<sub>en</sub> zrin chee'.

### *Dxexún Jesús xrna zru'ule Pedro*

*(Mr. 1.29-31; Lc. 4.38-39)*

<sup>14</sup> Guxíaj Jesús lizre Pedro, na' blé'ene' xrna zru'ule' de' lu da'a, xu'e da la.

<sup>15</sup> Xeajté' ne'e, na' bedxúaj da la da xu'e. Nadxa nu'ula na' guxase', ne guzú lawe' dxusení'e da xelagu benne' ca'.

### *Dxexún Jesús benne' zante benne' we'*

*(Mr. 1.32-34; Lc. 4.40-41)*

<sup>16</sup> Ca guzría gubizra, na' belezrín benne' zante lau Jesús, zaj naché'e benne' zaj xu'e be' xriwe' ca'. Nen dízra'ze da gunná Jesús, bebéaje' be' xriwe' ca', ne bexune' xúgutę benne' we' ca'.

17 Da nigá guca na ca da gunná Isaías, benne' bchálaje' waláz chee Dios, gunné': "Le' bequē'e xízrawe' ca' da nápadxu, ne gubague' ca da dx- ezácadxu."

*Dxelaca lazre' benne' chjácalene' Jesús*

*(Lc. 9.57-62)*

18 Gate na' ble'e Jesús benne' zante zaj naxéchaje' Le', na' guzre' benne' ca' dxusédene' gulelague' xechalá'a nísadau' tu lu da dxedá lawe' nisa.

19 Na' bzrin lau Jesús tu benne' dxuxuzájle'e da bdxixruj be'e Dios, na' dxe'e Le':

—Benne' Wesede, dxaca lazra' sálēna' Lue' gáteteze chéaju'.

20 Na' Jesús guzre' le':

—Beza' zaj zua bluaj cheeba', na' bxinne zaj zria xrú'uneba', san neda', Benne' Gulje' Bénneache, ne naga xrua xíchaja' quebe ga zua.

21 Bzrin xetú benne' naque' benne' ba bsédequeze Jesús, na' guzre' Le':

—Xran, benna neda' lataj xexá'a nedxu chee cheajxecacha' xra'.

22 Nadxa Jesús guzre' le':

—Gudálen neda'. Be' lataj benne' gate ca' xulu- cache ljwezre'.

*Dxebeque zri Jesús be' bdunu', ne xeajxruza chee nísadau'*

*(Mr. 4.35-41; Lc. 8.22-25)*

23 Nadxa guxú'u Jesús lu da dxedá lawe' nísadau', na' benne' ca' dxusédene' belune' Le' tu zren.

24 Na' guzú lau dxaca tu be' bdunu' lawe' nísadau', na' xeajxruza chee nísadau' guxú'u na lu da dxedá lawe' nísadau' na', dxácatē dxase Jesús.

25 Nadxa benne' ca' dxusédenē' bulusebanē' Le', na' dxelē'e Le':

—Xránantu'. Bselá netu'. Ba dxázentu' lu nisa.

26 Jesús guzre' le':

—¿Bizr chee na' dxezrébele'e? Nácale benne' látega dxelejílí lázre' Dios.

Nadxa guxasa Jesús. Gudil-le' be' bdunu', ne nísadau', na' la belebé zrite na.

27 Benne' ca' belexebánene', gulenné':

—¿Núzraqueze benne' nigá? Dxuluzúa be', ne nísadau' dizra' chee'.

*Benne' Gadara zaj xu'e be' xriwe'*

*(Mr. 5.1-20; Lc. 8.26-39)*

28 Gate bezrín Jesús xechalá'a nísadau' na' lu xezr la xu chee benne' Gadara, na' chupa benne' biu belexedxúaje' lu bluaj chee benne' gate, na' belezrine' lau Jesús. Dxúpate benne' ca' zaj xu'e be' xriwe', ne zaj naque' benne' sníale'e, na' netú benne' quebe dxexázrene' xedé'e la neza na'.

29 Na' gulezú lawe' dxelebézrexe'e. Dxelenné':

—¿Bizr chee na' za'u naga zúantu', Jesús, Zri'ine Dios? ¿Za'u nigá chee gusaca zi'u netu', ne quebe ne zrin zra?

30 Tu chi na' zra tu cue' cuche dxeláguba'.

31 Be' xriwe' ca' gulata' xue na Jesús, gulenná na:

—Che Lue' xebéaju' netu' nigá, benna lataj chea-jchú'untu' lu cuche ca'.

32 Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgute

cuhe ca' beledázruba' tu dxu'a xi'a zren, na' xea-jlecházeba' lu nísadau' naga gulázeba' nisa, na' guláteba'.

<sup>33</sup> Benne' ca' buluxúe'-ba' belezrebe', na' besá'aca chégüe', ne belexezrine' lu xezre. Buluchálaje' ca guca xúgute da caní, ne ca guca chee benne' ca', belexedxúaj be' xriwe' zaj xu'e.

<sup>34</sup> Nadxa xúgute benne' zaj zre'e lu xezre na' beledxúaje', ne belezrine' naga zua Jesús. Na' ca beledé'ene' Le', gulata' xuene' Le' xezé'e lu xezr la xu chee'.

## 9

### *Dxexún Jesús tu benne' zaj zua zri ni'a ne'e* (Mr. 2.1-12; Lc. 5.17-26)

<sup>1</sup> Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'.

<sup>2</sup> Na' bedajlegu'e tu benne' biu lau Le', zaj zua zri ni'a ne'e, zaj naxrúe' benne' na' tu lu ta'a blaga'. Gate ble'e Jesús ca dxeléajle'e chee', na' gunné', dxe'e benne' we':

—Ben dipa lazru', zrí'ina'dau'. Dul-la chiu' dxu-nite lawa'.

<sup>3</sup> Nadxa bal-la benne' dxuluxuzájle'e da nadx-ixruj bea Dios gulenné' lu xichaj lázrdawe': “Benne' nigá dxucá'ana dítajé' Dios nen xrtizre'.”

<sup>4</sup> Lawe' da neze Jesús ca gulenné' lu xichaj lázrdawe', na' dxe'e benne' ca', gunné':

—¿Bizr chee na' dxennale caní lu xichaj lázrdaule?



<sup>5</sup> ¿Bízrala da quebe nácadxa stebe guna'? ¿Nnia': "Dul-la chiu' ba bnite lawa'", u che nnia': "Bexasa, guzá?"

<sup>6</sup> Chee le na' gulé'eda' le'e neda', Benne' Gulje' Bénneache, napa' xel-la' dxenná bea lu xezr la xu nigá gunite lawa' dul-la.

Nadxa dxē'e benne' zaj zua zri ni'a ne'e, gunné':  
—Bexasa. Becá'a ta'a chiu'. Bexíaj lizru'.

<sup>7</sup> Bénnea' zaj zua zri ni'a ne'e bexase', na' zexíajte' lizre'.

<sup>8</sup> Gate belelé'e bénneache da nigá, na' belezrebe', ne belúe lá'ane' Dios lawe' ba bnézruje' xel-la' waca caní chee bénneache.

*Jesús dxuláwizre' Mateo*

*(Mr. 2.13-17; Lc. 5.27-32)*

<sup>9</sup> Ca bezá Jesús na', na' blé'ene' tu benne' biu le' Mateo, dxē'e lataj naga dxuchízruje' waláz chee xezre Roma, na' dxē'e le', gunné':

6 —Ben neda' tuze.

Nadxa Mateo nigá guxase' zéajlene' Jesús.

<sup>10</sup> Gate na' dxē' Jesús dxawe' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawe' cuita Jesús, ne benne' ca' dxusédenē'.

<sup>11</sup> Benne' xudau' fariseo ca', gate belelé'ene' da nigá, dxelé'e benne' ca' dxusede Jesús, gulenné':

—¿Bizr chee na' Benne' dxusédenē' le'e dxágulene' benne' wechizruj ca', ne benne' wen da zrinnaj ca'?

<sup>12</sup> Jesús benne' da nigá, na' dxē'e benne' ca', gunné':

—Quebe dxelechine benne' chawe' nu benne' dxexune' bénneache. Benne' we' dxelechínene' le'.

13 Le chjaca, le cheajsede ca da dxenná da naxúaj na lu xiche chee Dios, dxenné': "Neda' dxaca lazra' xexache lázrele le sa' ljwézrele, quegá gútele be xíxre'du ca' lu cugu chia'." Bla' neda', quegá chee guláwizra' benne' xrlátaje. Dxuláwizra' benne' dul-la chee xelexebí'i lazre'.

*Jesús dxusédené' ca naca chee gubasa*  
(Mr. 2.18-22; Lc. 5.33-39)

14 Nadxa belezrín lau Jesús benne' ca' dxeledálene' Juan, bénnea' dxuchúe' bénneache nisa, na' gulenábené' Le':

—¿Bizr chee na' quebe dxelún gubasa benne' dxusédenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

15 Na' Jesús dxé'e benne' ca', gunné':

—¿Ájala chee na' xelezúa ba xácheze benne' zaj zue' laní chee wechaga na' dxácate zua benne' wechaga na' nen le'? Wazrín zra gate dua benne' wechaga na'. Nadxa xelúnqueze' gubasa.

16 'Quegá nu dxudá tu ladxe' cube le'e tu zra lánadxu gula, lawe' da gate cheajxedxé' da cube na', ne xrube xu na da gula na', na' dxézadxa da gula na'.

17 Cá'anqueze quebe nu benne' que'e xrise uva wal-la cube lu bzude xide gula lawe' da che ca'an gune', gate cue' chi'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Chee le na' dxal-la' ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpaté na.

Bchalaj Jesús da caní ca naca chee benne' ca' dxelezí' lu ne'e xrtizre'.

*Dxexún Jesús bi nu'ula chee Jairo, ne nu'ula',  
xeajté'ē zra lana Jesús*

*(Mr. 5.21-43; Lc. 8.40-56)*

18 Dxácatē na' dxuchalaj Jesús da nigá, na' bzrin tu benne' xíchajē chee benne' judío ca', na' bzu zribē' lau Jesús, dxenné':

—Bi nu'ula chia' za gútetēbe'. Che Lue' xidu' ne guzé na'u lēbe', wexaca banbe'.

19 Na' guxasa Jesús, guxíajlēne' lē' nen benne' ca' dxusédene'.

20 Nadxa bzrin tu nu'ula wē' cúzrula Jesús, ba naca chazrinnu iza dxé'ene' tu wē' dxaque dxen, na' xeajté'ē zra lana Jesús.

21 Dxenné' lu xichaj lázrdawē': “Che cheajtaza' zra lanē', na' xexaca'.”

22 Jesús guxéchajē', guné'ē nu'ula', na' dxē'ē lē':

—Ben dipa lazru', zrí'ina'dau'. Bache bexacu' lawe' da dxéajlē'u chia'.

La bexácatē nu'ula na'.

23 Gate na' bzrin Jesús lizre benne' xíchajē chee benne' judío ca', na' blé'ene' zaj zra' benne' wila xulucache' bi nu'ula na', ne benne' zaj zre'ē dxelunē' zralaj.

24 Gunná Jesús, dxē'ē benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrizre' chee'.

25 Gudé bebéajē' benne' ca', na' guxú'u Jesús, ne bēxrue' na' bi nu'ula na', na' guxásabe'.

26 Du ca naca xezre ca' bzriluj dizra' chee da ben Jesús.

*Dxexún Jesús chupa benne' la chul-la*

27 Ca bedxúaj Jesús na', na' chupa benne' xjaque' cuzru Le', dxelenné' zizraj:

—Bexache lazre' netu', Lue', Zri'ine David.

28 Ca guxú'u Jesús lu xu'u naga zúaquezē', na' benne' la chul-la caní gulebigue' lau Le', na' Jesús guzre' benne' ca':

—¿Dxéajlele wazéqueda' xexuna' le'e'?

Na' gulé'ē Le':

—Awe', Xran.

29 Nadxa Jesús gudane' xiaj lau benne' ca', dxenné':

—Gaca chee'le ca dxéajlele.

30 Belexaca xiaj lawē'. Nadxa Jesús gunné' xuene' benne' ca', gunné':

—Le guxúe xanne' chee' quebe nu neze da nigá.

31 Gate beledxúaje', na' buluchálaje' du ca naca xezre ca' ca da ben Jesús chee'.

*Dxexún Jesús tu benne' quebe dxaca nnie'*

32 Ca bezá' Jesús nen benne' ca', na' belezrín balla benne' zaj naché'ē tu benne' biu quebe dxaca nnie', benne' xu'ē be' xriwē'.

33 Cáteze bebéaj Jesús be' xriwē' nigá, na' benne' quebe dxaca nnie' bezú lawē' dxuchálaje'. Na' benne' ca' belexebánele'ē, dxelenné':

—Cabata' ne lé'edxu gaca caní ládujla benne' Israel ca'.

34 Benne' xudau' fariseo ca' gulenné':

—Benne' nigá dxebéaje' be' xriwē', dxuchínene' xel-la' waca chee' da xriwē', da na' dxenná be'e na be' xriwē' ca'.

*Dxexache lazre' Jesús bēnneache ca'*

<sup>35</sup> Gudé Jesús tu tu xezre zren, ne tu tu xézredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. Gulu'e lban chee dizra' chawe' ca nna bea Dios, ne bexunte' bèneache zaj nape' tu tu cue' xízrawe' ca da dxelezaque'.

<sup>36</sup> Gate ble'e Jesús bèneache ca', na' bexache lazre' le' lawe' da zaj zre'e xácheze', ne dxelecuán lazre'. Zaj naque' ca zri'la' ca' quebe zua benne' guxúe'-ba'.

<sup>37</sup> Nadxa guzre' benne' ca' dxusédene':

—Da li, da zrente de da lápadxu, na' bábaze benne' wen zrin zaj zre'e.

<sup>38</sup> Chee le na' le naba lau Xrana lina nigá, sel-le' benne' wen zrin xe'lelape' lina chee'.

## 10

*Dxecá'a Jesús chazrinnu benne' xelaque' gubáz chee'*

*(Mr. 3.13-19; Lc. 6.12-16)*

<sup>1</sup> Nadxa Jesús bláwizre' chazrinnu benne' ca' dxusédene', na' bnézruje' le' xel-la' dxenná bea chee' xe'lexebéaje' be' xriwe' ca', ne chee' xe'lexex-une' bèneache zaj xu'e tu tu cue' xízrawe' ca da dxelezaque'.

<sup>2</sup> Caní zaj le chazrinnu benne' gubáz ca' chee Jesús:

Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zaj le' Jacobo, ne Juan, benne' zaj naque' zri'ine Zebedeo.

<sup>3</sup> Xezícala benne' ca' zaj le' Felipe, ne Bartolomé, ne Tomás.

Xetue' le' Mateo, benne' wechizruj chee' xezre.

Xetúe' le' Jacobo, zri'ine Alfeo.

Xetúe' le' Lebeo, benne' léqueze' Tadeo.

<sup>4</sup> Xetúe' le' Simón, benne' dxe'e gunne xue chee xezr la xu Israel.

Xetúe' le' Judas Iscariote, bénnea' gudée' Jesús lu na' benne' dxeledábague' Le'.

*Dxesel-la Jesús benne' gubáz chee' ca' chea-jlezenne' bénneache xrtizre'e*  
(Mr. 6.7-13; Lc. 9.1-6)

<sup>5</sup> Nadxa gusel-la Jesús benne' chazrinnu caní. Guzre' le':

—Quebe cheajle naga zaj zra' benne' quebe zaj naque' judío, ne quebe chu'ule xezre ca' zaj nababa Samaria.

<sup>6</sup> Le hjaca naga zaj zra' benne' Israel zaj naque' ca zrila' zaj naníteba'.

<sup>7</sup> Le hjaca cu'ule lban, xe'le bénneache ba bzrin gáguze zra nna bea Dios lu xezr la xu nigá.

<sup>8</sup> Le xexún benne' zaj xu'e we' guzru', ne benne' bila xízrawe' dxelé'ene'. Le gusebán benne' gate. Le xebéaj be' xriwe' da zaj xu'u bénneache. Cá'aze guzile xel-la' dxenná bea nigá, na' cá'aze le guchine na, quebe bi sile.

<sup>9</sup> Quebe gúale dumí oro, ne dumí plata, ne dumí lase.

<sup>10</sup> Quebe gúale xixruj xeta da gágule la neza. Quebe gúale xetú cue' zra lánale, ne zrelale, ne xaga da gúxrule. Benne' wen zrin wazrúequeze' da gawe'.

<sup>11</sup> 'Gate na' zrinle le'e tu xezre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra xeza'ale na'.

12 Gate na' chu'ule lu xu'u na', le xe bēnea' naca lizre' na': "Xela dxebeza zri lazre' suale na le'e."

13 Che benne' ca' zaj naca chee' xelezí'e xel-la' ba lá'ana caní, le gucá'ana cá'aze na. Che quebe zaj naca chee' xelezí'e da nigá, na' quebe gata' chee'.

14 Che quebe lataj dxelune' le'e, ne quebe dxelenne' chee'le, le xedxúaj lu xu'u na' u lu xezre na', na' le xebibe bxrtedu na' zria ní'ale.

15 Da li dxapa' le'e, ca zrin zra guchi'a Dios, Dios gundxe' da ba xa' chee' benne' xezre na' quez ca da gunē' chee' benne' Sodoma, ne benne' Gomorra, xezre ca' guzríá xi'e.

### *Xelebé nawe' bi ca' chee' Jesús*

16 Na' gunná Jesús:

—Le na' xque nigá. Neda' dxesel-la' le'e, gácale ca zrila' zaj zraba' ládujla becu' xi'a ca'. Chee' le na', le gaca sina ca zaj naca be'la', san le gaca dxexruj lazre' ca zaj naca bgúgudu ca'.

17 Le guxúe cuínale. Zaj zra' benne' xuludé'e le'e lu na' benne' xu'u lawe', ne xuluzálajē' le'e lu xu'u naga dxulucá'ana szrene' Dios.

18 Cá'anqueze welechē'e le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío.

19 Gate na' xuludé'e le'e lu na' benne' dxuchi'a da dxaca, quebe gunné xue cue'le ca da nnale u ájala guchálajle, lawe' da gate zrin zra guchálajle, Dios gunne' ca da guchálajle.

20 Quegá le'eze guchálajle, lawe' da Be' Lá'azxa chee' Dios guchálajē' lu dxú'ale.

21 'Xuludé bēneache benne' bíchequeze' lu na' benne' xelútiē' le'. Cá'anqueze xra xrna xuludéē' zrí'ine', na' zrí'ine' ca' xeledábagabe' xra xrnáquezebe' chee xelátie'.

22 Xúgute bēneache xelezré'e le'e lawe' da nácale chia' neda', san bēnea' guxru chache' dizra' chee Dios ca zrin zra cheajsé chee', la bēnea'.

23 Gate xelebé nawē' le'e tu xezre, le xuzrunnuj xetú xezre. Da li neda', Benne' Gulje' Bēneache, dxapa' le'e, xida' nédxula ca quebe ne tache tale xúgute xezre chee benne' Israel.

24 'Netú benne' quebe naque' szrendxa ca benne' dxusédene' le'. Cá'anqueze netú benne' wēn zrin quebe naque' szrendxa ca xrane'.

25 Tu benne' dxusēde dxal-la' gun zi' lazre' gaque' ca naca benne' dxusédene' le', na' benne' wēn zrin dxal-la' gun zi' lazre' gaque' ca naca xrane'. Che benne' naque' xrane xu'u dxelé'e le' Beelzebú, da xriwē', chezradxa xelenné' chee bi chee' ca'.

*¿Núzraqueze dxal-la' zrēbedxu?  
(Lc. 12.2-9)*

26 Na' gunná Jesús:

—Chee le na', quebe zrēbele bēneache. Xúgute da bagácheze gaca béaqueze na, na' xúgute da dxelaca ga nagache gul'e láuqueze na.

27 Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelén xúgute benne'.

28 Quebe zrēbele benne' xelútiē' beł-la' dxen chee. Quebe xelezéquene' xelútiē' bēne'du xu'ule. Le zrebe Dios. Le' dxezéquene' guzría xi'e



beł-la' dxen cheełe, ne bėnne'du xu'ule lu lataj ba xa'.

<sup>29</sup> 'Dxelúti'e chupa bxínnedu ca' nen tu dumídau'. Netuba' quebe gáteba' chee quebe ne güe lataj Xrale.

<sup>30</sup> Cá'anqueze xicha xíchajle, xúgute na zaj nababa na.

<sup>31</sup> Chee le na', quebe zrėbele. Zácadxale le'e quézcala be zan bxínnedu ca'.

*Dxal-la' xechébedxu nácadxu chee Jesucristo  
(Lc. 12.8-9)*

<sup>32</sup> Na' gunná Jesús:

—Xúgute benne' ca' dxelexechebe' zaj naque' chia' neda' lau bėnneache, cá'anqueze neda' wechébequeza' zaj naque' chia' neda' lau Xra' zue' xabáa.

<sup>33</sup> Benne' ca' quebe dxelexechebe' zaj naque' chia' lau bėnneache, néda'queza' québequeze xechėba' zaj naque' chia' lau Xra' zue' xabáa.

*Da naca Jesús naca na tu da dxun na chupa la'a  
bėnneache  
(Lc. 12.51-53; 14.26-27)*

<sup>34</sup> Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' ládujla bėnneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la.

<sup>35</sup> Bla'a neda' chee guna' tábaga' tu benne' xre', ne chee guna' tábaga' tu bi nu'ula xrnabe', ne chee guna' tábaga' tu zru'a lizre' tau zrí'ine'.

<sup>36</sup> Ca'an gaca, tu tu benne' tíl-lale xrtía ljwezre' le'.

37 'Che tu benne' nazrí'idxene' xra xrne'e quezca neda', quebe naca chee' gaque' chia', na' che nazrí'idxene' bi chee' ca' quezca neda', quebe naca chee' gaque' chia'.

38 Che tu benne' quebe gun cuine' ca tu benne' zéajte'e le'e xaga béguaj, ne gune' neda' tuze, quebe naca chee' gaque' chia'.

39 Benne' dxaca lazre' gapa chi'e xel-la' nabán chee' gunitie' na. Bénnea' zúatequeze gudé'e xel-la' nabán chee' ne chia' neda', guselé' xel-la' nabán chee'.

*Da gunna Dios dxi'u*

*(Mr. 9.41)*

40 Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bénnea' dxape' neda' ba lá'ana, dxápaqueze' ba lá'ana Dios, Bénnea' gusel-le' neda'.

41 Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bénnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'.

42 Núteteze benne' gunézruje' tu zriga' nisa zaga da xi'aj tu bidu caní lawe' da naque' chia' neda', da líqueze wazi'e da gunezruj Dios le'.

## 11

*Dxelezcín benne' ca' gusel-la Juan lau Jesús*

*(Lc. 7.18-35)*

<sup>1</sup> Gate bexuzre Jesús bchálajl̥ne' b̥enneache, na' bchálajl̥ne' chazrinnu benne' ca' dxusédene'. Bezé'e na' chee cheajsédene', ne cheajchálaj̥e' lban xúgute x̥ezre ca' lu x̥ezr la xu na'.

<sup>2</sup> Juan, b̥ennea' bchue' b̥enneache nisa, xu'e lizre xia, na' benne' ca' naca da dxun Cristo. Nadxa gusel-le' chupa benne' ca' dxeledál̥ne' l̥e' lau Jesús.

<sup>3</sup> Benne' chupe' caní buluchebe' Jesús:

—¿Nacu' Lue' Cristo, B̥ennea' dxal-la' xide', u che dxal-la' cuézantu' xelá' xetú benne'?

<sup>4</sup> Na' bechebe Jesús:

—Le chjaca cheajézrele Juan da caní dxelé'ele, ne da dxenle.

<sup>5</sup> Le x̥e'e ca dxaca, dxelexelé'e benne' gulaque' la chul-la. Dxelexedá benne' gulezúa zri ni'a ne'e. Belexexaca benne' gulezaque' we' guzru', ne belexexaca ban benne' ca' gulati̥e'. Benne' xache' ca' dxelenne' dizra' chawe' chee Dios.

<sup>6</sup> Ba neza zrente naca na chee b̥ennea' quebe xucuán lazre' sál̥ne' neda'.

<sup>7</sup> Ca besí'aca benne' chupa ca', na' guzú lau Jesús dxuchálajl̥ne' benne' zaj zre'e na' ca naca chee Juan. Dxenné':

—¿Bizra xeajinna'le le'e l̥e'e xixre' na'? ¿Xeajinna'le tu xia da dxuxrize be'?

<sup>8</sup> Che cabí, ¿bizra xeajinna'le na'? ¿Xeajinna'le tu benne' nacie' zra lane' da zaca? Nézquezle benne' ca' zaj nácue' ladxe' zaca, lizre benne' dxelenná be'e zaj zra' benne' caní.

<sup>9</sup> ¿Bízraqueze xeajinna'le? ¿Xeajinna'le tu benne' dxuchálaj̥e' waláz chee Dios? Awe'. Ca'an guca.

Bénnea' ble'ele na' nácadxe' blau ca tu benne' dxuchálaje' waláz chee Dios.

<sup>10</sup> Lu xiche chee Dios naxúaj na ca naca chee Juan na'. Dxenná na: Neda' dxesel-la' benne' gubáz chia' nédxula ca Lue', chee gucueze' neza naga teu'.

<sup>11</sup> Da li dxapa' le'e, ládujla xúgute' bénneache quebe nu chilá' benne' nácadxe' blau ca naca Juan, bénnea' bchue' bénneache nisa. Naga dxenná bea Dios, bénnea' nácadxe' benne' dxexruj lazre' nácadxe' blau ca naca Juan na'.

<sup>12</sup> 'Ca lu zra bla' Juan, bénnea' bchue' bénneache nisa, bzrinte' na'a zra, zaj zra' benne' dxelune' zi' lazre' xelu'e naga dxenná bea Dios xabáa, na' benne' dxelune' zi' lazre' dxelezué'ene' na.

<sup>13</sup> Ca da bzuaj Moisés lu xiche chee da nadxixruj bea na, ne ca gulenná xúgute' benne' buluchálaje' waláz chee Dios, dxuchalaj na ca naca chee xel-la' dxenná bea chee Dios, bzrinte' ca bla' Juan na'.

<sup>14</sup> Che le'e dxaca lázrele chéajlele da nigá, Juan na' naque' Elías, bénnea' bchálaje' waláz chee Dios gate nate, na' dxal-la' xelé'e chee guchálaje' waláz chee Dios.

<sup>15</sup> Che zua nágale, le xen da nigá.

<sup>16</sup> '¿Ájazra zaj naca benne' zaj zre'e na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxellenēbe' zizraj, dxelé' ljuwézrebe' ca':

<sup>17</sup> "Bcuézrentu' bchiuj san quebe bxá'ale le'e. Billa xáchentú' san quebe gudxézrele."

<sup>18</sup> Caní zaj naque' lawe' da bla' Juan, quebe dxawe', ne quebe dxí'aje' da zaca, na' le'e dxennale xu'e be' xriwe'.

19 Nadxa bla' neda', Benne' Gulje' Bénneache, dx-awa', ne dxi'aja', na' dxennale naca' neda' benne' wagu xrata, ne benne' dxi'aj, ne ljwezre benne' dul-la, ne benne' wechizruj chee Roma. Naca bea nu benne' nape' xel-la' sina chee Dios ne chee da dxun bènnea'.

*Ca gaca chee bènneache quebe dxuluzúe' xrtizra' Dios*  
(Lc. 10.13-15)

20 Nadxa guzú lau Jesús dxedil-le' bènneache chee xezre ca' naga bene' xel-la' waca ca' chee xabáa, lawe' da quebe belexebí'i lazre' benne' zaj zre'e na'. Na' gunné':

21 —Baxache' nácale le'e zrале xezre Corazín. Baxache' nácale le'e zrале xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrente ba zeaj gulácue' zra lane' tuzruj, ne gulegú'e de xíchaje' da zaj naca bea na belexebí'i lazre'.

22 Neda' dxapa' le'e, lu zra guchi'a Dios, gundxe' da ba xa' chee quez ca da ba xa' guné' chee benne' Tiro, ne benne' Sidón.

23 Le'e zrале xezre Capernaum, ¿dxéquele Dios wechise' le'e xabáa? Dios gudée' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'anatequeze xezre na' lu zra na'a zra.

24 Neda' dxapa' le'e, lu zra guchi'a Dios, gundxe' da ba xa' chee quez ca guné' da ba xa' chee benne' Sodoma ca'.

*Dxenná Jesús: “Le da naga zua' xezí' lázrele”  
(Lc. 10.21-22)*

<sup>25</sup> Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dxelájni'ine', san blé'enu' na bidu caní.

<sup>26</sup> Ca'an naca, Xrae, lawe' da naca na ca dxaca lazru' Lue'.

<sup>27</sup> 'Xra' ba bdee' lu na'a xúgute da caní. Quegá nu benne' núnbe'e neda', Zri'ine Dios, san Xra' Dios núnbe'e neda'. Quegá nu benne' núnbe'e Xra', san neda', Zri'ine Dios, núnbe'a Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'.

<sup>28</sup> Le da naga zua', xúgutele le'e dxeajxréquele lu zrin dxunle chee xudau', ne ca naca xua da núale, na' neda' guna' xezí' lázrele.

<sup>29</sup> Le gunna lataj xrua' le'e ca nu benne' xrué' bezre xugu' cheeba', ne le gusede chia' lawe' da naca' dxexruj lazre', ne dxe'ene lazre', na' wazrué'ele xezí' lázrele lu bénne'du xu'ule.

<sup>30</sup> Da na' naca na ca xugu' chee bezre da xrua' le'e québetē ca naca na stebe chee gúale na, na' xua da xrua' le'e naca na zraze.

## 12

*Bi ca' dxusede Jesús dxelequē'e dau zrua' xtila  
gate naca zra dxulupá'ana judío  
(Mr. 2.23-28; Lc. 6.1-5)*

<sup>1</sup> Ca lu zra na' xu'u Jesús neza zéaje' ládujla naga de xel-la' zrua' xtila, ne naca zra dxulupá'ana benne' judío. Dxeledún benne' ca' dxusede Jesús,

na' gulezú lawe' dxelálaje' dau naga zria zrua' xtila, ne dxelawe' na.

<sup>2</sup> Gate belelé'e benne' xudau' fariseo ca' da caní, na' gulé'e Jesús:

—Guná' xque ca dxelún benne' ca' dxusédenu', dxelunē' zrin da quebe naca chee' xelunē' lu zra dxupá'anadxu.

<sup>3</sup> Jesús guzre' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guledunē'?

<sup>4</sup> Guxú'e lu xu'u chee' Dios, ne gulawe' xeta xtila lá'azxa, da quebe zaj naca chee' xelawe', le', ne benne' ljwezre' ca', san tuze bxruze ca' zaj naca chee' xelawe' na.

<sup>5</sup> ¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxelunē' zrin chee' xudau' lu zra dxupá'anadxu, ne quebe zaj nabague' zria?

<sup>6</sup> Neda' dxapa' le'e, de tu da naca blaudxa ca xudau' nigá.

<sup>7</sup> ¿Quebe ne chéajni'ile ca zéaje da naxúaj na lu xiche chee' Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be xíxre'du ca' lu cugu chia'. La ba guxéajni'ile da nigá, quebe ne guzría xile bénneache quebe zaj nabague' dul-la.

<sup>8</sup> Chee le na', neda', Benne' Gulje' Bénneache, napa' xel-la' dxenná bea dxuna' zrin chia' lu zra dxupá'anadxu.

*Dxexún Jesús tu benne' zua zri ne'e  
(Mr. 3.1-6; Lc. 6.6-11)*

<sup>9</sup> Nadxa Jesús bezé'e na', na' guxú'e tu lu xu'u naga dxelúe lá'ane' Dios.

10 Zua tu benne' zua zri ne'e ga na'. Benne' judío ca' gulaca lazre' xelezrelne' ájala xelune' chee gaca xelagu zrie' chee Jesús. Chee le na' gulenábene' Le':  
—¿Dxunna Dios lataj xexundxu benne' we' lu zra dxupá'anadxu?

11 Jesús guzre' benne' ca':

—Núteteze benne' zue' ládujla le'e, che zua tu zrila' chee', ne che bíxreba' tu xedxu situj lu zra dxupá'anadxu, ¿quebe chéaje' cheajxeláje'-ba' xca'?

12 Da zrendxa zaca tu benne' quez ca tu zrila'. Ca'an naca dxunna Dios lataj gundxu tu da xrlátaje lu zra dxupá'anadxu.

13 Nadxa Jesús guzre' benne' we' na':

—Bli na'u.

Ca blí ne'e, na' bexaca na ca ne'e xetú.

14 Nadxa beledxúaj benne' xuda' fariseo ca', ne gulezú lawe' dxelílaje' ájala xelune' xelútié' Jesús.

*Da gunná tu benne' bchálaje' waláz chee Dios ca dxal-la' gaca chee Jesús*

15 Gate gúquebe'e Jesús da nigá, na' bezé'e na', na' benne' zante zjácálene' Le'. Bexún Jesús xúgute benne' we' zaj zre'e ládujla benne' ca'.

16 Jesús gunné xúene' benne' ca' quebe nu xululé'ene' nu naca Le'.

17 Caní guca ca da gunná Isaías, benne' bchálaje' waláz chee Dios, gunné':

18 Benne' nigá naque' wen zrin chia', benne' ba gucá'a.

Benne' nigá nazrí'ida', ne dxezaca ba lázrelena' Le'. Guzúaqueza' xichaj lázrdawe' Be' Lá'azxa chia'.

Guzenne' bénneache xúgute xezr la xu ca dxuchi'a da dxaca.



19 Quebe tíl-lalə́queze' bė́nneache, ne quebe cuézrexe'e.

Netú benne' quebe xenne' chi'e la neza.

20 Quebe quichje' tu xia da ba nachaj, ne quebe xusul-le' xi' da ba dxaca wexul-la na, ca zrindxa zra xuzúe' xel-la' dxenná bea chawe' chee'.

21 Bė́nneache xúgute xęzr la xu xuluxrén lázrequeze' Le'.

*Dxelenné' napa Jesús xel-la' dxenná bea chee da xriwe'*

*(Mr. 3.19-30; Lc. 11.14-23; 12.10)*

22 Nadxa guleché'e lau Jesús tu benne' la chul-la, benne' quebe dxaca nnie', lawe' da xu'e be' xriwe'. Jesús bexune' benne' nigá, na' belé'ene', ne bennie'.

23 Xúgute benne' ca' belexebánene', gulenné':

—¿Naca benne' nigá Zri'ine David zra?

24 Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchínene' xel-la' dxenná bea chee Beelzebú, xrane be' xriwe' ca'.

25 Dxeque be'e Jesús ca da dxelenné', dxelé'e ljwezre', na' guzre' le':

—Lu xu'u lawe' chee gáteteze xęzre, che xelaca chupa la'a benne' xu'u lawe' ca', ne bal-le' xeledíl-laləne' xezícadxe', na' wexul-la wenite xel-la' dxenná bea chee benne' ca'. Cá'aqueze che tu xęzre benne', u tu cue' xrtía ljwezre xelaque' chupa la'a, ne xeledíl-laləne' le sa' ljwezre', wenítequeze xęzre na', u xrtía ljwezre ca'.

26 Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ájazra gácaqueze nna bea na?

27 Le'e dxennale chia' dxebéaja' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e tuze chee xelebéaje' be' xriwe' ca'? Chee le na' léqueze' dxululé'etene' nanéguele le'e.

28 Che neda' dxebéaja' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

29 '¿Ájazra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' bénnea'? Che guné' caní, na' wazéquene' que'e da de chee bénnea'.

30 'Nu benne' quebe dxácalene' neda', dxedábague' neda', na' benne' quebe dxexezígalene' neda', dxexúsie' na.

31 'Chee le na' dxapa' le'e, gunite lau Dios chee bénneache xúgute dul-la zaj nabague', ne xúgute da calela da dxelenné', san che xelenné' schanni' chee Be' Lá'azxa, cabata' gunite lau Dios chee'.

32 Núteteze benne', che bi nnie' schanni' chia' neda', Benne' Gulje' Bénneache, Dios gunite lawe' chee', san che tu benne' nnie' schanni' chee Be' Lá'azxa, québequeze gunite lau Dios chee' lu xezr la xu nigá ne cá'anqueze lu xezr la xu da za za'.

*Da dxun tu benne' dxule'e na ca naque'  
(Lc. 6.43-45)*

33 Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na.

<sup>34</sup> Le'e, be snia ca'. ¿Ájazra gunle le'e nnele da xrlátaje che le'e nácaquezle benne' wen da calela xca'? Ca da dxedxuj dxú'adxu naca na ca da zua na lu xichaj lázrdaudxu.

<sup>35</sup> Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'.

<sup>36</sup> Neda' dxapa' le'e, lu zra guchi'a Dios, xúgute bénneache xuludé' ca da gulenné', tu tu dizra' xala da gulenné'.

<sup>37</sup> Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

*Bénneache wen da calela ca' dxelenábene' Jesús guné' tu xel-la' waca chee xabáa*

*(Mr. 8.12; Lc. 11.29-32)*

<sup>38</sup> Nadxa bal-la benne' xudau' fariseo, ne benne' dxuluxuzájle'e da nadxixruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

<sup>39</sup> Na' guzre Jesús benne' ca':

—Bénneache wen da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xeelé'equezne' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios.

<sup>40</sup> Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' Bénneache, waxú'ueza' lu xedxu ba chunna zra chunna xela.

<sup>41</sup> Benne' gulezré'e xezre Nínive welexásaqueze' lu zra guchi'a Dios gate guchi'e chee bénneache zaj zré'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá.

<sup>42</sup> Cá'anqueze nu'ula na' gunná be'e chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee bénneache zaj zré'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zítu'te chee xezr la xu nigá chee xenne' dizra' sina da bchalaj Salomón, na' blaudxa ca Salomón na' naca Benne' zue' nigá.

*Ca naca chee be' xriwe' da bexú'u na tu benne'  
(Lc. 11.24-26)*

<sup>43</sup> Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na:

<sup>44</sup> “Webi'a xexá'a lizra' naga bedxúaja!” Ca xezrín na, le'e na benne' na', naque' ca tu xu'u da naxíajbe lu'ule na, ne nalúa na, ne nagá'ana chawe na.

<sup>45</sup> Nadxa cheaj na cheajxezrí na xegazre be' xriwe' da zaj naca na xríwedxa ca le na, na' xúgute na dxelú'u na lu bénnea', na' naca chee benne' na'

da caléladxa ca guca chee' nedxu. Cá'anqueze gaca chee' bènneache wēn da calela caní.

*Benne' zaj naque' ca xrna Jesús, ne ca benne' biche' ca'*

*(Mr. 3.31-35; Lc. 8.19-21)*

<sup>46</sup> Jesús ne zue' dxuchálajlene' benne' caní gate belezrín xrne'e ne benne' biche' ca' ga na'. Gulezré'e chulé'ajla, ne dxelaca lazre' xuluchálajlene' Jesús.

<sup>47</sup> Nadxa tu benne' guzre' Jesús:

—Xrna'u, ne bi bichu' ca' zaj zre'e chulé'ajla. Dxelaca lazre' xuluchálajlene' Lue'.

<sup>48</sup> Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

<sup>49</sup> Nadxa ble'e Jesús benne' ca' dxusédenē', dxenné':

—Benne' caní zaj naque' xrna'a, ne bi bícha'dau' ca'.

<sup>50</sup> Caní naca na lawe' da núteteze benne' dxune' ca da dxaca lazre' Xra' zue' xabáa, benne' nigá naque' benne' bicha', ne benne' zana', ne xrna'a.

## 13

*Da bsede Jesús ca da ben benne' dxaza*

*(Mr. 4.1-9; Lc. 8.4-8)*

<sup>1</sup> Lu zra na' bdxuaj Jesús xu'u, na' xeajdxé'e dxu'a nísadau'.

<sup>2</sup> Na' lawe' da belezraga benne' zante naga zua Jesús, guxú'e tu lu da dxedá lawe' nísadau', ne gudxé'e na'. Xúgute benne' ca' belexegá'ane' dxu'a nísadau' na'.

<sup>3</sup> Nadxa bsede Jesús benne' ca' da zante da bchálaje', dxenné':

—Tu benne' dxaza guzé'e zíaje' guza.

<sup>4</sup> Dxácatē dxazē', bal-la bínnedu ca' xeajlechaze na dxu'a neza. Na' belelá' bxínnedu ca', guláguba' bínnedu ca'.

<sup>5</sup> Bal-la bínnedu ca' xeajlechaze na lu xiaj naga quebe dxé'teca xu. Bínnedu caní chadí gulezría na lawe' da quebe dxé'teca xu.

<sup>6</sup> Gate bla' gubizra, na' gulecuade na. Lawe' da quebe dxé'teca xu, na' gulebizre na.

<sup>7</sup> Bal-la bínnedu ca' xeajlechaze na naga bezríale'e lba xeche', na' lba xeche' ca' belegula na, ne blule na da du ca' naze'.

<sup>8</sup> Bal-la bínnedu ca' xeajlechaze na lu xu bebe, na' belúnnale'e na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na.

<sup>9</sup> Che zua nágale, le xene.

*Dxenná Jesús bizr chee na' dxuchálaje' da dxululé'e na*

*(Mr. 4.10-12; Lc. 8.9-10)*

<sup>10</sup> Nadxa benne' ca' dxusēde Jesús gulebigue' naga zuē' Le', ne buluchebe' Le':

—¿Bizr chee na' dxuchálajlenu' benne' ca' da dxululé'e na?

<sup>11</sup> Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'e lataj.

<sup>12</sup> Benne' nape' late', Dios gunézrujdxē' le', na' gápale'e, san benne' quebe bi nape', Dios wequé'e ca da du nape'.

13 Chee le na' dxuchálajlena' benne' caní da dxululé'e na, lawe' da cate' dxelenné'e quebe dxelélé'ene'. Cate' dxelenne' quebe dxeléajni'ine'.

14 Ca naca da dxaca chee benne' caní dxaca na ca gunná Isaías, bénnea' bchálaje' waláz chee Dios, gunné':

Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

15 Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácué' xiaj lawe' chee quebe xeelé'ene'.

Quebe dxelenne', na' quebe dxeléajni'ine'.

Quebe dxelaxílaje' neda' chee xexuna' le'.

16 'Ba neza zrente naca na chee le'e lawe' da dxelé'ele nen xiaj laule, ne dxenle nen nágale.

17 Da li dxapa' le'e, benne' zante, benne' ca' buluchálaje' waláz chee Dios, ne benne' xrlátaje ca' gulaca lazre' xeelé'ene' da caní dxelé'ele le'e. Quebe belelé'ene' na. Gulaca lazre' xelenne' da caní dxénnele le'e. Quebe belenne' na.

*Jesús dxuzéajni'ine' benne' ca' ca naca chee benne' dxaza*

*(Mr. 4.13-20; Lc. 8.11-15)*

18 Na' gunná Jesús:

—Le xenne ca zéaje da naca chee benne' dxaza nigá.

19 Benne' dxelenne' ca naca chee Bénnea' dxenná be'e xabáa, ne quebe dxeléajni'ine' zaj naque' ca binnedu ca' xeajlechaze na dxu'a neza. Za da xriwe' ne dxugúa na ca naca dizra' da ba gulezí'ę lu xichaj lázrdawe'.

20 Ca naca chee binnedu ca' xeajlechaze na lu xiaj, da caní dxululé'e na ca naca chee benne' ca' dxelezi'e dizra' na' du lazre'.

21 Ca na' guca chee binnedu ca', quebe guca xuludé lue na, ne quebe guzí bea na, ca'an dxaca chee benne' caní, gate na' bi da dxelezaque', u che nu zeajnú zi' xuzre' le' lawe' da zaj nazi'e dizra' nigá, na' dxelexebigue'.

22 Binnedu ca' xeajlechaze na ládujla xeche' dxululé'e na ca naca chee benne' dxelenne' dizra' nigá, san dxelebé'le'e gunne xue da naca chee xezr la xu nigá, na' ca naca xel-la' gunní'a dxezí xē na benne' ca'. Xúgute da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'.

23 Ca naca chee binnedu ca' da xeajlechaze na lu xu bebe, da caní dxululé'e na ca naca chee benne' ca' dxelenne' dizra' nigá, ne dxeléajni'ine' na, na' zaj naque' ca binnedu ca' belúnnale'e na. Bal-la benne' zaj naque' ca binnedu ca' belunna na tu gaxúa tu tu na, na' xebal-le' zaj naque' ca binnedu ca' belunna na ga xun tu tu na, na' xebal-le' zaj naque' ca binnedu ca' belunna na chi dxua tu tu na.

*Da bchalaj Jesús ca naca chee xixre' zrinnaj da dxenná'queze na ca dxenná' xel-la' zrua' xtila*

24 Nadxa bchalaj Jesús xetú da dxulé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xezr la xu chee'.



25 Gate dxelase xúgute', na' bzrin tu benne' dx-ezré'e le', ne xeajaze' binne xixre' zrinnaj láwela zrua' xtila, na' bezé'e.

26 Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'.

27 Nadxa benne' wen zrin ca' xeajleguezre' xrane na, dxelé'e le': "Xran, guzu' binne cháwe'dau' lu xezr la xu chiú'. ¿Gazra guzá xixre' zrinnaj caní?"

28 Gunná xránabe': "Tu benne' dxezré'e neda' bene' da nigá." Nadxa benne' wen zrin ca' bu-luchebe' le': "¿Dxaca lazru' chéajntu' cheajlépentu' xixre' zrinnaj ca?"

29 Le' guzre' wen zrin ca': "Quebe gaca na. Gate na' lázrule xixre' zrinnaj ca', waláZRutele xel-la' zrua' xtila.

30 Xelegúladxa na cháwe'la tu zren ca xecá'adxadxu zrua' xtila. Nadxa nna be'eda' benne' wen zrin ca' xelequé'e nedxu xixre' zrinnaj ca', na' xuluchéaje' xelune' tu xrúnujdu weaj chee guzédxedxu na. Nadxa xeelape' zrua' xtila na', ne xezrá chawe' na lizra'."

*Da bchalaj Jesús ca naca chee binne mostaza  
(Mr. 4.30-32; Lc. 13.18-19)*

31 Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu benne' guze' binne mostaza lu xezr la xu chee'.

32 Da li binne mostaza nigá naca na da bízrujdxa lawe' xúgute' binne ca'. Gate ba nagula na naca na tu xaga zrendxa lawe' xúgute' xixre' cuan. Dxaca na ca tu xaga zren naga dxelezeque' cheajleZría bxínnedu ca' xrú'uneba' lu zruze na.

*Da bchalaj Jesús ca naca chee cua zichaj chee xeta xtila*

*(Lc. 13.20-21)*

<sup>33</sup> Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' dutę na guxasa na bliche.

*Ca bchine Jesús da dxulé'e na caní*

*(Mr. 4.33-34)*

<sup>34</sup> Xúgute da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na.

<sup>35</sup> Caní guca ca da gunná benne' bchálaje' waláz chee Dios, gunné':  
Guchálaja' ca naca da dxulé'e na da guchálaja'.  
Gulé'eda' ca naca da nagache gate guzrete xęzr la xu.

*Jesús dxuzéajni'ine' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila*

<sup>36</sup> Nadxa Jesús bze' benne' ca' dizra', na' guxú'e lu xu'u. Benne' ca' dxusede Jesús gulebigue' lau Le', na' gulé'e Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

<sup>37</sup> Nadxa Jesús guzre' benne' ca':

—Bénnea' dxaze' binne cháwe'dau' nigá naque' Benne' Gulje' Bénneache.

<sup>38</sup> Naga dxaze' binne nigá naca na lu xichaj lázrdau bénneache. Binne cháwe'du ca' zaj naca

benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'.

<sup>39</sup> Bénnea' dxezré'e xrane xezr la xu na', ne xea-jaze' xixre' zrinnaj naque' da xriwe' ná'queze. Zra xeelape' naca na zra bzebe chee xezr la xu nigá, na' benne' ca' xeelape' zrua' xtila na' zaj naque' gubáz chee xabáa chee Dios.

<sup>40</sup> Ca belexequé'e xixre' zrinnaj ca', ne buluzré'e na lu xi' chee xelezxe na, ca'an gácaqueze lu zra bzebe na'.

<sup>41</sup> Neda', Benne' Gulje' Bénneache, sel-la' gubáz chee xabáa chia' ca' chee xulucuase' naga nna be'a xúgute benne' ca' dxuluxrínnašte' benne' xula, ne benne' ca' dxelune' da calela.

<sup>42</sup> Nadxa gubáz chee xabáa ca' xuluzré'e benne' ca' dxelune' da calela lu xi' gabila naga xebeze, ne xeláguxa'ate lazxe'.

<sup>43</sup> Nadxa benne' ca' dxelune' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

*Da dxulé'e na ca naca chee tu xel-la' gunní'a da nagache*

<sup>44</sup> Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélene' xel-la' gunní'a nigá, na' bucache' na. Ne zúale'e xel-la' dxebé zexíaje' xeaxjéti'e xúgute da napé', na' bezi'e xezr la xu na'.

*Da dxulé'e na ca naca tu bga da zácale'e na*

<sup>45</sup> Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexilaje' bga ca' da zaj zaca na.

<sup>46</sup> Gate dxezrélenē' tu da zácale'e, na' zexíaje' zeajxétie' xúgute da nape', na' si'e bga na'.

*Da dxulé'e na ca naca tu xixruj bela*

<sup>47</sup> Na' gunná Jesús:

—Ca naca chee benne' ca' xelexú'e naga dxenná bea Dios, naca na ca tu xixruj bela, da dxuluzale' lu nísadau', na' dxelezenē' zane' cue' bela.

<sup>48</sup> Gate dxezrá xixruj na', na' benne' ca' dxelezenē' bela dxelexequé'e na dxu'a nísadau', na' dxelebé'e dxelexebé'e' bela ca'. Bela chawe' ca' dxuluxuzré'e-ba' lu xcuite, na' bela xala ca' dxeledxú'une'-ba'.

<sup>49</sup> Ca'an gaca lu zra bzebe na'. Xeledxúaj gubáz chee xabáa ca', xelexebéaje' benne' ca' dxelunē' da calela ládujla benne' xrlátaje ca'.

<sup>50</sup> Xuluzré'e benne' ca' dxelunē' da calela lu xi' gabila, naga xebezre', ne xeláguxa'ate lazxe'.

*Da zaca ca da zaj naca na da cube, ne da zaj naca na da gula*

<sup>51</sup> Nadxa bchebe Jesús benne' ca', dxenné':

—¿Dxéajni'ile le'e xúgute da caní?

Benne' ca' gulenné':

—Awe', Xran.

<sup>52</sup> Nadxa guzre' benne' ca':

—Gate tu benne' dxusédene' da nadxixruj bea Dios, ne nazédene' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawe'.

*Jesús dxexezrine' Nazaret**(Mr. 6.1-6; Lc. 4.16-30)*

<sup>53</sup> Gate bexuzre bchalaj Jesús da dxulé'e na caní, na' bezé'e na'.

<sup>54</sup> Bezrine' naga naca lazrië'. Na' guzú lawe' dxusédene' benne' ca' zaj zré'e lu xudau' cheë xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxunë' xel-la' waca caní?

<sup>55</sup> Benne' nigá naque' zri'ine gubizre xaga, na' naca xrne'e María. Naque' bi biche Jacobo, ne José, ne Simón, ne Judas.

<sup>56</sup> Bi zane' zaj zue' nigá nen dxi'u. ¿Ájazra na' dxaca dxunë' da caní?

<sup>57</sup> Cheë le' na' buluzúë' Jesús chalá'ala. Jesús guzre' benne' ca':

—Xúgute' benne' xula dxelape' ba lá'ana tu benne' dxuchálaje' waláz cheë Dios. Benne' lazrië', ne xrtia ljwezre' quebe dxelúne' ca'.

<sup>58</sup> Jesús quebe benteque' na' xel-la' waca ca' lawe' da quebe guléajle'e cheë'.

**14***Ca gute Juan, bènea' bchue' bèneache nisa**(Mr. 6.14-29; Lc. 9.7-9)*

<sup>1</sup> Lu zra na' Herodes, benne' dxenná be'e xezre ca' zaj nababa na Galilea, benne' ca' naca da dxun Jesús.

<sup>2</sup> Na' guzre' bi wen zrin cheë' ca':

—Benne' nigá naque' Juan, bènea' bchue' bèneache nisa. Ba bebane' ládujla benne' gate. Cheë le' na' nape' xel-la' waca zren nigá.

<sup>3</sup> Caní gunné' lawe' da gudela Herodes nigá Juan na', ne bchéaje' le' du xia, ne gulu'e le' lizre xia. Bene' caní ne chee Herodías, zru'ula Felipe, biche Herodes na'.

<sup>4</sup> Caní bene' lawe' da guzre Juan le':

—Quebe naca chiu' súalenu' nu'ula nigá.

<sup>5</sup> Herodes guca lazre' gutie' le', san dxezrebe' da xelún bēneache ca' lawe' da dxelēquene' naca Juan benne' dxucháaje' waláz chee Dios.

<sup>6</sup> Gate bzrin zra dxezría iza Herodes, na' belune' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'.

<sup>7</sup> Chee le' na' Herodes guchebe lazre' lau benne' ca' gunézruje' ca da naba bi nú'uladu na'.

<sup>8</sup> Lawe' da ba guzre xrnabe' lebe', na' gunabe':

—Benna nigá xichaj Juan, bēnea' bchue' bēneache nisa. Gulú'u na tu lu xé'ena.

<sup>9</sup> Nadxa guzúa stebe Herodes, bēnea' dxenná be'e, san lawe' da ba guchebe lazre', na' benne' zaj zre'e dxágulene' le' belenne' ca', chee le' na' guzre' tu benne' wen zrin chee' gunézruje' na lebe'.

<sup>10</sup> Gunná bé'ene' nu benne' guchugue' xichaj Juan naga xu'e lizre xia.

<sup>11</sup> Nadxa xeajlexrí'e xíchaje' tu lu xé'ena, ne bulunézruje' na bi nú'uladu na', na' lebe' bnézrujbe' na xrnabe'.

<sup>12</sup> Nadxa belezrín benne' ca' bsede Juan, na' belexú'e le', ne xeajlecache' le'. Nadxa xjaque' xeajleguezre' Jesús.

*Dxugagu Jesús chi xun gaxúa benne' biu  
(Mr. 6.30-44; Lc. 9.10-17; Jn. 6.1-14)*

<sup>13</sup> Gate ben Jesús da na', na' bezé'e na', bexu'e tu lu da dxedá lawe' nísadau', na' bzrine' tu naga

quebe nu zra' benne'. Gate belén bēnneache, na' gusiá'que' ni'e, na' belezrine' naga zua Jesús.

<sup>14</sup> Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le', na' bexune' benne' ca' quebe chawe' zaj zuē'.

<sup>15</sup> Gate ba za xrinne, benne' ca' dxusēde Jesús gulebigue' lau Le', dxelenné':

—Lataj nigá quebe bi de, ne ba dxedé zra. Bze benne' caní dizra' chee chjaque' xézredu ca', ne xezezi'e da xelawe'.

<sup>16</sup> Jesús guzre' le':

—Quebe dxun na ba xen chjaque'. Le gunezruj le'e da xelawe'.

<sup>17</sup> Benne' ca' gulé'e Le':

—Gáxxuze xeta xtila de cheedxu nigá, ne chúpaze bela.

<sup>18</sup> Jesús guzre' benne' ca':

—Le gunna na nigá.

<sup>19</sup> Nadxa gunná bé'ene' gulebé' benne' zan ca' lawe' zrie. Guqué'e xeta xtila, ne bela ca', na' gunné'e xabaala, ne guzre' Dios: “Xcalenu.” Nadxa bzúzruje' xeta xtila, ne bnézruje' na benne' ca' dxusédenē', na' benne' ca' gulísie' na lávela benne' zan ca'.

<sup>20</sup> Xúgute' gulawe', ne gulélajene'. Ca gudé na' bulusuzré'e chazrinnu ga' da bízrujdu ca' zaj nagá'ana.

<sup>21</sup> Benne' gulawe' na zaj naque' chi xun gaxúa benne' biu, ne quebe nu blaba nu'ula, ne bidu ca'.

*Jesús dxedé' lawe' nisa*

*(Mr. 6.45-52; Jn. 6.16-21)*

<sup>22</sup> Nadxa gunná be'e Jesús benne' ca' dxusédenē' xelu'e lu da dxedá lawe' nísadau' chee xelague'

nísadau' nédxudxa ca Le' chee xelexezrine' xéchala'a nísadau' na', dxácatę Le' dxuzé benne' zan ca' dizra'.

<sup>23</sup> Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zuę' tuze'. Gate guxrinne zua Jesús tuze' na'.

<sup>24</sup> Dxácatę na' ba zeaj da na' dxedá lawe' nísadau' gachaj láwe'tę nísadau' na'. Nadxa guxasa xeajxruza chee nísadau' na', da dxutá na da dxedá lawe' nísadau' na', lawe' da dxácalę'e be', ne quebe dxue na lataj sa na.

<sup>25</sup> Gate gudé dxęla gubiga Jesús naga zaj zře'e, zéaje' lawe' nisa.

<sup>26</sup> Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexę'e, gulenné':

—Da dxedá dxęla na'.

<sup>27</sup> Jesús guzře' benne' ca':

—Le gun dipa lázrele. Neda' nigá. Quebe zrébele.

<sup>28</sup> Na' gunná Pedro, dxę'e Jesús:

—Xran, che Lue' na', gunná be'e xida' lawe' nisa naga zu' na'te.

<sup>29</sup> Jesús guzře' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezé'e lawe' nisa chee zrine' naga zua Jesús.

<sup>30</sup> Gate dxęque be'ene' ca dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xę'e, gunné':

—Xran, becá'a neda'.

<sup>31</sup> Nadxa becá'a Jesús ne'e, ne guzře' le':



—Látega dxejlí lazru' neda'. ¿Bizr chee na' ben chupa lazru'?

<sup>32</sup> Gate belexegüene' lu da dxedá lawe' nísadau', na' bebé' zri be' na'.

<sup>33</sup> Nadxa benne' ca' zaj zre'e lu da dxedá lawe' nísadau' na' buluzú zribe' lau Jesús, dxelé'e Le':

—Da li nacu' Zri'ine Dios.

*Jesús dxexunę' benne' we' ca', benne' zaj zre'e lu xezre Genesaret*

*(Mr. 6.53-56)*

<sup>34</sup> Guledé'e xecha la'a nísadau', na' belezrine' lu xezr la xu chee benne' Genesaret ca'.

<sup>35</sup> Gate benne' ca' zaj zre'e xezre na' belex-exúnbe'e Jesús, na' buludé'e dizra' xezícala xézredu ca', na' guleché'e xúgutę benne' we' naga zua Jesús.

<sup>36</sup> Gulata' xuene' Jesús gu'e lataj xulutá benne' ca' zra lane' naze. Xúgutę benne' buluté' zra lane' belexexaque'.

## 15

*Da dxuxrinnaj na bėnneache*

*(Mr. 7.1-23)*

<sup>1</sup> Nadxa benne' fariseo ca', ne benne' dxulux-uzájle'e da bdxixruj be'e Moisés, benne' ca' beledxu-aje' lu xezre Jerusalén, gulebigue' lau Jesús, na' buluchebe' Le', dxelenné':

<sup>2</sup> —¿Bizr chee na' benne' ca' dxusédenu' quebe dxuluzúe' dizra' ca' naca da gulún xra xrtaudxu? Quebe dxelíbequeze ne'e ca' naca da zéajlentu' gate dxelawe'.

<sup>3</sup> Jesús bchebe' benne' ca', gunné':

—¿Bizr chee na' le'e quebe dxuzuale dizra' da dxenná be'e Dios? Dxunle ca' naca da zéajlele.

4 Dios gunné': "Gudapa ba lá'ana xra xrna'u." Cá'anqueze gunné': "Benne' nne' schanni' chee xra xrne'e, le gute bēnea'."

5 Le'e dxennale waca xe tu benne' xra xrne'e: "Quebe séqueda' bi gunna' le'e lawe' da ba guchēbe lazra' gunézruja' Dios xúgute da de chia'."

6 Dxennale che tu benne' dxune' caní quēbedxa dxun na ba xen gácalēne' xra xrne'e. Caní dxunle le'e, dxuzuale chala'ala da bdxixruj be'e Dios, chee gunle ca naca da zéajlele.

7 Le'e, láweze dxunle da xrlátaje. Da li naca da gunná Isaías, bēnea' bchálaje' waláz chee Dios, ca naca chee le'e, gunné':

8 Benne' caní dxelape' neda' ba lá'ana nen dxú'aze'. Quebe dxelape' neda' ba lá'ana dute lázrdawe'.

9 Dácheze naca dxelúe lá'ane' neda'.

Da gulenná be'ene' bēneache naca na da ca' dxulusedene'.

10 Nadxa Jesús gunné' benne' ca', dxenné':

—Le xene, ne le chéajni'i.

11 Da dxu'u na dxu'a bēneache quegá le na guxrinnaj na bēneache. Da dxedxuaj na dxu'a bēneache naca na da dxuxrinnaj na bēneache.

12 Nadxa benne' ca' dxusede Jesús gulebigue' lau Le'. Dxelé'e Le':

—¿Nézenu' gulaca tula benne' xudau' fariseo ca' gate belenne' da gunnáu'?

13 Jesús guzre' benne' ca':

—Bíteteze xágadau' da quebe guza Xra' zue' xabáa, welépeda'.

14 Le gusán benne' ca'. La chul-la zaj naque', ne dxulusi'e neza le sa' ljwezre' la chul-la ca'. Che tu

la chul-la che'e le sa' ljwezre' la chul-la, dxúpatē xelebixre' tu lu xedxu.

<sup>15</sup> Nadxa Pedro guzre' Jesús:

—Bzéajni'i netu' ca naca chee da dxulé'e nigá.

<sup>16</sup> Gunná Jesús:

—¿Cá'anqueze le'e quebe dxéajni'ile?

<sup>17</sup> ¿Quebe nézele xúgute da dxu'u na dxú'adxu zeaj na le'edxu, na' te na' xedxuaj na?

<sup>18</sup> Da dxedxuaj na dxú'adxu naca na da za' lu xichaj lázrdaudxu. Da nigá naca na da dxuxrinnaj na bēneache.

<sup>19</sup> Lu xichaj lázrdau bēneache dxeledxuaj da dx- ezá lazre' da calela, ca naca xel-la' wete benne', ne ca naca xel-la' zualē zru'ula benne' xula, ne ca naca da sban da dxelún bēneache, ne ca naca xel-la' gubán, ne xel-la' wen lazre', ne xel-la' wetupa dizra' bizruj.

<sup>20</sup> Da caní dxuluxrinnaj na bēneache. Che tu benne' quebe dxexibe ne'e ca da zéajlele gate dx- awe' xeta, da nigá quebe dxuxrinnaj na le'.

*Tu nu'ula zitu' dxéajle'e chee Jesús*

*(Mr. 7.24-30)*

<sup>21</sup> Nadxa bedxuaj Jesús na', zexíaje' chala'a naga zaj nababa xezre Tiro, ne xezre Sidón.

<sup>22</sup> Tu nu'ula Canaán zue' na' ze'e dxebezre xe'e cúzrela Jesús, dxenné':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne cáititega dx- ezácabe'.

<sup>23</sup> Quebe bi bechebe Jesús. Nadxa belezrín benne' ca' dxusédene', ne gulata' xuene' Le', gulé'e Le':

—Bsel-la nu'ula nigá lawe' da ze'e dxebezre xe'e cúzrudxu.

<sup>24</sup> Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca zríla'du ca' zaj naníteba'.

<sup>25</sup> Gubiga nu'ula na' naga zua Jesús, ne bzu zribe' lau Le', ne dxe'e Le':

—Xran, gúcale neda'.

<sup>26</sup> Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

<sup>27</sup> Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bízrujdu ca' dxelexruj zran naga dxelagu xránaba'.

<sup>28</sup> Nadxa Jesús guzre' le':

—Nú'uladu, da zrente naca xel-la' dxeajlí lazre' chiu'. Gaca ca dxaca lazru'.

Lu zra ná'queze bexaca zrí'ine' nú'uladu na'.

*Jesús dxexune' benne' zante benne' we'*

<sup>29</sup> Jesús guzé'e na', gudée' dxu'a nísadau' chee Galilea. Guluéne' tu lu xi'a, ne gudxé'e na'.

<sup>30</sup> Benne' zan belezrine' naga zua Jesús, zaj naché'e benne' zrinnaj ca', ne benne' la chul-la ca', ne benne' quebe dxaca xelenné', ne benne' zan zaj nadxugu ni'a na', ne zánedxa benne' we'. Buluzré'e benne' ca' lau Jesús, na' Le' bexune' le'.

<sup>31</sup> Ca'an guca belexebane benne' ca' gate belelé'ene' dxelenné' benne' ca' quebe guca xelenné' nédxula, ne belexexaca benne' ca' gulaque' benne' ni'a na' dxugu, ne dxeledá benne' ca' gulaque' benne' zrinnaj, ne dxelelé'e benne'

ca' gulaque' benne' la chul-la. Gulezú lawe' dxelúe lá'anē' Díos chee benne' Israel ca'.

*Jesús dxugawe' tapa cue' tu gaxúa benne' biu  
(Mr. 8.1-10)*

<sup>32</sup> Nadxa Jesús gunné' benne' ca' dxusédenē'. Dxe'e le':

—Dxexache lazra' chee benne' caní lawe' da ba zeaj chunna zra zralenē' neda' nigá, ne quebe bi de da xelawe'. Quebe dxaca lazra' xesel-la' le' chee cheajxaque' lizre' quebe ne xelawe' chee quebe xelate ní'a ne'e la neza.

<sup>33</sup> Nadxa benne' ca' dxusede Jesús gulé'e Le':

—¿Ajazra guntu' zréntu' da xelagu cátiṭe benne' zan caní? Lataj nigá quebe nu chilá' benne' zua lizre' nigá.

<sup>34</sup> Jesús bchebe' benne' ca', dxenné':

—¿Bal-la xeta xtila nápa'e?

Benne' ca' belexechebe':

—Gazre na, ne xetú chupa béladau'.

<sup>35</sup> Nadxa Jesús gunná bé'ene' benne' zan ca' xelebé'e lu xu.

<sup>36</sup> Guqué'e da gazre xeta xtila, ne béladu ca', na' guzre' Díos: "Xcalenu'." Nadxa bzúzruje' na, ne bnézruje' na benne' ca' dxusédenē', na' benne' ca' gulisie' na chee benne' zan ca'.

<sup>37</sup> Xúgute' gulawe', ne belélajtene'. Gudé na' bulusuzrate' gazre ga' da bízrujdu ca' zaj nagá'ana.

<sup>38</sup> Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'.

<sup>39</sup> Gudé na' Jesús bze' benne' zan ca' dizra', na' bexu'e lu da dxedá lawe' nísadau' zexíaje' naga nababa xezre Magdala.

# 16

*Dxelenabe' Jesús gune' tu xel-la' waca chee xabáa  
(Mr. 8.11-13; Lc. 12.54-56)*

<sup>1</sup> Benne' xudau' fariseo ca', ne benne' xudau' saduceo ca' xjaque' naga zua Jesús chee xulux-unéguene' Le'. Chee le na' gulenabe' Jesús gune' tu xel-la' waca zrente da za xabáa.

<sup>2</sup> Jesús bechebe' benne' ca':

—Xelate' zua gubizra dxennale le'e: “Gun chawe' wxre lawe' da da' beuj xrna zran xabáa.”

<sup>3</sup> Che zílala dxennale: “Quebe chawe' gun na'a zra lawe' da dá'le'e beuj xrna zran xabáa.” Le'e dxulé'e cuínale da quebe nácale. Dxácaqueze dxennale ca naca da gun zran xabáa. Quebe dxaca xuzájla'ale ca sa'yeaj da dxaca na'a zra.

<sup>4</sup> Benne' wen da calela caní, benne' zaj nabéaj xíchaje' Dios, dxelenabe' guna' tu xel-la' waca zrente. Quebe xeलेlé'ene' xetú xel-la' waca. Welelé'ene' tuze da gaca na ca da guca chee Jonás.

Nadxa bulucá'ana Jesús benne' ca', zjá'aque'.

*Da dxelún benne' xudau' ca' da naca na ca cua  
zichaj chee xeta xtila*

*(Mr. 8.14-21)*

<sup>5</sup> Gate benne' ca' dxusede Jesús guladée' xechalá'a nísadau', na' gulal-la lazre' xelu'e chizre'.

<sup>6</sup> Jesús guzre' le':

—Le nna'xque. Le guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'.

<sup>7</sup> Benne' ca' dxusede Jesús gulezú lawe' dxelé ljwezre':

—Caní dxenné' lawe' da quebe núadxu xeta xtila.

8 Jesús dxেকে be'ene', na' guzre' le':

—¿Bizr chee na' dxennale naca na lawe' da quebe núale xeta xtila? Láteze dxéajlele chia'.

9 ¿Quebe ne chéajni'ile, ne quebe dxéajsá lázrele chee da gazxu' xeta xtila da bgawa' gazxu' cue' chi gaxúa benne' biu, ne bal-la ga' becá'ale?

10 ¿Quebe dxéajsá lázrele chee da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale?

11 ¿Ájazra na' quebe dxেকে be'ele quegá bchálaja' chee xeta xtila gate gunnía' le guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'?

12 Nadxa guleque bé'ene' quegá guzre Jesús le' xuluxúe cuine' chee da naca cua zichaj chee xeta xtila, san ca naca da dxulusede benne' fariseo ca', ne benne' saduceo ca'.

*Pedro dxenné' Jesús naque' Cristo*

*(Mr. 8.27-30; Lc. 9.18-21)*

13 Gate bzrin Jesús naga nababa xezre Cesarea da ben Filipo, na' bchebe' benne' ca' dxusédené':

—¿Nuzra na' dxelenná bèneache naca' neda', Benne' Gulje' Bénneache?

14 Na' benne' ca' gulenné':

—Bal-la benne' dxelenné' nacu' Juan, bènea' bchue' bèneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz chee Dios.

15 Nadxa guzre Jesús benne' ca':

—¿Gazra le'e? ¿Nuzra na' dxennale naca'?

16 Gunná Simón Pedro:

—Lue' nacu' Cristo, Zri'ine Dios ban.

17 Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'.

18 Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajlí lazre' neda', na' xel-la' dxenná bea chee da xriwe' quebe seque na gucu'uj na benne' ca'.

19 Neda' gunna' lue' da naca na zren xia chee xel-la' dxenná bea chee xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

20 Nadxa Jesús gunná bé'ene' benne' ca' dxusédene' chee quebe nu xelé'e naca Le' Cristo.

*Jesús dxuchálaje' ca gaca gate gati'e'*

*(Mr. 8.31—9.1; Lc. 9.22-27)*

21 Lu zra ná'queze guzú lau Jesús dxuzéajni'ine' benne' ca' dxusédene' dxal-la' xexíaje' xezre Jerusalén, na' benne' gula ca', ne benne' xíchaje ca' chee bxruze ca', ne benne' dxuluxuzájle'e da nadxixruj bea Dios wulusaca zi'e Le'. Na' guzre' benne' ca' dxusédene' welute benne' Jerusalén ca' Le'. Nadxa gate gaca chunna zra xebane'.

22 Nadxa Pedro guléaje' Jesús chalá'ala, ne guzú lawe' dxedil-le' Le', dxenné':

—Dios quebe gu'e lataj, Xran. Cabata' gaca chiu' da caní.

23 Jesús bexéchaje', na' guzre' Pedro:

—Gucuasa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bèneache dxulaba lazru'.



24 Nadxa Jesús guzre' benne' ca' dxusédene':

—Che nu benne' dxaca lazre' gaque' neda' tuze, dxal-la' guzúe' chalá'ala da naca chee', ne guzúa cuine' chee' gatié', na' nadxa gaca xídalene' neda'.

25 Bénnea' dxaca lazre' gapa chi'e xel-la' nabán chee' gunitié' na. Bénnea' gunitié' xel-la' nabán chee' lawe' da dxune' zrin chia', benne' nigá zrué'ene' xel-la' nabán du lazre'.

26 ¿Bízraqueze ba neza naca na chee' tu benne' che gata' chee' xúgute' xel-la' gunní'a da de lu xezr la xu nigá, na' cuía xi'e lau Dios? Quebe bi gaca quizruj tu benne' chee' la bénne' du xu'e lau Dios.

27 Neda', Benne' Gulje' Bénneache wida' xecha lasa nen xel-la' szren chee' Xra', ne nen gubáz chee' xabáa ca'. Nadxa xuzría chee' tu tu benne' ca' naca da zaj nun tu tue'.

28 Da li dxapa' le'e, bal-la benne' zaj zre'e nigá quebe xelatie' cadxa xeelé'ene' neda', Benne' Gulje' Bénneache, xida' xedajnná be'a.

## 17

### *Dios dxuché'e ca dxenná' lau Jesús*

*(Mr. 9.2-13; Lc. 9.28-36)*

1 Ca gudé guca xrupa zra, na' Jesús guché'e Pedro, ne Jacobo, ne Juan, bi biche Jacobo, na' bi cá'aze xjácálene' Le' tu lau xi'a sibe.

2 Na' Dios bche'e ca dxenná' lau Jesús lówela benne' ca'. Lawe' guca tite na ca gubizra, na' zra lane' guca na da chiche ca xel-la' naxaní'.

3 Na' benne' caní belelé'ene' Moisés, ne Elías, benne' gulezrá' gate nate, dxuluchálajlene' Jesús.

4 Nadxa Pedro guzre' Jesús:

—Xran, cháwe'le'e zúadxu nigá. Che dxaca lazru', guntu' chunna xu'u lágadau', tu chiu', ne tu chee Moisés, ne tu chee Elías.

<sup>5</sup> Dxácatē dxenné Pedro, bla' tu beuj da dxaca tite na, da gucu na benne' ca', na' lu beuj na' belenne' chí'i Dios, dxenné':

—Benne' nigá naque' Zri'ina' nazrí'ite lazra', ne chee Le' dzezaca ba lazra'. Chee Le' le xene.

<sup>6</sup> Gate belenne' da nigá, na' gulatē' sudxú'ala lu xu. Dxelegrébele'e.

<sup>7</sup> Nadxa Jesús gubiguē' naga zaj zre'e, na' bte' benne' ca', ne guzre' le':

—Le chasa. Quebe zrébele.

<sup>8</sup> Gate na' belenné'e, québedxa nu belelé'ene'. Tuze Jesús zue'.

<sup>9</sup> Nadxa gate dxelexexétaje' lu xi'a na', Jesús gunná bé'ene' benne' ca', dxenné':

—Quebe nu guchálajlele ca da ble'ele ca zrindxa zra neda', Benne' Gulje' Bénneache, xebana' ládujla benne' gate.

<sup>10</sup> Nadxa benne' ca' dxusede Jesús buluchebe' Le':

—¿Bizr chee na' dxelenná benne' ca' dxulux-uzájle'e da nadxixruj bea Dios dxun na ba xen xelá' Elías nédxudxa ca xelá' Cristo?

<sup>11</sup> Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca.

<sup>12</sup> Neda' dxapa' le'e, ba bla' Elías, na' benne' ca' quebe belexúnbe'e le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulje' Bénneache.

13 Nadxa benne' ca' dxusede Jesús guléque be'ene' dxuchalaj Jesús ca naca chee Juan, bēnea' bchue' bēneache nisa.

*Jesús dxexune' tu bi biu dxe'ebe' chuna'*  
(Mr. 9.14-29; Lc. 9.37-43)

14 Gate belezrine' naga zaj zra' benne' zante, na' tu benne' gubiguē' naga zua Jesús, ne bzu zribe' lau Le', dxenné':

15 —Xran, bexache lazre' zri'ina', dxe'ebe' chuna', ne da zrente da dxezácabe'. Zánete lasa ba xeajcházebe' lu xi', ne lu nisa.

16 Ba bedajgu'a-be' lau benne' caní dxusédenu', na' quebe guca xelexune'-be'.

17 Jesús bechebe':

—Le'e, benne' wen chupa lazre', ne benne' lázrdau zide'. ¿Bátate zúalēna' le'e? ¿Bátate naca' zren lazre' nen le'e? Le cheajxrí' bi cuide' na' nigá.

18 Nadxa Jesús gudil-le' be' xriwe' na', na' bebéaje' na lu bel-la' dxen chee bi cuide' na', na' zra ná'queze bexácatebe'.

19 Gudé na' benne' ca' dxusede Jesús gulenné' Le' chalá'ala, na' buluchebe' Le':

—¿Bizr chee na' quebe guca netu' xebéajntu' be' xriwe' na'?

20 Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la nápale xel-la' dxeajlí lazre', lácala naca na láteze ca naca tu binnedau' chee mostaza, waca xele xi'a nigá: “Gucuasa nigá chéaju' xetú lataj”, na' xi'a na' wacuasa na. Quebe bi de da quebe gaca gunle che nápale xel-la' dxeajlí lazre'.

21 Ca naca be' xriwe' caní, dxun na ba xen guchálajle Dios, ne gunle gubasa chee séquele xebéajle be' xriwe' caní.

*Jesús dxuchálajē' xecha lasa ca gaca gate gatiē'*  
(Mr. 9.30-32; Lc. 9.43-45)

22 Dxácatē na' dxeledé' naga nababa Galilea, Jesús guzre' benne' ca':

—Neda', Benne' Guljē' Bénneache wadéa' lu na' bénneache.

23 Xelútiē' neda', na' gate gaca chunna zra, xebana'.

Gate belenne' dizra' nigá, na' bewi'ine lázrele'ene'.

*Da dxuluchízrujē' bénneache chee xudau'*

24 Gate Jesús ne benne' ca' dxusédene' belezrine' lu xezre Capernaum, na' benne' dxuluchízrujē' chee xudau' belezrine' lau Pedro, na' buluchebe' le':

—¿Quebe dxizruj benne' dxusédene' le'e chee xudau'?

25 Pedro bechebe':

—Awe'. Dxízrujē' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nigá? ¿Dxuluchízrujē' benne' waláZR chee', u benne' zitu' ca'?

26 Bechebe Pedro:

—Benne' zitu' dxuluchízrujē'.

Jesús guzre' le':

—Na' benne' waláZR chee' quebe xelízrujē'.

<sup>27</sup> Na'a, chee quebe nu guchá'adxu, guxíaj lu nísadau' na', ne guchize da na' dxeláleu' bela lu nisa na', na' bebéaj bela nedxu queļu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeajtizruj na lau benne' ca'.

## 18

*Nu benne' nácadxa blau xabáa*  
(Mr. 9.33-37; Lc. 9.46-48)

<sup>1</sup> Tu lasa gulebiga benne' ca' dxusede Jesús naga zuē', na' buluchebe' Le':

—¿Nuzra benne' nácadxe' blau naga dxenná bea Dios?

<sup>2</sup> Nadxa Jesús gunné' tu bidau', na' bze'-be' lau benne' ca' dxusedene'.

<sup>3</sup> Dxenné':

—Da li dxapa' le'e, che quebe xexácale ca bidu nigá, quebequeze chu'ule naga dxenná bea Dios xabáa.

<sup>4</sup> Ca'an naca, benne' nácadxe' blau naga dxenná bea Dios xabáa, naca benne' gaque' dxexruj lazre', ne xexaque' ca bidu nigá.

<sup>5</sup> Benne' gape' ba lá'ana tu bidau' caní lu La' neda', néda'queza' gape' ba lá'ana.

*Ca naca da dxun na gundxu dul-la*  
(Mr. 9.42-48; Lc. 17.1-2)

<sup>6</sup> Na' gunná Jesús:

—Núteteze benne' guné' gun tu bidu caní dul-la, bi dxeajlí lázrebe' neda', cháwela guchéajladxu lbe'e tu xiaj zi'i da dxutu, na' cheajchú'unadxu le' situj lu nísadau'.

<sup>7</sup> Edxugúa bénneache lawe' da déle'e da dxun na xelún bénneache dul-la. Tu gátazqueze da caní, na'

edxugúa bēnneache dxelunē' xelún bēnneache dul-la.

<sup>8</sup> Cheē lē na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'ē lue' lataj ba xa', zua dxúpatē na'u, ne dxúpatē ni'u.

<sup>9</sup> Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'ē lue' lu xi' gabila, zua dxúpatē xiaj lau'.

*Da dxulé'e na ca naca cheē zrila' naníteba'*  
(Lc. 15.3-7)

<sup>10</sup> Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz cheē xabáa cheē bidu caní lau Xra' xabáa.

<sup>11</sup> Neda', Benne' Guljē' Bēnneache, bla'a beda-jselá' benne' zaj nanítie'.

<sup>12</sup> '¿Ájazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'ane' bē tápalalaj chēnu na' lē'ē xixre', na' cheajdiljē' zrila' na' naníteba'?

<sup>13</sup> Gate ba bezrelne'-ba', wabéle'edxene' cheē bē tu na' quézcala cheē bē tápalalaj chēnu ca' quebe guleníteba'.

<sup>14</sup> Cá'anqueze Xrale le'e, zue' xabáa, quebe dxaca lazre' nite netú bidu caní.

*Ca dxal-la' gunite laudxu cheē le sa' ljwézredxu*  
(Lc. 17.3)

<sup>15</sup> Na' gunná Jesús:

—Che bi bichu' dxunbe' chiu' da caleḷa, bchálajle tuze lebe', chee xúnbeabe' da caleḷa da benbe'. Che xenbe' da dxu'u-be', na' ba bexacu' tuze bi bichu'.

<sup>16</sup> Che quebe xenbe' da dxu'u-be', guché' tu chupa benne' chee gaca chupa u chunna benne' xelexechebe' ca naca da dxu'u-be'.

<sup>17</sup> Che quebe xenbe' chee benne' ca', guzre ca naca benne' dxelezraga lu xudau'. Che quebe xenbe' chee benne' ca', le guzúa-be' ca tu benne' quebe dxéajle'e chee Dios, u ca tu benne' dx-uchízruje' waláz chee benne' zitu' ca'.

<sup>18</sup> 'Da li dxapa' le'e, da guchéajle lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

<sup>19</sup> 'Cá'anqueze dxapa' le'e, che chúpale le'e gácale tuze ca da návale Dios, na' Xra' zua xabáa gunne' na.

<sup>20</sup> Naga zaj zra' chúpabe', u chúnna' zaj nazrágabe' lu La' neda', na' zúaqueza' neda' laduj lebe'.

<sup>21</sup> Nadxa Pedro bchebe' Jesús:

—Xran, che bi bícha'dau' gunbe' chia' da caleḷa, ¿bal-la lasa dxun na ba xen gunite lawa' cheebe'? ¿Gazre lasa?

<sup>22</sup> Bechebe Jesús:

—Dxapa' lue', quegá gazre lasa, san ga xun chi da gazre lasa.

*Benne' wen zrin quebe guca lazre' gunite lawe' chee le sa' ljwezre'*

<sup>23</sup> Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca

lazre' guca'ana chawe' da dxelal-la benne' wen zrin chee'.

24 Gate guzú lawe' dxucá'ana chawe' na, na' guleché'e lau le' tu benne' dxebague' chee' zane' cue' chi gaxúa dumí.

25 Lawe' da quebe de chee benne' wen zrin na' da quízruje' xrane', na' gunná be'e xrane' ta'u benne' wen zrin na', ne zru'ule', ne zrí'ine' ca', ne ca nácaqueze da nape', chee gazruj da na' dxebague'.

26 Nadxa bzu zribe benne' wen zrin na' lau xrane', na' guta' xuene' le', dxenné': "Xran, ben zren lazre' neda', na' quízrujqueza' ca naca na."

27 Na' xrane' bexache lazre' le', ne bnite lawe' da na' dxebague' chee', ne bsane' le'.

28 Gate benne' wen zrin na' bedxúaje', na' bezrague' xetú benne' wen zrin ljwezre', benne' dxebague' chee' látedau'. Na' gudèle' lba bènea', ne guzú lawe' dxusézxuje' chi'i bènea', dxé'e le': "Gudzruj neda' da dxal-lu' chia'."

29 Nadxa benne' wen zrin ljwezre' na' bzu zribe' lau le', ne guta' xuene' le', dxenné': "Ben zren lazre' neda', na' quízrujqueza' ca naca na."

30 Bènea' quebe guca lazre', na' guxíaje' xeajlu'e wen zrin ljwezre' na' lizre xia dxácaté quízruje' da na' dxebague'.

31 Gate benne' wen zrin ca' xezícala guleque bé'ene' da nigá, na' belewí'ine lázrele'ene', na' xjaque' xeajleguezre' xrane' xúgutę da ba guca.

32 Nadxa xrane' na' gunná bé'ene' xeajlenné' benne' wen zrin na', na' guzre' le': "Bi wen zrin calela. Neda' bnite lawa' chiu' ca naca da na' dxebagu' chia' lawe' da guta' xúenu' neda'.



<sup>33</sup> Cá'anqueze lue' dxal-la' xexache lazru' le sa' ljwezru' na' ca bēna' neda' bexache lazra' lue'."

<sup>34</sup> Xrane' na' bzá'alē'e bēnea', na' bdeē' lē' xel-la' zi' dxácatē na' quízrujē' ca naca da na' dxal-lē' cheē'.

<sup>35</sup> Nadxa gunná Jesús:

—Cá'anqueze gun Xra' zua xabáa cheēle le'e che quebe gunitē laule dutē lárdaule cheē le sa' ljwézrele.

## 19

*Da bchalaj Jesús ca naca cheē benne' dxulusán ljwezre'*

*(Mr. 10.1-12; Lc. 16.18)*

<sup>1</sup> Ca gudé bchalaj Jesús da caní, na' bezé'e xezre ca' zaj nababa Galilea, na' bezrine' chalá'ala naga nababa Judea, da zua chalá'ala xegu Jordán naga dxalaj gubizra.

<sup>2</sup> Benne' zan zjácālēnē' Lē', na' bexunē' benne' zante, benne' wē'.

<sup>3</sup> Nadxa bal-la benne' xudau' fariseo gulebiguē' naga zua Jesús cheē xelebéaje' Lē' dizra' cheē gaca xelagu zriē' Jesús, na' buluchēbē' Lē':

—¿Waca nu benne' gusanē' zru'ulē' nē cheē bíteteze da gunē'?

<sup>4</sup> Bechebe Jesús:

—¿Quebe ne gulábale le'e lu xiche lá'azxa da na' dxenná na: “Bennea' bēnē' benne' ca' nédxudautē bēnē' lē' benne' biu, ne nu'ula”?

<sup>5</sup> Cá'anqueze gunné': “Cheē lē na' benne' biu gusanē' xra xrne'e cheē gaquē' tuze nen zru'ulē', na' dxupe' xelaquē' ca tuze benne'.”

<sup>6</sup> Caní naca na, québedxa zaj naque' chupe', san tuze benne' zaj naque'. Chee le na' quebe dxal-la' xelá'a bènneache da na' ba nuchaga Dios.

<sup>7</sup> Nadxa buluchebe' Jesús:

—¿Bizr chee na' gunná be'e Moisés nu benne' gunézruje' zru'ule' tu xiche da dxulé'e na belex-elé'e, na' gusané' le'?

<sup>8</sup> Jesús guzre' benne' ca':

—Caní bene' lawe' da gulaca lazrdau zizraj xra xrtaule. Moisés benne' lataj gusanle zru'ulale, san nédxudautē quebe guca na ca'.

<sup>9</sup> Neda' dxapa' le'e, che tu benne' gusané' zru'ule', ne quebe dxedálene' benne' biu xula, na' che xezúalene' nu'ula xula, benne' nigá gune' dul-la súalene' nu'ula quebe naque' zru'ule', na' che nu benne' biu xequé'e tu nu'ula nusán benne' chee', cá'ancheze gun dul-la bènnea' súalene' nu'ula quebe naque' zru'ule'.

<sup>10</sup> Nadxa benne' ca' dxusede Jesús gulé'e Le':

—Che ca' dxaca chee benne' zúalene' nu'ula, quebe dxal-la' súalentu' nu'ula.

<sup>11</sup> Jesús guzre' benne' ca':

—Quegá xúgute' benne' gaca xelezí'e dizra' nigá, san tuze benne' ca' ba nun Dios chee' xelezí'e na.

<sup>12</sup> Zaj zra' benne' quebe dxelezúalene' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bènneache naca caní. Na' zaj zra' benne' dxelexegá'ane' cá'aze, quebe nu dxelezúalene' chee gaca xelune' zrin chee Dios, Bènnea' dxenná be'e xabáa. Benne' gaca si'e dizra' nigá dxal-la' si'e na.

*Jesús dxenabe' gaca chawe' chee bidu ca'*  
*(Mr. 10.13-16; Lc. 18.15-17)*

<sup>13</sup> Nadxa belezrín benne' lau Jesús zaj naché'e bal-la bidau' chee guzé ne'e bidu ca', ne nabe' Dios gaca chawe' cheebe', san benne' ca' dxusede Jesús gulezú lawe' dxeledil-le' benne' ca' zaj naché'e bidu ca'.

<sup>14</sup> Jesús guzre' le':

—Le güe bidu ca' lataj xelesa'be' naga zua'. Quebe guzrúnnale-be', lawe' da benne' zaj naque' ca bidu caní xelu'e naga dxenná bea Dios xabáa.

<sup>15</sup> Nadxa bze Jesús ne'e lawe' bidu ca', na' gudé na' bezé'e lataj na'.

*Tu benne' cuide' nape' xel-la' gunní'a*  
*(Mr. 10.17-31; Lc. 18.18-30)*

<sup>16</sup> Tu benne' cuide' guxíaje' naga zua Jesús, na' bchebe' Le':

—Benne' Wesede chawe'. ¿Bi da xrlátaje dxal-la' guna' chee gapa' xel-la' nabán zeajlí canna?

<sup>17</sup> Jesús guzre' le':

—¿Bizr chee na' dxu'u neda', benne' wesede chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca bdxixruj be'e Dios.

<sup>18</sup> Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalenu' zru'ula benne' xula. Quebe cuanu'. Quebe nneu' da wen lazre' chee benne'.

<sup>19</sup> Gudapa ba lá'ana xra xrna'u. Bzri'i le sa' ljwezru' ca nazrí'i cuinu'.

<sup>20</sup> Benne' cuide' na' gunné':

—Xúgute da caní dxuna' nácatea' bídau'te. ¿Bíradxa quebe ne guna'?

<sup>21</sup> Na' guzre Jesús le':

—Che dxaca lazru' gacu' benne' li lazre', bexíaj, xeajete ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

<sup>22</sup> Gate benne' cuide' na' benne' da nigá, bezé'e dxexíaje lazre' lawe' da nápalé'e xel-la' gunní'a.

<sup>23</sup> Nadxa gunná Jesús, dxé'e benne' ca' dxusédene':

—Da li dxapa' le'e, stébele'e naca chu'u tu benne' gunní'a naga dxenná bea Dios xabáa.

<sup>24</sup> Da xula dxapa' le'e, chadidxa gaca te tu bea', be dxebía bénneache lu negue' tu xeche' zriche, quézcala chu'u tu benne' gunní'a naga dxenná bea Dios.

<sup>25</sup> Gate belenne' benne' ca' dxuséde Jesús da nigá, na' belexebánele'ene', na' buluchebe ljwezre':

—¿Nuzra la xca'?

<sup>26</sup> Jesús guné'e benne' ca', ne guzre' le':

—Da nigá quebe gaca xelún bénneache, san Dios waca guné' ca naca.

<sup>27</sup> Nadxa gunná Pedro:

—Xran, netu' ba bcá'anantu' ca naca da nápantu', ne zéajentu' Lue'. ¿Bizra gápantu' xca'?

<sup>28</sup> Bechebe Jesús:

—Da li dxapa' le'e, ca lu zra na' gate na' xúgute xelexaca na cube, gate neda', Benne' Gulje' Bénneache, cue'a lataj chawe' chia' naga nna be'a, le'e na' ba gudálele neda' cué'quezle lu chazrinnu lataj naga nna beale, chee guchí'ale

chee chazrinnu cue' benne' Israel, benne' judío ca'.

<sup>29</sup> Xúgute benne' ca' ba bulucá'ane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee', chee xelune' zrin chia', xelezí'queze' tu gaxúala na, ne xelezí'queze' xel-la' nabán zeajlí canna.

<sup>30</sup> Benne' zante zaj naca blau na'a xelaque' benne' bzebe, na' benne' zante zaj naca benne' bzebe na'a xelaque' benne' blau.

## 20

### *Da dxulé'e na ca naca chee benne' wen zrin ca'*

<sup>1</sup> Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete cue' xezr la xu guzé'e lizre' che zílala, zéaje' zeajtílaje' benne' wen zrin ca' chee cheajlechibe' uva chee'.

<sup>2</sup> Bca'ana cháwelenē' benne' wen zrin ca' quízruje' tu dumí lazruj chee tu zra, na' guselē' benne' ca' zeajleguene' zrin lu xezr la xu chee'.

<sup>3</sup> Ca gudé na' guzé'e lizre' ca dxedá na, na' blé'ene' benne' zaj zre'e lawe' xi'a zaj nalátajze'.

<sup>4</sup> Na' guzre' benne' ca': "Cá'anqueze le'e, le chjaca wen zrin lu xezr la xu chia', na' gunna' le'e da naca chawe'." Na' benne' ca' xjaque'.

<sup>5</sup> Xrane na' guzé'e da xula wa gubizra, ne cá'anqueze dxexedá' chunna, ne tuze ca bene'.

<sup>6</sup> Xetú du dxedá' gazxu guxíaje' lawe' xi'a, na' blé'ene' zaj zra' na' benne' zaj nalátajzqueze', ne guzre' le': "¿Bizr chee na' zrale le'e nigá bedú zra quebe bi zrin dxunle?"

<sup>7</sup> 'Gulenné': "Quebe nu ne xē netu' guntu' zrin chee'."

'Na' guzre' benne' ca': "Cá'aqueze le'e, le cheajén zrin lu lina chia', na' gunna' le'e da naca chawe'."

<sup>8</sup> Gate gul-la' chizrela, xrane na' guzre' benne' xu'u lu nē'e zrin na': "Gunné benne' wēn zrin ca', ne gudízrujē', su lau' quízruju' benne' ca' bebelá' bzébedxa, na' bzébetē quízruju' benne' ca' bebelá' nédxute'."

<sup>9</sup> Nadxa belezrín benne' ca' belú'e lu zrin na' gate dxexedadxa gazxu', na' tu tu benne' ca' belezi'e lazruj chee' du naxá' lazruj tu zra wēn zrin.

<sup>10</sup> Gudé na' gate belezrín benne' ca' gulu'e nédxute lu zrin na', guléquenē' xelezí'e da zrendxa, san cá'aqueze gulezí' tu tu benne' ca' lazruj tu zra wēn zrin weaj.

<sup>11</sup> 'Gate gulezí'e na, na' gulezú lawē' dxelawē' zria lau xrane zrin na',

<sup>12</sup> dxelenné': "Benne' caní bebelá' bzébedxa, tu chí'idau'ze ga belunē' zrin, na' gudízrujquezu' benne' caní ca' gudízruju' netu', na' netu' bedú zra bēntu' zrin, ne ca naca da la chee zra nigá bchaga launtu'."

<sup>13</sup> 'Bechebe xrane na', dxē'e tu benne' ca': "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelēna' lue' quízruja' lue' lazruj tu zra wēn zrin?"

<sup>14</sup> Guzí' lazruj chiu', ne bexíaj. Neda' dxaca lazra' gunézruja' chee benne' ca' belú'e bzébedxa ca da gudízrujqueza' lue'.

<sup>15</sup> ¿Quebe gaca guna' ca da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje?"

16 Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunnía' benne' zan, san bábaze benne' ca' xelaque' blau.

*Xecha lasa dxuchalaj Jesús ca gaca gate gatié'*  
(Mr. 10.32-34; Lc. 18.31-34)

17 Gate xu'u Jesús neza, zexíaje' Jerusalén, guléaje' cheeze benne' chazrinnu ca' dxusédene', ne guzre' le':

18 —Dxelé'ele le'e ba zexíajdxu Jerusalén naga neda', Benne' Gulje' Bénneache, xuludé benne' ca' neda' lau benne' xíchaje' ca' chee bxruze ca', ne lau benne' ca' dxuluxuzájle'e da bdxixruj be'e Dios, na' xelechugue' chia' gatia'.

19 Xuludé' neda' lu na' benne' zitu' ca' chee xelún le' chia', na' xelu'e neda', ne xuludé'e neda' xaga béguaj, san zra guxunne zra xebana'.

*Da gunaba xrna Jacobo ne Juan*  
(Mr. 10.35-45)

20 Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribe' lau Jesús, dxenabe' culuén.

21 Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabela chiu', ne xetube' xéglala.

22 Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi'

da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

<sup>23</sup> Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chalá'a xabeła chia', ne chalá'a xéglala chia' quebe naca na chia' gunna' na le'e. Xra' gunézruje' na chee bi ca' ca da ba nucueze'.

<sup>24</sup> Gate xechí benne' ca' dxusede Jesús belenne' ca', na' belezré'e dxupa bi chee nu'ula na'.

<sup>25</sup> Jesús gunné' benne' ca', ne guzre' le':

—Ba nézele le'e ca dxelún benne' xíchaje chee xezr la xu ca', dxelenná bé'ene' benne' ca', na' benne' nácadxe' blau ládujla benne' ca' dxelenná be'e, dxuchínene' xel-la' dxenná bea chee'.

<sup>26</sup> Le'e quebe dxal-la' gunle ca'. Benne' dxaca lazre' gaque' blau ládujla le'e dxal-la' gune' zrin chee xezícadxale le'e,

<sup>27</sup> na' bénnea' dxaca lazre' gaque' xíchaje chee, dxal-la' gaque' wen zrin chee xúgutēle le'e.

<sup>28</sup> Dخال-la' gune' ca bēna' neda', Benne' Gulje' Bēneache, quebe bida' chee nu gun zrin chia' neda', san bla'a chee guna' zrin chee bēneache, ne chee guzúa' xel-la' nabán chia' ca da quízruja' chee guselá' benne' zante.

*Jesús dxexune' chupa benne' la chul-la*

*(Mr. 10.46-52; Lc. 18.35-43)*

<sup>29</sup> Gate dxelexedxúaje' xezre Jericó, na' benne' zante zjácālene' Jesús.



<sup>30</sup> Naga dxeledé' zaj dxe' chupa benne' la chul-la dxu'a neza, na' gate belenné' dxedé Jesús na' gulebezre xe'e, dxelenné':

—Xran, Zri'ine David, bexache lazre' netu'.

<sup>31</sup> Benne' zan ca' guledil-le' dxúpaté' na' chee xelezúe' zrize, san le' gulebezre xe'e zízrajdxá, dxelenné':

—Xran, Zri'ine David, bexache lazre' netu'.

<sup>32</sup> Nadxa Jesús guleze', na' gunné' benne' la chul-la ca', na' bchebe' le':

—¿Bi dxaca lázrele guna' chee?

<sup>33</sup> Belexechebe benne' ca':

—Xran, dxaca lázrentu' xelé'entu'.

<sup>34</sup> Jesús bexache lazre' benne' ca', ne bte' xiaj lawe'. Na' belexelé'ete' benne' la chul-la ca', na' xjácálené' Jesús.

## 21

*Ca da guca gate bexú'u Jesús Jerusalén  
(Mr. 11.1-11; Lc. 19.28-40; Jn. 12.12-19)*

<sup>1</sup> Gate belezrín Jesús, ne benne' ca' dxusédene' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédene' chee tu da xelune'.

<sup>2</sup> Dxe'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúaleba' leba'. Le seze-ba', ne le che'e dxúpatéba' nigá.

<sup>3</sup> Che nu benne' bi xe'e le'e, le xe'e: “Xránadxu nachinne' leba', na' la xesél-la'tequeze'-ba'.”

4 Da nigá guca na chee guxá ca da gunná benne' bchálaje' waláz chee Dios, gunné':

5 Le xe benne' zaj zra' xezre Sión:

“Le nna', Benne' nna bé'ene' le'e ze'e naga zúale. Dutę xel-la' dxexruj lazre' zrie' tu burro bzrise'. Zrie' tu búrrodau', zri'ine tu be dxua xua.”

6 Nadxa dxupa benne' ca' dxusede Jesús be-siá'que', ne belune' ca da ba gunná be'e Jesús le'.

7 Xeajlexrí'e burro bzrise', ne zrí'ineba', na' belezrúe' zra lane' cúzruba', na' guzría Jesús leba'.

8 Benne' zan ca' gulechílaje' zra lane' la neza na', na' xebal-le' buluchibe' zina' da buluzale' la neza.

9 Benne' zjaque' lówela, ne benne' zá'aque' bzebe gulezú lawe' dxelebezre xe'e, dxelenné':

—¡Gaca ba lá'azxa Zri'ine wenná bea David! ¡Ba neza zrente naca na chee bēneea' ze'e waláz chee Xránadxu Dios! ¡Gaca ba lá'azxa Dios!

10 Gate guxú'u Jesús xezre Jerusalén, ca naca bēneache zaj zře'e na' beledxé'ena zrague', na' buluchebe ljwezře':

—¿Nuzra benne' nigá?

11 Bal-la benne' ca' gulenné':

—Benne' nigá naque' Jesús, benne' dxuchálaje' waláz chee Dios, ze'e xezre Nazaret da nababa Galilea.

*Jesús dxuchi'e lu xudau'*

*(Mr. 11.15-19; Lc. 19.45-48; Jn. 2.13-22)*

12 Ca gudé na' guxú'u Jesús dxale'aj xudau' chee Dios, na' bebéaje' xúgute benne' wete, ne benne' dxelá'awe' na'. Bdxixre' blag ca' chee benne' ca' dxuluché'e dumí, ne bdxixre' da ca' zaj dxe' benne' ca' dxelútię' bgúgudu ca'.

13 Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bénneache lawa' neda’”, san le'e ba nunle na ca tu lizre gubán.

<sup>14</sup> Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexunē' benne' ca'.

<sup>15</sup> Belezrá' benne' xíchajē ca' cheē bxruze ca', ne benne' ca' dxuluxuzájle'ē da nadxixruj bea Dios, gate na' belenne' ca' dxelebezre xa'a bidu ca' lu xudau', dxelennabe': “¡Gaca ba lá'azxa zri'ine wenná bea David!”

<sup>16</sup> Gulé'ē Jesús:

—¿Dxennu' ca' dxelenná benne' caní?

Bechebe Jesús:

—Dxenda' na. ¿Quebe ne gulábale le'e lu xiche lá'azxa naga naxúaj na cheē da dxaca nigá? Dxenná na caní:

Ba benu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

<sup>17</sup> Nadxa bca'ana Jesús benne' ca'. Bezé'ē xezre na', na' bezrine' xezre Betania, naga bejgá'ane' xela na'.

*Jesús dxugu'ē de' xaga higo*

*(Mr. 11.12-14, 20-26)*

<sup>18</sup> Che zílala ca' zexíaj Jesús xezre na', na' gudunē'.

<sup>19</sup> Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre cheē na blé'ene'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete' xaga higo na'.

<sup>20</sup> Ca belelé'e benne' ca' dxusēde Jesús da nigá, na' belexebánene', ne buluchebe' Jesús:

—¿Ájazra na' chadite gubizre xaga higo nigá?

<sup>21</sup> Bechebe Jesús:

—Da li dxapa' le'e, che nápaie xel-la' dxeajlí lazre', ne quebe gun chupa lázrele, quegaze da nigá gaca gunle ca da bēna' neda' chee xaga higo nigá, san waca xeḷe xi'a nigá: Gucuasa nigá, xeajsúa lu nísadau', na' gaca na.

<sup>22</sup> Che dxeajlí lázrele, na' xezi'le bíteteze da nábaie Dios.

*Xel-la' dxenná bea da xu'u lu na' Jesús*

*(Mr. 11.27-33; Lc. 20.1-8)*

<sup>23</sup> Nadxa guxú'u Jesús lu chila xudau', na' dxácate na' dxusédene' benne' zaj zre'e na', gulebiga naga zua Jesús benne' xíchaje ca' chee bxruze ca', ne benne' gula chee judío ca', na' buluchebe' Le':

—¿Bi xel-la' dxenná bea napu' dxunu' da caní? ¿Núzraqueze bēna lue' xel-la' dxenná bea nigá?

<sup>24</sup> Bechebe Jesús:

—Cá'anqueze neda' gucheba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní.

<sup>25</sup> ¿Nu benne' gusel-le' Juan dxuchúe' bēneache nisa? ¿Dios, che bēneacheze?

Gulezú lawe' dxuluchálajle ljwezre', dxeleñé':

—Che nnadxu Dios gusel-le' le', na' xe'e dxi'u: “¿Bizr chee na' quebe guxéajlele chee'?”

<sup>26</sup> Che nnadxu bēneache gusel-le' le', dxal-la' zrēbedxu bi xelún benne' zan ca' cheedxu dxi'u, lawe' da dxeleque xúgute bēneache bchalaj Juan na' waláz chee Dios.

<sup>27</sup> Chee le' na' gulé'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

*Da dxulé'e na ca naca chee chupa bi biu chee tu benne'*

<sup>28</sup> Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zrí'ine' bi biu, na' guzre' tube': “Zrí'ina', guxíaj xeajén zrin lu lina chee uva chia'.”

<sup>29</sup> Zrí'ine' na' bechébebe': “Quebe dxaca lazra'.” Ca gudé na' bexíaje lázrebe', na' guxíajbe' xeajénquezbe' zrin.

<sup>30</sup> Cá'anqueze xrabe' na' guxíaje' xeajné'ę xetube', ne guzre'-be', na' bi nigá bechébebe': “Waca, xrae. Na'a cha'a.” Quebe guxíajbe'.

<sup>31</sup> ¿Núlabe' bi chupa caní benbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxé'ę benne' ca':

—Da li dxapa' le'e, benne' wechizruj ca', ne nu'ula dxeledále benne' biu zante xelexú'ę naga dxenná bea Dios nédxudxa ca le'e

<sup>32</sup> lawe' da bla' Juan, bedajlé'ene' le'e da naca xrlátaje, na' le'e quebe guxéajle chee'. Benne' wechizruj ca', ne nu'ula ca' dxeledále benne' biu zante guléajle'ę chee'. Le'e, gate ble'ele da nigá, quebe bexíaje lázrele chee chéajle chee'.

*Da dxulé'e na ca naca chee benne' wen zrin calęla ca'*

(Mr. 12.1-12; Lc. 20.9-19)

<sup>33</sup> Nadxa gunná Jesús:

—Le xene ca naca da nadxixruj bea nigá. Tu benne' xrane tu xezr la xu guze' lba uva ca', ne bene' le'aj chee na. Bene' tu xedxu naga xelesie' uva ca', ne guchise' tu xu'u sibe chee gaca nu guxúe ca naca na. Na' bca'ane' na lu na' benne' wen zrin ca', ne guze'e zéaje' zitu'.

<sup>34</sup> Gate bzin zra xuluchibe' uva ca', na' gusel-le' tu chupa bi wen zrin chee' zeajlexezri'be' da dxal-la' xezí' xrane na'.

<sup>35</sup> Benne' wen zrin ca' guleque'e bi wen zrin chee' ca'. Belúele'e tube', ne belutie' xetube', na' xetube' buluzrie'-be' xiaj.

<sup>36</sup> Nadxa xrane na' gusel-ladxé' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'.

<sup>37</sup> Naga xejché'tequeze na gusel-le' zrí'inequeze' lawe' da dxéquené': Welape' ba lá'ana zri'ina'.

<sup>38</sup> Gate belelé'ene' zrí'ine', na' benne' wen zrin ca' gulé ljwezre': “Bi nigá xezí' lu na'be' ca naca da caní. Du gute-be' chee xegá'ana cheedxu da caní.”

<sup>39</sup> Chee le' na' gulele'-be', ne belexebéaje'-be' lu xezr la xu na', na' belutie'-be'.

<sup>40</sup> Nadxa Jesús bchebe' benne' ca':

—Gate xida xrane xezr la xu na', ¿ájazra guné' chee benne' wen zrin ca'?

<sup>41</sup> Gulé'e Le':

—Gutie' benne' ca' dxelune' da calela ne quebe xexache lazre' le'. Nadxa gucá'analene' xezr la xu na' benne' wen zrin xula, benne' xuluxunézruje' da dxal-la' xezí' le' gate zrin zra chee na.

<sup>42</sup> Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na:

Xiaj na' da buluzúa benne' wən xu'u ca' chalá'ala,  
 lē na' naca na xiaj blau na'a.

Da nigá naca na da bən Xránadxu,  
 ne naca na tu da dxexebánedxu.

<sup>43</sup> Chee lē na' dxapa' le'e, Dios wequé'e da naca  
 chee le'e naga dxenná be'e, na' gunézruje' na  
 benne' xelunē' da naca chee xel-la' dxenná bea  
 chee Dios.

<sup>44</sup> Che tu benne' cheajchazie' lawe' xiaj nigá  
 waxúzruje', na' che xexruj na lawe' tu benne', na'  
 guzuzruj na lē'.

<sup>45</sup> Gate benne' xíchaje ca' chee bxruze ca', ne  
 benne' xudau' fariseo ca' belenne' da bchalaj  
 Jesús, guleque bé'ene' chee lé'queze' bchalaj Jesús  
 da caní.

<sup>46</sup> Gate gulaca lazre' xelele' Le', belezrebe'  
 benne' xezre ca' lawe' da dxeléajle benne' ca' naca  
 Jesús benne' dxuchálaje' waláz chee Dios.

## 22

### *Da dxulé'e na ca naca chee laní wechaga na'*

<sup>1</sup> Guzú lau Jesús dxuchálajlene' benne' ca' xecha  
 lasa tu da dxulé'e na, dxē'e lē':

<sup>2</sup>—Ca da gaca xabáa naga dxenná bea Dios naca  
 na ca da guca gate tu benne' wenná bea bene' tu  
 laní wechaga na' chee bi biu chee'.

<sup>3</sup> Gusel-lē' benne' wən zrin chee' ca' cheajletupe'  
 benne' ca'an gunné' lizre', san benne' ca' quebe  
 gulaca lazre' xédajgaque'.

<sup>4</sup> Nadxa gusél-ladxē' benne' wən zrin chee' ca',  
 benne' xula. Dxē'e lē': “Le xe benne' ca' gunnía',  
 ba nucueza' xel-la' wagu. Ba gunná be'eda' xelútie'

beze ca', ne be dxelanne, na' ca naca na bache de. Dخال-la' xeलेlé'e nigá naga zra' wechaga na'."

<sup>5</sup> Benne' ca' gunné' quebe gulaca lazre' xédajgaque'. Tu benne' ca' guxíaje' lu xezr la xu chee', ne xetú benne' guxíaje' wete.

<sup>6</sup> Xebal-la benne' ca' gulele' bi wen zrin ca' chee' wenná bea na', na' bulucháchalene'-be', ne belútete'-be'.

<sup>7</sup> Nadxa wenná bea na' bzrá'ale'e, na' guselle' benne' chee' ca', benne' zjaca wedil-la xea-jleguétie' benne' wete benne' ca', ne xea-jlezéze'te' lazre' benne' ca'.

<sup>8</sup> Nadxa guzre' bi wen zrin chee' ca': "Bal-la bi de ba de chee' wechaga na', na' benne' ca' gunnía' quebe zaj naca chee' xeलेlé'e.

<sup>9</sup> Le hjaca neza zri'a ca', ne le nne' xúgute' benne' lé'ele, chee' xeलेlé'e laní chee' wechaga na'."

<sup>10</sup> Benne' wen zrin ca' xjaque' la neza ca', na' xea-jletupe' xúgute' bèneache, benne' belelé'ene' zaj naque' benne' calela, ne benne' xrlátaje. Ca'an guca guzrate' xu'u na' bèneache.

<sup>11</sup> Nadxa wenná bea na' guxú'e xea-jné'e benne' ca' gunné', na' blé'ene' tu benne' dxe'e na', quebe nazi'e zra lane' chee' laní chee' wechaga na'.

<sup>12</sup> Guzre' le': "Lue', benne', ¿ájazra guca guxú'u nigá, ne quebe nazi'u zra lanu' chee' laní wechaga na'?" Bénnea' gudxé'e zrize.

<sup>13</sup> Nadxa wenná bea na' guzre' bi zaj zúabe' ga na', "Le guchéaj ni'a ne'e, ne le guzale' chalé'ajla naga naca chul-la, naga cuezre', ne xáguxa'ate' lazxe'."

<sup>14</sup> Benne' zante' gunnía', na' bábaze' zaj naca chee' xelu'e nigá.



*Ca naca chee dumí da dxuluchízruje'*  
(Mr. 12.13-17; Lc. 20.20-26)

<sup>15</sup> Nadxa benne' fariseo ca' besiá'que', ne belune' tuze dizra' xelebéaje' Jesús dizra' chee xelezéquene' xelawe' zría chee'.

<sup>16</sup> Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, chee zeajleguezre' Jesús:

—Benne' wesede, nézentu' dxenníu' da li, ne dxusédenu' da li da zaj naca chee Dios, ne quebe dxezrebu' bi xelenná bénneache, ne quebe dxenná'u ca da zaj napa bénneache.

<sup>17</sup> Gunná xque. ¿Aja dxéquenu' lue'? ¿Dxun na ba xen quízrujdxu da dxuluchizruj benne' ca' nase-la César, benne' zitu', che cabí?

<sup>18</sup> Jesús ba nézene' ca da dxelaca lazre' xelune' chee', na' guzre' benne' ca':

—Le'e, láweze dxunle da xrlátaje. ¿Bizr chee na' dxuzúale da guzría xi na neda'?

<sup>19</sup> Le gulé'e neda' dumí na' da dxízrujle chee wechizruj.

Nadxa bulunézruje' Le' tu dumí chee xezre Roma.

<sup>20</sup> Gate blé'ene' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

<sup>21</sup> Belexechebe':

—Chee César na'.

Na' guzre Jesús benne' ca':

—Le gunezruj chee César da naca chee César, ne le gunezruj chee Dios da naca chee'.

<sup>22</sup> Gate belenne' da nigá, na' belexebánene', ne besiá'que' naga zua Jesús.

*Da buluchebe' Jesús chee benne' xelexebane' ládujla benne' gate*

*(Mr. 12.18-27; Lc. 20.27-40)*

<sup>23</sup> Zra ná'queze belezrin bal-la benne' saduceo ca' naga zua Jesús. Benne' saduceo ca' dxelenné' quebe xelexebán benne' gate. Gulé'e Jesús:

<sup>24</sup> —Benne' wesede, Moisés gunné' che tu benne' nuchaga ne'e gatié', ne quebe nu bidu chee' chilá', na' bi biche' dxal-la' guchaga na'abe' nen nu'ula gute benne' biu chee' na' chee sua tu bi chee benne' ba gutié'.

<sup>25</sup> Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zri'ine bi nedxu na' gúlajbe'.

<sup>26</sup> Cá'anqueze gúcaqueze na chee bi gudxupe', na' gudé na' chee bi guxunne', na' cá'anqueze guca chee xúguté bi gazre ca'.

<sup>27</sup> Ca gudé na', na' gute nu'ula na'.

<sup>28</sup> Gate xelexebán benne' gate, ¿nula bi gazre caní gácabe' benne' chee nu'ula na' lawe' da tu tu bi gazre ca' bchaga na'abe' nen nu'ula na'?

<sup>29</sup> Jesús bechebe':

—Le'e dxeque zréajele lawe' da quebe núnbeale da naxúaj na lu xiche lá'azxa, ne ca naca xel-la' waca chee Dios.

<sup>30</sup> Gate zrin zra xelexebán benne' gate, québedxa xuluchaga na' bénneache, ne québedxa xelútié' bi nu'ula chee xuluchaga na'abe'. Xelaque' ca zaj naca gubáz chee xabáa chee Dios.

<sup>31</sup> Ca naca na che dxal-la' xelexebán benne' gate, ¿quebe ne gulábale le'e ca gunná Dios? Gunné':

<sup>32</sup> “Neda' naca' Dios chee Abraham, ne Dios chee Isaac, ne Dios chee Jacob.” Dios quebe naque' Dios chee benne' gate, san naque' Dios chee benne' ban, benne' ca' ba gultatie' lu xezr la xu nigá.

<sup>33</sup> Gate belenne' da nigá, na' belexebane benne' ca' ca naca da dxusede Jesús.

*Da gunná be'e Dios da naca blau*

*(Mr. 12.28-34)*

<sup>34</sup> Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'.

<sup>35</sup> Tu benne' ca', benne' naque' benne' dxux-uzájle'e da nadxixruj bea na, guca lazre' guxúe' ájala nne Jesús. Bchebe' le':

<sup>36</sup> —Benne' wesede, ¿bizrla da gunná be'e Dios naca blau?

<sup>37</sup> Bechebe Jesús:

—Dxal-la' zri'inu' Xranu' Dios dute xichaj lázrda'u, ne dute bénne'du xu'u, ne dute xel-la' dxéajni'i chiu'.

<sup>38</sup> Da nigá naca da nadxixruj bea da blaudxa, ne da dxundxa na ba xen.

<sup>39</sup> Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazrí'i cuinu'.

<sup>40</sup> Che tu benne' dxune' ca zaj naca chupa da nadxixruj bea caní, dxune' ca naca xúgute da nadxixruj bea da bzuaj Moisés, ne ca naca xúgute da bulusede benne' ca' buluchálaje' waláz chee Dios.

*¿Nuzra zri'ine naca Cristo?*

*(Mr. 12.35-37; Lc. 20.41-44)*

<sup>41</sup> Dxácatę ne zaj nazraga benne' fariseo ca' na',

<sup>42</sup> Jesús bchebe' le':

—¿Ájala dxéquele le'e chee Cristo? ¿Nuzra zri'ine naque'?

Benne' ca' gulé'e Le':

—Zri'ine David na'.

<sup>43</sup> Nadxa guzre Jesús benne' ca':

—¿Ájazra na' David gate bchálaje' chee Cristo dxé'e Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

<sup>44</sup> Xrana' Dios guzre' Xrana':

“Gudxé'e chalá'a xabela chia' cadxa guzúa' zran ni'u benne' ca' quebe chawe' dxelelé'ene' Lue'.”

<sup>45</sup> ¿Ájazra naca na naca Cristo zri'ine David, che David ná'queze dxé'e Le': “Xrana”?

<sup>46</sup> Quebe nu benne' guca xechébequeze' chee', na' ze lau zra na' netú québedxa nu bexazre bi guchébedxa Le'.

## 23

*Jesús dxedil-le' benne' xudau' ca'*

*(Mr. 12.38-40; Lc. 11.37-54; 20.45-47)*

<sup>1</sup> Nadxa Jesús guzre' benne' ca' zaj zre'e na', ne benne' ca' dxusédene',

<sup>2</sup> dxenné':

—Benne' ca' dxuluxuzájle'e da nadxixruj bea Moisés, ne benne' xudau' fariseo ca' zaj nape' xel-la' dxenná bea xuluxuzájle'e da nadxixruj bea Moisés.

<sup>3</sup> Chee le' na' le guzúa dizra' chee benne' caní, ne le gun xúgute da xelenné'. Quebe gunle ca da dxelún benne' ca', lawe' da dxelenné' da ca' dxal-la' gunle, na' quebe dxelúnqueze' na.

4 Dxelunē' xua zí'ile'e da quebe dxelezeque xelezúe bēnneache, ne dxelenná bé'ene' bēnneache chee xelu'e na. Benne' ca' ne quebe dxuluzúe' na netú zrube ne'e chee da dxuluzúe benne' xubla.

5 Xúgute da dxelún benne' ca' naca na chee xeelé'e bēnneache. Dxeledánnene' dxelu'e luzxgue', ne ne'e ladxe' laga naga naxúaj dizra' chee Dios, ne dxelácue' zra lane' da zeajzé luzre na tunna.

6 Dxelaca lazre' xelebé'e naga ze láweze naga dxelawe', ne naga naca blau lu xu'u ca' naga dxeledube'.

7 Dxelaca lazre' xelapa bēnneache le' ba lá'ana la neza ca', ne xelé'e le': "Benne' wesede."

8 Na'a le'e, quebe güele lataj nu xe le'e, "Benne' wesede", lawe' da xúgutele nácale bi bíchele tule xetule, ne tuze Benne' dxusédenē' le'e, neda', Cristo.

9 Quebe nu xe le'e: Xrae, lu xezr la xu nigá, lawe' da zua tuze Xrale, Dios na' zuē' xabáa.

10 Quebe güele lataj nu xe le'e: Xran, lawe' da zua tuze Xránale, neda', Cristo.

11 Bēnnea' dxunē' zrin chee xezícadxale le'e nácadxe' blau ládujla le'e.

12 Bēnnea' dxucá'ana szren cuine' wexéxrujla bēnnea', na' bēnnea' dxaque' dxexruj lazre' wegá'ane' szren.

13'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxsézxujle neza chee xabáa chee quebe nu chu'u na. Lé'equeze quebe dxú'ule, ne quebe dxuele lataj benne' dxelaca lazre' xelu'e.

14'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle

da xrlátaje. Dzegúale lizre nu'ula ca' ba gulate benne' biu chee', na' chee xulé'ele xrlátaje cuínale, dxuwízrale Dios xcha lu xudau'. chee le na' da zrente da guzría xi na le'e.

<sup>15</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Le'e dxedale du ca naca xezr la xu nigá ne ca naca nísadau' chee si' tu benne' ca naca da zéajlele chee Dios, na' gate bache dxunle na, na' dxugápadxale bénnea' dul-la ca da nabágale le'e chee cuía xi'e lu lataj ba xa'.

<sup>16</sup> 'Edxugua le'e. La chul-la nácale, ne dxaca lázrele cu'ule benne' neza. Dxennale che tu benne' dxuzétaje' xudau', quebe dxun na le' ba xen, na' che dxuzétaje' oro chee xudau', da na' dxun na le' ba xen.

<sup>17</sup> Nácale benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na'?

<sup>18</sup> Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétaje' guna' da zria na lawe' cugu lá'azxa, da na' dxun na le' ba xen.

<sup>19</sup> Nácale benne' xala ne la chul-la. ¿Nula da naca na blaudxa, guna' na', u cugu lá'azxa na' da dxucá'ana na lá'azxa guna' na'?

<sup>20</sup> Che nu benne' dxuzétaje' cugu lá'azxa, quegaze cugu lá'azxa dxuzétaje', san cá'anqueze dxuzétaje' ca naca da zria lawe na.

<sup>21</sup> Bénnea' dxuzétaje' xudau', quegaze xudau' na' dxuzétaje'. Cá'anqueze dxuzétaje' Dios zu'e lataj na'.

<sup>22</sup> Cá'anqueze benne' dxuzétaje' xabáa, dxuzétaje' lataj naga zria Dios, ne Diósqueze, Bénnea' zrie' lataj

na' dxuzétaje'.

<sup>23</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle chee xudau' tu cue' chee da chi cue' chee xixruj weaj, ne chee binnedu ca' chee anís, ne chee cumín. Quebe dxunle da zaj naca na blaudxa da zaj zua na lu da nadxixruj bea na, ca naca chee gácale xrlátaje, ne chee xexache lázrele le sa' ljwézrele, ne chee chéajlele chee Dios. Da caní zaj naca na da dxun na ba xen gunle, ne quebe gusanle da ca' ba dxunle.

<sup>24</sup> La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', be zrua lawe' da dxí'ajle, na' quebe dxeque be'ele dxí'ajle da naca ca tu camello, be dxelaga benneache.

<sup>25</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lázrdaule nácale ca gubán, ne benne' dxucude.

<sup>26</sup> Benne' fariseo la chul-la. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrela.

<sup>27</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtante cúzrela, na' lu'ule na nazrate na zrita chee benne' gate', ne xúgute da sgute.

<sup>28</sup> Ca'an nácale le'e. Cúzrela nala'le ca benne' xlátaje, na' lu lázrdaule nazrate na da wen lazre', ne da calela da dxunle.

29 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxucá'anale cháwedau' ba ca' naga zaj nagache benne' ca' buluchálaje' waláz chee Dios, ne dxuele lechítaje lu'a chee benne' xrlátaje ca'.

30 Dxennale: “Chela netu' ba zúantu' gate na' gulezrá' xra xrtauntu' ca', quebe gúcalentu' benne' ca' belutię' benne' ca' buluchálaje' waláz chee Dios.”

31 Gate dxennale ca', le'e dxexúnbeaquezle nácale zri'ine zre sua benne' ca' belutię' benne' ca' buluchálaje' waláz chee Dios.

32 Dxusexúzrele dxunle ca da gulezú lau belún xra xrtáule ca'.

33 'Be snia nácale, ne xrtia be snia. ¿Ájazra gunle chee gáchele lu da zi' da xa' chee lataj ba xa'?

34 Chee le na' neda' sel-la' chee benne' ca' xuluchálaje' waláz chee Dios, ne benne' sina ca', ne benne' ca' xulusédenę' le'e. Lé'eqeze gútele, ne gudá'le xaga béguaj bal-la benne' ca', na' xebal-le' gunle le' zi' lu xudau' ca', na' gau zi' xúzrele le' tu xezre xetú xezre.

35 Ca'an gaca, le'e bágale zria chee xel-la' gute chee xúgute benne' xrlátaje ca' belute xra xrtáule ca', gate guzú lau na nu bęte Abel, benne' xrlátaje, ne naga bzrintę bętele Zacarías ládujla naga zua lataj lá'azxa chee xudau' ne lataj naga dxuluzezxe' be xíxre'du ca', be dxelegú'e lu cugu chee Dios.

36 Da li dxapa' le'e, bėnneache zaj zre'e na'a xelebague' zria chee xúgute da caní.

*Jesús dxebezre' chee xezre Jerusalén  
(Lc. 13.34-35)*

37 Nadxa gunná Jesús:



—Jerusalén, Jerusalén, le'e na' dxútele benne' ca' dxuluchálaje' waláz chee Dios, ne dxuzríale xiaj benne' gubáz ca' dxesel-la Dios naga zúale. Zane' lásate guca lazra' gutupa' zrí'inele chia' ca dxun bedxuj, dxutúpaba' be dxé'enedau' zran xrílabá', san quebe guca lázrele.

<sup>38</sup> Le nna'xque na'a, lízrele xelexegá'ana na dácheze,

<sup>39</sup> lawe' da dxapa' le'e, québedxa lé'ele neda' cadxa zrin zra nnale: La'azxa naca bénnea' ze'e waláz chee Xránadxu.

## 24

### *Jesús dxenné' wabía xi' xudau'*

*(Mr. 13.1-2; Lc. 21.5-6)*

<sup>1</sup> Nadxa bedxúaj Jesús xudau', na' dxácatē dx-exedxúajē' na', gulebiga benne' ca' dxusédene' lau Jesús, ne gulezú lawe' dxuluchálajlene' Le' ca naca chee xudau' na'.

<sup>2</sup> Bechebe Jesús:

—¿Dxelé'ele xúgutē da caní? Da li dxapa' le'e, netú xiaj caní quebe xegá'ana zeajzríá cuzru ljwezre na. Ca naca na cuía xi na.

### *Ca naca da xelunna bea na ba za zra bzēbe*

*(Mr. 13.3-23; Lc. 21.7-24; 17.22-24)*

<sup>3</sup> Nadxa xjaque' lu xi'a naga zaj ze xaga olivo, na' gate dxe' Jesús na', benne' ca' dxusédene' belezrine' lau Le', ne bagácheze buluchēbe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé chee xezr la xu nigá?

<sup>4</sup> Nadxa Jesús guzre' benne' ca':

—Le guxúe cuínale chee quebe nu si xē le'e.

<sup>5</sup> Benne' zan xeलेlé'е. Xelún lazre' xelenné' zaj naque' Cristo, na' xelezí xe'e benne' zan.

<sup>6</sup> Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca da caní. Da caní quebe zaj naca na chee zra bzebe.

<sup>7</sup> Tu cue' xezr la xu tíl-lale na xetú cue' xezr la xu, ne tu xezre tíl-lale na xetú xezre. Wata' gubina', ne welata' xízrawe' ca', ne wazrú' gáteteze na'.

<sup>8</sup> Xúgute da caní zaj naca na naga dxezú lau ca da xelezaca bénneache.

<sup>9</sup> 'Nadxa xuludé' le'e naga si sácale, na' bál-lale welútequeze'. Ca naca bénneache xeleguídene' le'e lawe' da dxunle da naca chia'.

<sup>10</sup> Lu zra na' benne' zan québedxa xeléajle'e chia', na' xeleguídene' le sa' ljwezre', ne xuludé' le sa' ljwezre' lu na' benne' guledábage' le'.

<sup>11</sup> Welelá' benne' zan benne' wen lazre'. Xelenné' dxuluchálaje' waláz chee Dios, na' xelezí xe'e benne' zante.

<sup>12</sup> Lawe' da gáta'le'e da calela, benne' zan québedxa xelezrí'ine' le sa' ljwezre'.

<sup>13</sup> Bénnea' zua chache' ca zrinte zra bzebe, la bénnea'.

<sup>14</sup> Ca naca dizra' chawe' nigá ca nna bea Dios, zralaj na du gabí'i xezr la xu chee xelén ca naca benne' chee xúgute cue' xezr la xu, na' te na' chea-jsé chee xezr la xu nigá.

<sup>15</sup> 'Benne' gulabe' da nigá dxal-la' chéajni'ine'. Daniel, benne' bchálaje' waláz chee Dios, bzuaje' ca naca chee tu da dxezrá'a Dios, da dxuxrinnaj na. Gate lé'ele da nigá zua na lataj lá'azxa chee xudau',

16 nadxa benne' zaj zre'e xezre ca' zaj nababa Judea dxal-la' xuluzrúnnuje', ne chjaque' lu xi'a zren.

17 Che tu benne' ze' chju'u chee', quebe dxal-la' xexétaje' bi cheajxeléaje' lu xu'u. Dخال-la' guzrúnnujte'.

18 Benne' zue' le'e xixre' quebe dxal-la' xezrine' lizre' cheajxezri'e xicha chee' da gácu'e.

19 Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'.

20 Le naba Dios quebe gun na ba xen guzrúnnuje beu' zaga, ne quegá lu zra dxupá'anale,

21 lawe' da che ca' gaca na, na' da zrédexda da xelezí saca bénneache ca da quebe ne xezeaque' ca guzú lautę zua xezr la xu nigá, ne québedxa bi xezeaque' caní ca te chee da nigá.

22 Che Dios quebe guzáchie' zra ca', na' netú quebe nu la. Guzáchie' na chee gácalene' benne' ca' bache nabéaje' chee'.

23 'Chee le na', quebe chéajlele che nu xę le'e: "Le nna'xque, nigá zua Cristo", u che nu xę le'e: "Le nna'xque, na'la zue'."

24 Caní dxapa' le'e lawe' da xeelá' benne' zan, benne' guzrí xę'e, na' xelenné' zaj naque' Cristo, u zaj naque' benne' dxuluchálaje' waláz chee Dios, na' da zrente xululé'ene', ne xelune' xel-la' waca zren ca' chee xelezí xę'e benne' ca' ba nabéaj Dios. Caní xelune' che xelezéquene'.

25 Ba bchálajlena' le'e caníqueze na'a quebe ne gaca na.

26 Chee le na', che nu xę le'e: "Le nna'xque, na' zue' le'e xixre'", quebe chéajle na', u che nu xę le'e: "Le nna'xque, lu xu'u nigá zue'", quebe chéajlele.

27 Ca dxun tu xesa guziu', dxepe na naga dx-alaj gubizra, na' dxelédxu na naga dxebía gubizra, ca'an gaca gate xida' neda', Benne' Gulje' Bénneache.

28 Gáteteze de tu da nate, na' dxexezraga laba ca'.

*Ca da gaca gate ba zua xelá' Benne' Gulje' Bénneache*

*(Mr. 13.24-37; Lc. 21.25-33; 17.26-30, 34-36)*

29 Na' gunná Jesús:

—Gate bache guca zra na' gate xelezaca zi' bénneache, nadxa gubizra chul-la na naga zua na, na' beu' quebe gusení na, na' belaj xelexruj na, na' xelezrízequeze ca naca da zaj naca na szren da dxeledá' lu be'.

30 Nadxa lé'ele zran xabáa da gulé'e na ba zua xelá'a neda', Benne' Gulje' Bénneache, na' ca naca bénneache zaj zre'e xezr la xu xelebézrequeze'. Nadxa xelelé'ene' neda', Benne' Gulje' Bénneache, zezá'a lu beuj zran xabáa, zúale neda' dute xel-la' dxenná bea, ne da xabáa.

31 Nadxa sél-laqueza' gubáz chee xabáa chia' ca', na' xulucuézre' zizraj lúzuba' chee xuluxutupe' benne' ca' ba nabéaja' chia' dapa saca chee xezr la xu nigá, ne du ca naca xezr la xu nigá.

32 'Le gusede ca naca da dxulé'e xaga higo. Gate dxexedxé'ene zruze na, ne dxezría na laga' dxé'ene, ba nézele ba za xaca beu' la.

33 Cá'anqueze gate lé'ele dxelaca xúgute da caní, dxal-la' nézele gágute ba zua cheajsé chee xezr la xu, ne ba zua gaca na.

34 Da li dxapa' le'e, xúgute da caní xelaca na nédxula gate quebe ne xelate bénneache zaj zre'e lu zra na'.

35 Xabáa ne xezr la xu weledé chee na. Dizra' chia' quebe te chee na.

36 Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zri'ine Dios. Tuze Xradxu Dios nézene' gate zrin zra na'.

37 'Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bénneache.

38 Ca lu zra ca' gate quebe ne gun Dios nisa xiuj da guzría xi na bénneache, gulezrá' bénneache ca' dxelé'aj dxelawe', ne dxuluchaga ne'e, ne dxulunézruje' zrí'ine' ca' chee xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazí le na arca.

39 Quebe guleque bé'ene' ca da dxal-la' gaca na, cadxa bzrin zra guca xiuj na', ne bete na ca naca benne' ca'. Cá'anqueze gaca gate xelá'a neda', Benne' Gulje' Bénneache.

40 Ca lu zra ca' xelezrá' chupa benne' biu le'e xixre'. Tue' xeché'e, na' xetúe' xegá'ane'.

41 Xelezrá' chupa nu'ula dxelútue'. Tue' xeché'e, na' xetúe' xegá'ane'.

42 'Le sua le'e ban lazre' lawe' da quebe nézele bi zra xelá'a neda', Xránale.

43 Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee cuane'.

44 Chee le na', le sua le'e ban lazre' lawe' da xelá'a neda', Benne' Gulje' Bénneache, gate québela

dxéquele ca'.

*Benne' wen zrin li lazre', ne benne' wen zrin quebe naque' li lazre'*

*(Lc. 12.41-48)*

<sup>45</sup> Na' gunná Jesús:

—¿Nuzra na' benne' wen zrin li lazre' ne dxéajni'ine', bénnea' xrané' dxucá'analene' le' benne' zaj zre'e lizre' chee gunézruje' da xelawe' gate zrin zra chee na?

<sup>46</sup> Ba neza naca na chee benne' wen zrin na', gate xezrín xrané', lé'ene' le' dxune' ca naca da nabague'.

<sup>47</sup> Da li dxapa' le'e, xrané' gucá'analene' le' ca naca da nape'.

<sup>48</sup> Che benne' wen zrin na' gaque' benne' wen da calela, ne guéqueñe' quebe xelá' zé xrané',

<sup>49</sup> ne che su lawe' gusaca zi'e xezícala benne' wen zrin ca', ne xi'aj gágulene' benne' dxelezuzre',

<sup>50</sup> nadxa xrané' xezrine' zra gate québela dxe-beze'. Gaca na zra quebe nézene',

<sup>51</sup> na' gusaca zí'le'e le'. Chugue' chee' gaque' tuze benne' ca' dxelune' láweze da xrlátaje. Cuezre', ne xáguxa'ate lazxe'.

## 25

*Da dxulé'e na ca naca chee chi nu'ula cuide'*

<sup>1</sup> Gunná Jesús:

—Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Gulequé'e xi' chee' ca', chee chjaque' laní chee wechaga na', dxelebeze' bátala xelá' benne' wechaga na'.

2 Gazxu' nu'ula caní gulaque' gat lazre', na' xegazxu' nu'ula caní zaj naque' ban lazre'.

3 Nu'ula ca' quebe zaj naque' ban lazre' belú'e xi' chee' ca', san quebe belú'e da za zzezxe na da xelegué'e lu xi' chee' ca'.

4 Nu'ula ban lazre' ca' belú'e xi' chee' ca', ne da za zzezxe na da xelegué'e na.

5 Lawe' da guzré benne' wechaga na', na' gulaca wase ca zaj naque', na' xúgute' gulasie'.

6 Dxela ben tu chi'i benne' dxebezre xe'e, dxenné': "Ba za' wechaga na'. Le dxuaj si' lu na'le le'."

7 Xúgute' nu'ula cuide' caní gulase', na' gulezú lawe' bulugale' xi' chee' ca'.

8 Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': "Le gunna late' da za zzezxe na cheentu', lawe' da ba dxelexula xi' cheentu'."

9 Nu'ula ban lazre' ca' belexechebe': "Quebe gaca, lawe' da che gúnnantu' late' cheele, quebe gaca na da dxechínnentu' netu', ne da dxechínnele le'e. Le chjácala naga dxutie' na, ne le cheajxrí cheele."

10 Dxácatę zjaca nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'e nen le' lu laní chee' wechaga na', na' bsezxuj dxa xu'u na'.

11 Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'."

12 Le' bechebe': "Cabata'. Da líqueze quebe núnbe'a le'e."

13 Nadxa Jesús guzre' benne' ca':

—Le sua le'e ban lazre', lawe' da quebe nézele

bi zra, u bi xel-la' xelá'a neda', Benne' Gulje' Bénneache.

*Da dxulé'e na ca naca chee benne' gulezí'e dumí*

<sup>14</sup> Na' gunná Jesús:

—Ca gaca chee benne' xelu'e naga dxenná bea Dios xabáa, naca na ca da guca gate tu benne' zue' chee se'e chéaje' zitu', na' gunné' bi wən zrin chee' ca', ne bcá'analəne' bi wən zrin ca' dumí chee'.

<sup>15</sup> 'Tu bi ca' bnézruje' gazxu' cue' dumí, na' xetube' bnézruje' chupa cue' dumí, na' xetube' bnézruje' tu cue' dumí. Bnézruje' chee tu tube' ca da xezeéquebe' xuluchínebe' na. Nadxa guzé'e zéaje' zitu'.

<sup>16</sup> Bi wən zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí.

<sup>17</sup> Cá'anqueze bi wən zrin na' guzi'be' chupa cue' dumí, bezi'be' xechupa cue' dumí.

<sup>18</sup> Bi wən zrin na' guzi'be' tu cue' dumí na' guxíajbe', ne bcáchebe' dumí chee xránabe' tu lu xedxu da bənbe' lu xu.

<sup>19</sup> 'Zane' iza ba guca gate bezrín xrane bi wən zrin ca', na' guzú lawe' dxezi'e da bdee' lu na' bi wən zrin ca'.

<sup>20</sup> Nedxu bzrin bi wən zrin na' guzi'be' gazxu' cue' dumí, na' bnézrujbe' xránabe' xegazxu' cue' dumí, na' gúzrebe' le': "Xran, bənnu' neda' gazxu' cue' dumí. Nigá de xegazxu' cue' da bezi'a nen dumí chiu'."

<sup>21</sup> Na' xránabe' guzre' lebe': "Da chawe' bənu'. Nacu' tu bi wən zrin xrlátaje, ne li lazre'. Gucu' li lazre' lu late' da bənnu' lue', na' gúnnaqueza'



lue' da zréndxaqueze. Guxú'u naga zua' neda', ne gubéle'e."

<sup>22</sup> Gudé na' bzrin bi wēn zrin na' guzi'be' chupa cue' dumí, na' gunabe': "Xran, bennu' neda' chupa cue' dumí. Nigá de xechupa cue' da bezi'a nen dumí chiu'."

<sup>23</sup> Na' xránabe' guzre' lebe': "Da chawe' benu'. Nacu' tu bi wēn zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubéle'e."

<sup>24</sup> Gate bzrin bi wēn zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné xue, ne dxezi'u da quebe guzu', ne dxexeca'u da quebe besiu'."

<sup>25</sup> Chee le na' bzreba', na' guxá'a xeajcáchia' dumí chiu' lu xu. Nigá de da naca chiu'."

<sup>26</sup> Na' xránabe' guzre' lebe': "Nacu' bi wēn zrin calēla, ne zrawēde. Ba nézqueznu' dxezi'a da quebe guza', ne dxexecá'a da quebe besia'."

<sup>27</sup> Chee le na' la xju'u dumí chia' na' lu na' benne' dxelíruje' chee dumí da dxuluchínene', na' gate za' neda', na' xezi'a da naca chia' nen da belezi'e."

<sup>28</sup> Nadxa guzre' benne' ca' zaj zre'e na': "Le xecá'a dumí na' da núxrube', ne le gunezruj na bēneea' nape' chi cue' dumí."

<sup>29</sup> Benne' nape' wazidxe' da zrendxa, na' benne' quebe nape', ca late' da du na' nape' wecá'a na.

<sup>30</sup> Ca naca bi wēn zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'ate lázxabe'."

*Ca gun Dios gate guchi'e chee bēneache zaj zre'e*

*xęzr la xu*

<sup>31</sup> Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz cheę xabáa chia', na' cué'queza' lataj naga nna be'a, da naca na da xabáa.

<sup>32</sup> Na' bénneache cheę xúgute cue' xęzr la xu xelexezrague' lawa' neda', na' xebéaja' cha cheę' ca dxun benne' dxuxúę' zrila'. xebéaje' chíbudu ca' ládujla zrila' ca'.

<sup>33</sup> Guzá'a benne' ca' zaj naca zrila' chia' chalá'a xabeła chia', na' benne' ca' zaj naca ca chíbudu ca' guzá'a le' chalá'a xéglala chia'.

<sup>34</sup> Nadxa xapa' benne' ca' zaj zra' chalá'a xabeła chia': “Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' cheęle gate na' bene' xęzr la xu nigá.

<sup>35</sup> Caní dxaca lawe' da guduna', na' bgágule neda'. Gubíleda', na' bėnnale da gu'a. Gudá' ca tu benne' xu'ę neza, na' gulu'ule neda' lízrele.

<sup>36</sup> Bxázejda' zra lana' gácua', na' bgácule neda'. Quebe chawe' guzúa', na' bedajná bale neda'. Guxu'a lizre xia, na' bedajná bale neda'.”

<sup>37</sup> Nadxa benne' xrlátaje caní xelenné': “Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebílenu', na' bėnantu' da gu'u?

<sup>38</sup> ¿Bata blé'entu' Lue' ca tu benne' xu'ę neza, na' gulú'untu' Lue' lízrentu'? ¿Bata blé'entu' Lue' dxexázejenu' zra lanu', na' bgácuntu' Lue'?

<sup>39</sup> ¿Bata bėnentu' quebe chawe' zu', u xu'u lizre xia, na' bedajná bantú' Lue'?”

<sup>40</sup> Neda' xecheba': Da li dxapa' le'e, ca da benle chee bennedu caní, benne' zaj naca dxexruj lazre', chee néda'queza' benle ca'.

<sup>41</sup> 'Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa cuita' neda', le'e, nácale wen da calela lau Xra'. Le chjaca lu xi' chee lataj ba xa' da nabeza na chee da xriwe', ne chee gubáz chee na ca'.

<sup>42</sup> Caní dxaca lawe' da guduna', na' le'e quebe bennale da gawa'. Gubíleda', na' quebe bennale da xí'aja'.

<sup>43</sup> Gudá' ca tu benne' xu'e neza, na' quebe gulu'ule neda' lízrele. Bxázejeda' zra lana' gacua', na' quebe bgácule neda'. Quebe chawe' guzúa' ne guxu'a lizre xia, na' quebe bedajná bale neda'.

<sup>44</sup> Nadxa benne' ca' xeléqueze' neda': "Xran, ĵbata blé'entu' Lue' dxedunu', u dxebílenu', u xu'u neza, u dxexázejenu' zra lanu', u quebe chawe' zu', u xu'u lizre xia, na' quebe gúcalentu' Lue'?"

<sup>45</sup> Neda', benne' wenná bea, xecheba': Da li dxapa' le'e, lawe' da quebe bi benle chee bennedu caní, benne' zaj naca dxexruj lazre', quebe bi benle chee néda'queza'.

<sup>46</sup> Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

## 26

*Dxelíljaje' ájala xelele' Jesús*

*(Mr. 14.1-2; Lc. 22.1-2; Jn. 11.45-53)*

<sup>1</sup> Gate bexuzre bchalaj Jesús caní, na' guzre' benne' ca' dxusédene':

<sup>2</sup> —Ca ba nézquezle, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaję' bėnneache cheę' lu xęzr la xu Egipto, na' neda', Benne' Gulję' Bėnneache, xuludęę' neda' lu na' benne' xuludęę' neda' xaga bėguaj.

<sup>3</sup> Ca lu zra na' benne' xíchaję ca' cheę bxruze ca', ne benne' dxuluxuzájļęę da bdxixruj Moisés, ne benne' gula sina ca' cheę judío ca', belezrague' chale'aj cheę xu'u zaca cheę Caifás, bxruze blau.

<sup>4</sup> Na' belíaję' ájala xeļeļę' Jesús lu da węn lazre' cheę xelútię' Le'.

<sup>5</sup> Gulenné':

—Quebe gundxu na lu zra laní nigá, cheę quebe xeledábaga benne' ca' dxi'u.

*Tu nu'ula dxegu'e Jesús da dxelá zixre  
(Mr. 14.3-9; Jn. 12.1-8)*

<sup>6</sup> Zua Jesús xęzre Betania lizre Simón, bėnnea' güé'ene' wę' guzru'.

<sup>7</sup> Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate na da dxelá zixre da zácale'ę na. Gate na' dxe' Jesús ga dxelawę', na' nu'ula nigá gulu'ę na xichaj Jesús.

<sup>8</sup> Gate belelé'e benne' ca' dxusęde Jesús da nigá, na' belezré'ę, ne gulezú lawę' dxelenné':

—¿Bizr cheę na' guzría xi' da nigá?

<sup>9</sup> Da nigá waca la gudá'u na sí'adxu da zrente, cheę gácaleđxu benne' xache' ca'.

<sup>10</sup> Jesús benne' da nigá, na' guzre' benne' ca':

—¿Bizr cheę na' dxunle nu'ula nigá zęde? Da nigá bęne' naca na tu da xrlátaje.

11 Benne' xache' ca' tu zrázqueze' ládujla le'e, na' neda' quegá tu súaleza' le'e.

12 Ca naca da ben nu'ula nigá, gulu'e da zixre na' bel-la' dxen chia', naca na da xucá'ana chawe na neda' chee zra gachia' lu xedxu ba.

13 Da li dxapa' le'e, gáteteze xuluchálaje' dizra' chawe' chia' nigá du gabí'i xezr la xu, na' zrálajqueze ca da ben nu'ula nigá, chee cheajlesá lazre' benneache le'.

*Judas dxechebe lazre' gudé' Jesús*

*(Mr. 14.10-11; Lc. 22.3-6)*

14 Nadxa tu benne' chazrinnu ca' dxusede Jesús, bennea' le' Judas Iscariote, guxíaje' xeajchálajlene' benne' xíchaje ca' chee bxruze ca'.

15 Guzre' le':

—¿Ájate gúnnale neda' che ca' gudéa' Jesús lu na'le?

Nadxa benne' ca' gulízruje' le' chi dxua dumí plata.

16 Ca lu zra na' guzú lau Judas dxexílaje' ájala gune' gudé' Jesús lu na' benne' ca'.

*Da dxágudxu chee xucúbedxu ca guca gate gute Xránadxu*

*(Mr. 14.12-25; Lc. 22.7-23; Jn. 13.21-30; 1 Co. 11.23-26)*

17 Zra nedxu chee laní na' gate na' dxelawe' xeta xtila da quebe nachixre cua zichaj chee na, benne' ca' dxusede Jesús belezrine' lau Le', na' buluchebe' Le':

—¿Gazra dxaca lazru' gucuézentu' da gágudxu chee laní pascua chee benne' judío?

18 Jesús guzre' le':

—Le chjaca lu xezre na', naga zua lizre tu benne', na' le xe'e: “Bennea' dxusédene' dxi'u dxenné': Zra chia' gatia' ba zua gágute, na' lizru' lue' gawa' chee Laní Pascua tu zren nen benne' ca' dxusédeda'.”

<sup>19</sup> Benne' ca' dxusede Jesús belune' ca da gunná bé'ene' le', na' bulucueze' da xelawe' chee Laní Pascua.

<sup>20</sup> Gate gula chizrela, na' gudxé' Jesús ga gawe' tu zren nen benne' ca' dxusédene'.

<sup>21</sup> Dxácatē na' dxelawe', guzre Jesús benne' ca':

—Da li dxapa' le'e, tule le'e naca bēnnea' gudée' neda' lu na' benne' ca' dxelune' da calela.

<sup>22</sup> Nadxa benne' ca' belexewí'inele'e, na' gulezú lawe' tu tue' dxuluchebe' Jesús:

—Xran, ¿quebe naca neda'?

<sup>23</sup> Na' bechebe Jesús:

—Bēnnea' dxudé ne'e lu xé'ena tu zren nen neda', benne' na' gudée' neda'.

<sup>24</sup> Neda', Benne' Gulje' Bēnneache, waxá'a naga dxal-la' gatia' ca naxúaj na lu xiche chee Dios, san edxugúa bēnnea' gudée' neda'. Cháwedxa naca la quebe gulaj bēnnea'.

<sup>25</sup> Nadxa gunná Judas, bēnnea' gudée' Jesús, dxenné':

—Benne' dxusede, ¿quebe naca neda'?

Na' bechebe Jesús, gunné':

—Awe', lue' na'.

<sup>26</sup> Dxácatē dxelawe', Jesús guqué'e xeta xtila, na' guzre' Dios: “Xcalenu'.” Gudé na' bzúzruje' na, na' bnézruje' na benne' ca' dxusédene', dxenné':

—Le gagu. Da nigá naca na be-la' dxen chia'.

27 Gudé na' guqué'e tu zriga', na' guzre' Dios: "Xcalenu", na' bnézruje' na benne' ca', dxenné':

—Le xi'aj xúgutele da xuzru lu zriga' nigá.

28 Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne chee benne' zante chee gunite lau Dios dul-la zaj nabaga benne' ca'.

29 Dxapa' le'e, québedxa xí'aja' ca naca xrise uva nigá ca zrindxa zra xí'aja' da cube tu zren nen le'e naga dxenná bea Xra'.

*Jesús dxenné' nna Pedro quebe núnbe'e Le'  
(Mr. 14.26-31; Lc. 22.31-34; Jn. 13.36-38)*

30 Ca gudé belul-le' chee Dios, na' gusiá'que' zjaque' lu Xi'a Xaga Olivo Ca'.

31 Nadxa Jesús guzre' benne' ca':

—Xúgutele le'e gusán lázrele neda' na'a zre', lawe' da naxúaj na lu xiche chee Dios, dxenné': "Gutia' benne' dxuxúe' zrila', na' zrila' ca' xelase dínna'jba'."

32 Gate te xebana' neda', cha'a neda' ga nababa Galilea nédxudxa ca le'e.

33 Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

34 Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

35 Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute benne' ca' dxusede Jesús.

*Jesús dxuchálajl̥eḡ Dios naga zaj zxe' xaga olivo ca' nazí le na Getsemaní*  
(Mr. 14.32-42; Lc. 22.39-46)

<sup>36</sup> Nadxa bzrin Jesús nen benne' ca' dxusédeneḡ tu lataj nazí le na Getsemaní, na' guzreḡ leḡ:

—Le cue'e nigá dxácat̥eḡ cha'a neda', guchálajl̥eḡ na' Dios.

<sup>37</sup> Jesús guchéḡ Pedro, ne dxúpat̥eḡ zri'ine Zebedeo, na' guzú law̥eḡ bewí'ineleḡeneḡ ne guzúal̥eḡ stebe.

<sup>38</sup> Nadxa guzreḡ benne' ca':

—Dxewí'ine lázreleḡ'a dxunteḡ na gute na neda'. Le xegá'ana le'e nigá, ne le sua ban lazre' tu zren nen neda'.

<sup>39</sup> Nadxa Jesús guzéḡ zéajeḡ xelate' caníladxa, na' guteḡ sudxú'ala lu xu, ne bchálajl̥eḡ Dios, dxennéḡ:

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

<sup>40</sup> Nadxa bezrín Jesús naga zaj zra' benne' ca' dxusédeneḡ, na' blé'eneḡ benne' ca' dxelásiḡ, na' guzreḡ Pedro:

—¿Quebe gúcale le'e quíchale bchigala nen neda' tu chí'idau'ze?

<sup>41</sup> Le nnaze, ne le guchálajl̥eḡ Dios cheḡ quebe gun zrėje da xriweḡ le'e. Da li bēnne'du xu'ule dxaca lázreḡleḡe na, san lu bel̥a' dxen cheḡle dxate ni'a na'le.

<sup>42</sup> Da gudxupe' lasa guxíaj Jesús bchálajl̥eḡ Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.



<sup>43</sup> Ca gudé na' bezrine', ne belé'ene' benne' ca' dxusédené', dxelásié' lawe' da ba dxeleZRude' lawe' dxelaca wásele'e.

<sup>44</sup> Bca'ane' benne' ca', guzé'e zéaje' bchálajlene' Dios da guxunne' lasa, na' gunnáqueze' ca' da ba gunné' ca'an bache.

<sup>45</sup> Nadxa bezrine' naga zaj zra' benne' ca' dxusédené', na' guzre' le':

—Le gase na'a, ne le xezí' lazre'. Ba bZrin zra gate neda', Benne' Gulje' Bénneache, tea' lu na' benne' dul-la ca'.

<sup>46</sup> Le chasa, ne le chu'u. Ba za bÉnnea' dxudéé' neda'.

*Dxelech'é Jesús ca tu benne' wén da zrinnaj*  
(Mr. 14.43-50; Lc. 22.47-53; Jn. 18.2-11)

<sup>47</sup> Ne dxuchálajte Jesús na' gate bZrin Judas. Naque' tu benne' chazrinnu ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchaje ca' chee bxruze ca', ne benne' gula sina ca' chee judío ca'.

<sup>48</sup> Judas, bÉnnea' dxudéé' Jesús, ba blé'ene' benne' ca' ca tu da gune' da gulé'e na nu na' naca Jesús. Gunné':

—BÉnnea' gunupa' neda', Le' na'. Le che'e ca tu benne' wén da zrinnaj.

<sup>49</sup> Nadxa bZrin Judas lau Jesús, dxenné':

—Diuzre, Benne' dxusede.

Na' bnupe' Jesús.

<sup>50</sup> Bechebe Jesús:

—Ljwezra', ¿bi chee za'u?

Nadxa gulebiga benne' ca', gulele' Jesús, na' beleché'e Le' ca tu benne' wén da zrinnaj.

<sup>51</sup> Tu benne' ca' dxuse<sub>de</sub> Jesús gulé<sub>aje</sub>' xia chee', ne guchugue' chalá'a naga bi wen zrin chee bxruze blau.

<sup>52</sup> Nadxa Jesús guzre' le':

—Begú'u xia chiu' lu zre na, lawe' da xúgute benne' dxelute benne' nen xia nalá, cá'anqueze gate le'.

<sup>53</sup> ¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinnu cue' gubáz chee xabáa, zaj naque' zánete tu tu cue'?

<sup>54</sup> Na'a che ca'an guna', ¿ájazra gaca gaca na ca da naxúaj na lu xiche chee Dios, da dxenná na caní dxal-la' gaca na?

<sup>55</sup> Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee quélale neda', dxunle neda' ca tu benne' gubán. Xúgute zra gudxe'a neda' lu xudau' dxusededa' le'e, ne quebe gudélale neda'.

<sup>56</sup> Xúgute da caní dxaca na chee gaca na ca da gulenná benne' ca' buluchálaje' waláz chee Dios, da na' naxúaj na lu xiche chee Dios.

Nadxa xúgute benne' ca' dxuse<sub>de</sub> Jesús bulucá'ane' Le' tuzé', buluxuzrúnnuje'.

*Dxezrín Jesús lau benne' ca' chee xu'u lawe' blau chee judío ca'*

*(Mr. 14.53-65; Lc. 22.54-55, 63-71; Jn. 18.12-14, 19-24)*

<sup>57</sup> Benne' ca' gulele' Jesús guleché'e Le' lau Caifás, bxruze blau, ga na' zaj nazraga benne' ca' dxuluxuzájle'e da bdixruj be'e Moisés, nen benne' gula sina ca'.

58 Pedro zéaje nawe' Jesús zítu'la, na' bzrine' chale'aj chee lizre bxruze blau, na' guxú'e, ne gudxé'e tu zren nen bi xa'aga chee lé'ene' ájala xexuzre da dxaca na'.

59 Benne' xíchaje ca' chee bxruze ca', ne benne' gula sina ca', ne xúgute benne' ca' chee xu'u lawe' blau chee judío ca' belílaje' ájala xuluzría xi'e Jesús, lácala naca na da wen lazre', chee xelezéquene' xuludée' Le' gatie'.

60 Quebe bi belezrelne', lácala belezrín benne' zan benne' gulenné' da wen lazre' chee Jesús. Naga xeajsete na belezrín chupa benne' wen lazre'.

61 Dxelenné':

—Benne' nigá gunné': “Wazéqueda' neda' guchínnaja' xudau' chee Dios, na' xexuna' na lawe' chunna zraze.”

62 Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné' chiu' lue'?

63 Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

64 Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabela chee Dios nen xel-la' szren chee', na' xelá'a lu beuj bza chee xabáa.

65 Nadxa bxruze blau gucheze' zra lané' chee blé'ene' quebe nabague' zria, na' gunné':

—Benne' nigá dxenné' schanni' chee Dios. ¿Nachínnedxadxu benne' xechēbe'? Ba bēnquezle le'e ca dizra' schanni' dxenné'.

66 ¿Bi dxennale le'e?

Benne' ca' gulenné':

—Nabague' zria, ne dxal-la' gatie'.

67 Nadxa buluzré'ē zrene' lau Jesús, ne belú'ē Le', na' xebal-le' belegape' dxu'a lawe'.

68 Na' gulé'ē Le':

—¿Nácaquezu' Lue' Cristo? Gunné xa'a nu be Lue'.

*Dxenná Pedro quebe núnbe'ē Jesús*

*(Mr. 14.66-72; Lc. 22.56-62; Jn. 18.15-18, 25-27)*

69 Dxácatē na' dxe' Pedro chalé'ajla, na' tu nu'ula wen zrin bzrinē' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

70 Pedro ben chúchue' xrtizre' lówela xúgute benne' ca', gunné':

—Quebe nezda' nu chee na' dxenníu'.

71 Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zre'ē na':

—Cá'anqueze benne' nigá dxedálēne' Jesús, benne' Nazaret na'.

72 Xecha lasa ben chúchue' Pedro xrtizre', na' bzétaje' Dios, gunné':

—Quebe núnbe'a benne' na'.

73 Xetú chí'idau' guca belezrín benne' zaj zre'ē na' lau Pedro, na' gulé'ē le':

—Da li, tuze nácaquezu' nen bēneea' lawe' da xel-la' dxenné chiu' dxunna bea na lue'.

74 Nadxa guzú lau Pedro dxuzría xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácatē na' gudhezre xjeaj.

<sup>75</sup> Nadxa xeajsá lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'e.

## 27

### *Dxelech'é Jesús lau Pilato*

(Mr. 15.1; Lc. 23.1-2; Jn. 18.28-32)

<sup>1</sup> Gate guxaní', xúgute benne' xíchaję ca' cheę bxruze ca', ne benne' gula sina ca' cheę benne' judío ca' belune' tuze dizra' ájala xelune' cheę xelútię' Jesús.

<sup>2</sup> Nadxa beleché'e Le' nadxéaję', ne xeajlegu'e Le' lau Poncio Pilato, benne' dxenná be'e waláz cheę xezr la xu Roma.

### *Ca guca gate gute Judas*

<sup>3</sup> Nadxa Judas, bēnea' bdee' Jesús, gate guque bé'ene' ba buluzría xi'e Jesús, bexíajele'ene', na' bunézruję' da chi dxua dumí plata lau benne' xíchaję ca' cheę bxruze ca', ne benne' gula sina ca'.

<sup>4</sup> Dxe'e le':

—Neda' bēna' dul-la lawe' da bdea' tu benne' naque' du lazre' cheę gatię'.

Belexechebe benne' xíchaję ca':

—¿Bizra naca cheętu' da nigá? Chiu' lue' naca da na'.

<sup>5</sup> Nadxa Judas buzale' dumí na' lu xudau', ne bezé'e, na' xeajxelú'u du lbe'e.

<sup>6</sup> Benne' xíchaję ca' cheę bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí cheę xudau', lawe' da naca na lazruj cheę benne' dxute benne'.

7 Nadxa belune' tuze dizra' xelá'awe' tu xezr la xu nen dumí na' da nazí le na xezr la xu chee wen xesu' zruaga, chee gaca na tu lataj naga xelegache benne' zitu'.

8 Chee le na' nazí le xezr la xu na' Xezr La Xu Chee Dxen ca lu zra na'a zra.

9 Caní guca na chee gaca ca da gunná Jeremías, benne' bchálaje' waláz chee Dios, gunné': "Gulequé'e chi dxua dumí plata da naca na da zaca Le' da buluzúa benne' Israel.

10 Nen dumí na' belá'awe' xezr la xu chee benne' wen xesu' zruaga, cáteze gunná be'e Xrana' neda'."

### *Dxezrín Jesús lau Pilato*

*(Mr. 15.2-5; Lc. 23.3-5; Jn. 18.33-38)*

11 Guleché'e Jesús lau bénnea' dxenná be'e waláz chee xezr la xu Roma, na' le' bchebe' Jesús:

—¿Nacu' Lue' Wenná Bea chee judío ca'?

Jesús gunné':

—Ca' naca na, ca dxennáu' lue'.

12 Gate benne' xíchaje ca' chee bxruze ca', ne benne' gula sina ca' gulawe' zria chee Jesús, na' Le' quebe bi bechebe'.

13 Nadxa gunná Pilato, dxé'e Jesús:

—¿Quebe dxennu' ca da dxelenná benne' caní chiu'?

14 Jesús quebe bi bechebe'. Ca'an guca bebanne bénnea', ne quebe bezrela lazre' ájala nne'.

### *Dxelechugue' chee Jesús gatie'*

*(Mr. 15.6-20; Lc. 23.13-25; Jn. 18.38—19.16)*

15 Gate dxu'u laní na', bénnea' dxenná be'e na' xu'u lawe' dxusané' tu benne' wen da zrinnaj, núteteze benne' dxelaca lazre' benne' ca'.

16 Ca lu zra na' xu'u tu benne' lizre xia, benne' wénle'e da zrinnaj, nazí le' Barrabás.

17 Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bènea' le' Cristo?

18 Caní gunné' lawe' da ba nézene' buludé' Jesús lawe' le' lawe' da dxelaque' xa lazre' chee Jesús.

19 Dxácatē na' dxe' Pilato naga dxuchi'e chee bèneache, na' zru'ule' gusel-le' tu benne' xeajezre' Pilato: “Quebe guchixre chiu' da naca chee benne' xrlátaje na', lawe' da guneda' xēla ba dxēle, da bzúalē'e na neda' stēbe nē chee Le'.”

20 Benne' xíchaje ca' chee bxruze ca', ne benne' gula sina ca' belegú'u xelē' benne' ca' chee xelenabe' la Barrabás, ne gate Jesús.

21 Bènea' dxenná be'e bchálajlēne' benne' ca' xecha lasa. Buchebe' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

22 Pilato bchebe' benne' ca':

—¿Bizra guna' chee Jesús, benne' le' Cristo?

Xúgutē' belexechebe':

—Bde'e xaga béguaj.

23 Nadxa gunná Pilato, dxē'e benne' ca':

—¿Bizra da calela nune'?

Benne' ca' gulezú lawe' dxelebezre xē'e, gulenné':

—Bde'e xaga béguaj. Bde'e xaga béguaj.

24 Gate Pilato guque bé'ene' quebe bi séquene', na' benne' zan ca' dxeledábague' le', na' gunná bé'ene' bla' nisa, na' gudibe ne'e lāwela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na cheele le'e.

25 Xúgute benne' ca' belexechebe':

—Netu', ne zrí'inentu' nabáantu' ca naca chee xel-la' gute chee'.

26 Nadxa Pilato bsane' Barrabás, ne gunná bé'ene' beleché'e Jesús chee xelu'e Le', na' bdee' Le' chee te'e xaga béguaj.

27 Nadxa benne' dxjaque' wedil-la chee bēnea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga ze Jesús.

28 Belequ'e zra lane', ne bulugácue' Le' tu ladxe' bzawe.

29 Buluzúe' xíchaje' tu da naca na zruze xaga xeche', ne buluguxre' Le' tu xaga ne'e xabela. Nadxa buluzú zribe' lau Jesús, ne belún le' chee', dxelenné':

—Gaca xabáa chiu', Wenná Bea chee judío ca'.

30 Cá'aqueze buluzré'e Le' zrene', na' gulequ'e xaga da nuxru Jesús, ne guline' na xíchaje'.

31 Ca gudé belún le' chee Jesús, na' belexegüe' ladxe' bzawe, na' buluxugácue' Le' zra lānaqueze'. Nadxa beleché'e Le' chee te'e xaga béguaj.

*Dxuludé'e Jesús xaga béguaj*

*(Mr. 15.21-32; Lc. 23.26-43; Jn. 19.17-27)*

32 Ca gusiá'que' na', belexezrage' tu benne' xezre Cirene, le' Simón, na' gulenná bé'ene' le' bi'e xaga béguaj chee Jesús.



33 Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate.

34 Na' bulunézruje' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

35 Ca bexuzre benne' dxjaca wedil-la buludé'e Le' xaga béguaj, na' gulebéaje' da gaca bea na chee xelexelé'e ca naca zra lana Jesús. Ca'an guca guxá ca da gunná benne' bchálaje' waláz chee Dios, gunné': "Belexelé'e zra lana' leze'. Gulebéaje' da gaca bea na."

36 Nadxa gulebé'e dxuluzuzre' Jesús.

37 Buluzríe' xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

38 Cá'anqueze buludé'e chupa benne' gubán tu zren nen Jesús le'e xaga béguaj ca', tue' chalá'a xabela, ne xetúe' chalá'a xéglala ga da' xaga béguaj chee Jesús.

39 Benne' dxeledé'e na' dxelún le' chee Jesús. Dxulutá xíchaje',

40 ne dxelenné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

41 Cá'anqueze belún la chee' benne' xíchaje ca' chee bxruze ca', ne benne' dxuluxuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

42 —Bselé' benne' xula, san quebe dxezéquene' guselá cuine'. Che naque' Wenná Bea Chee

Xezre Israel, dxal-la' xexétaje' le'e xaga béguaj, na' chéajledxu chee'.

<sup>43</sup> Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

<sup>44</sup> Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

*Ca guca gate gute Jesús*

*(Mr. 15.33-41; Lc. 23.44-49; Jn. 19.28-30)*

<sup>45</sup> Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna.

<sup>46</sup> La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda'?)

<sup>47</sup> Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

<sup>48</sup> Dxácatę na' guzá' chegu tu benne' ca', xeajxri'e tu da dxezrupe nisa, na' ca bsebise' na nen nupe zichaj, na' bzue' na lawe' tu xaga, ne bzrigue' na dxu'a Jesús chee xrupe' na.

<sup>49</sup> Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

<sup>50</sup> Xecha lasa gudxezre xa'a Jesús, na' gutie'.

<sup>51</sup> Lu zra ná'queze ladxe' da ze lu xudau' bdx-uaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulúzruqueze na.

52 Gulexalaj ba, na' belexebán benne' gate ca', benne' guléajle'e da naca chee Dios.

53 Ca gudé bebán Jesús, na' benne' caní belexedxúaje' lu xedxu ba, ne belexexú'e lu xezre lá'azxa Jerusalén, naga benne' zan belelé'ene' benne' ca'.

54 Nadxa benne' dxenná be'e lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne xezícadxa da ca'an gulaca, na' belezrébele'e, dxelenné':

—Da lítegaze benne' nigá guque' Zri'ine Dios.

55 Nu'ula zan zaj zre'e na' dxelenné'e zítu'la, nu'ula ca' xjácálene' Jesús gate bezé'e ga nababa Galilea, ne gulácalequeze' Le'.

56 Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

*Dxulucache' Jesús lu xedxu ba*

*(Mr. 15.42-47; Lc. 23.50-56; Jn. 19.38-42)*

57 Ca guzú lau dxaca waxrinne, na' bla' tu benne' gunní'a le' José, benne' xezre Arimatea, benne' dxéajlequeze' chee Jesús.

58 Benne' nigá guxíaje' xeajchálajlene' Pilato, na' benabe' bel-la' dxen chee Jesús. Pilato gunná bé'ene' xulunézruje' le' bel-la' dxen na'.

59 Nadxa José bequé'e bel-la' dxen na', na' bchele' na tu ladxe' da naxadxe.

60 Nadxa gulu'e Le' lu ba da naca na cheéqueze José na', da bene' tu lu xiaj. Gulexrú'e tu xiaj blaga zren dxu'a ba chee Jesús, na' bezé'e ga na'.

61 Gulezrá' María Magdalena, ne xetú María, zaj dxe'e le nna' dxu'a ba na'.

*Dxulubia dxuluxuē' ba cheē Jesús*

<sup>62</sup> Zeaj zra xula, da naca na zra ca gudé zra bulucueze', na' benne' xíchaje ca' chee bxruze ca', ne benne' xudau' fariseo ca' belezrine' lau Pilato.

<sup>63</sup> Dxelé'e le':

—Xran, dxeajsá lázrentu' ca naca da gunná benne' wēn lazre' na' gate na' zuē'. Gunné' gate gaca chunna zra, na' xebane' ládujla benne' gate.

<sup>64</sup> Chee le na', bdixruj be'ene' benne' ca' xulubia xuluxuē' ba chee' na' cadxa gaca chunna zra, chee quebe xeledá' benne' ca' bsédene' xedajlexebéaje' beł-la' dxen na' chizrela, na' te na' xuluzenne' bēneache ba bebane' ládujla benne' gate. Che ca'an gaca, na' dizra' wēn lazre' bzebe nigá gun na da zrinna, zrendxa ca da nedxu.

<sup>65</sup> Pilato guzre' benne' ca':

—Na' zaj zra' benne' dxjaque' wedil-la xuluzre' na. Le chjaca le'e, ne le guxúe xanne' ba na' ca se lau séquele.

<sup>66</sup> Nadxa xjaque', xeajlexúe' ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

**28***Ca guca gate bebán Jesús*

(Mr. 16.1-8; Lc. 24.1-12; Jn. 20.1-10)

<sup>1</sup> Ca gudé chee zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xeajlenné'e ba chee Jesús.

<sup>2</sup> Chadite guzrú'le'e na lawe' da betaj tu gubáz chee xabáa chee Xránadxu, na' bzrine' dxu'a ba na', ne bequé'e xíajta'a zren na' da zrua na dxu'a ba na', na' gudxé'e lawe na.

<sup>3</sup> Gubáz na' dxácatite legale', ne naca chiche zra lane' ca bezxe'.

<sup>4</sup> Gate belelé'e benne' dxjaque' wedil-la gubáz chee xabáa na', na' belezrízene' xel-la' dxelezrebe, ne belexegá'ane' ca benne' gate ca'.

<sup>5</sup> Nadxa gunná gubáz chee xabáa na', dxē'e nu'ula ca':

—Quebe zrēbele. Nezda' dxexílajle Jesús, bēneea' gudé'e xaga béguaj.

<sup>6</sup> Quebe zue' nigá lawe' da ba bebane', cáteze na' gunné'. Le da nna'le lu ba naga gulegú'e Le'.

<sup>7</sup> Le cheajxáquezega, le cheajezre benne' ca' bsédenē' ba bebane' ládujla benne' gate, na' chéajē' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

<sup>8</sup> Nadxa nu'ula ca' besiá'que' dxu'a ba na', zeajx-aca chégüē'. Dxelezrebe', ne dxelebenē'. Zjaque' zeajleguezre' benne' ca' bsēde Jesús.

<sup>9</sup> Dxácatē na' Jesús bchague' nu'ula ca', ne bgape' le' diuzre. Belezrine' lau Jesús, dxelúe lá'ane' Le', ne bulunide' ni'a Jesús.

<sup>10</sup> Le' guzre' nu'ula ca':

—Quebe zrēbele. Le chjaca, le cheajēzre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

### *Ca da gulenná benne' dxjaque' wedil-la*

<sup>11</sup> Dxácatē zjaca nu'ula ca', na' benne' ca' dxjaca wedil-la gulu'e xēzre, ne buluchálajlēne' benne' xíchajē ca' chee bxruze ca' ca da guca.

<sup>12</sup> Benne' xíchajē ca' buluchálajlēne' benne' gula sina ca' chee xelūne' tuze dizra'. Nadxa bulunézrujē' benne' dxjaque' wedil-la dumí zrentē.

13 Dxelenné':

—Le nna le'e belelá' benne' ca' bsēde Jesús na' chizrela, dxácatę dxásele le'e, na' belexexú'e bel-la' dxen chee'.

14 Che benne' dxenná be'e na' xenne' da nigá, netu' guchálajentu' le', ne gucá'ana cháwentu' chee quebe bi gaca chee le'e.

15 Nadxa benne' dxjaque' wedil-la gulezí' lu ne'e dumí na', na' besiá'que' belune' ca bache zaj nézene'. Da nigá naca na ca dxelenná judío ca' zéajte lu zra na'a zra.

*Jesús dxesel-le' benne' gubáz chee' ca'  
(Mr. 16.14-18; Lc. 24.36-49; Jn. 20.19-23)*

16 Nadxa xjaca benne' chinéaj ca' bsēde Jesús, na' belezrine' lu xi'a naga ba guzre Jesús le'.

17 Gate belelé'ene' Jesús, na' bulucá'ana szrene' Le'. Bal-le' gulaca chupa lazre'.

18 Nadxa Jesús gubigue' naga zaj zra' benne' ca', na' guzre' le':

—Neda' ba nazí' lu na'a ca naca xel-la' dxenná bea xabáa, ne lu xezr la xu nigá.

19 Chee le' na' le chjaca, le cheajchálajle benne' zaj zre'e du ca naca xezr la xu nigá, ne le cheajsédené' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa.

20 Le guséde-ne' xelaque' wezúa dizra' ca naca da ba gunná be'eda' le'e, na' neda' tu súalezqueza' le'e xúgute zra cadxa cheajsé chee xezr la xu nigá. ¡Ca'an gaca na!

**Xela wezria cube nen salmo ca'**  
**New Testament and Psalms in Zapotec, Tabaa**  
**(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

**Copyright Information**

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament and Psalms**

in Zapotec, Tabaa

**© 1981, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

80626b72-93df-58ae-9f5e-9d86733fab46